

瓊州府志

瓊州海口海南書局印行



瓊州府志卷之三十六上

人物志七 篤行

元

明

國朝

元

林友仁瓊山人郡知事材幹賢能有隱德

明

吳伯雄瓊山人有材能洪武間出仕歸隱居閩里課蒙養晦不趨權力

賈志

邢貴文昌人永樂乙酉鄉薦任沅州訓導宦歸以儒禮訓誨鄉人喪祭絕去俗尙經明行

修人皆師仰

志

鄺信瓊山右所人力學篤行設家塾教子弟二子俊傑皆業儒俊隱居傑以賢良方正薦

授崇安縣丞仕至廣西僉事

黃通志

謝寧臨高人登宣德乙卯賢書任福建寧化訓導年四十致仕王佐爲之傳曰性謙而滑

稽遇鄉里無少長皆降禮常牽一欺段自隨道遠力乏則乘之稍息復徒步有盜其禾

者他人縛而致之遽釋其縛謂曰君饑乎然別有處饑之道此非君子所爲也厚賜遣

之其人感愧不復爲盜

臨高志

李珊瓊山人成化丙戌進士授行人使占城賜從二品服選南京福建道御史陞廣西僉

事整飭柳慶兵備詩文敏暢有古愚集

牛志

梁繼瓊山人成化癸卯鄉舉任徽州府推官改嚴州俱有政譽卒於官狀元唐梟挽以詩

練水無聲存舊澤桐江有恨入驚湍所著有竹溪集

同上

王公遜字時敏澄邁庠生端方正直見義勇爲家頗裕饒族鄰每待以舉火歲荒捐穀六

千五十石助賑有司奏聞奉旨獎勞敕建尙義坊

澄邁志

吳璿澄邁人成化壬辰歲荒當道檄令捐賑璿慨然出米三千斛以濟畧無難色郡邑重

之及卒武昌推官周賓銘其墓

李大鵬澄邁人恩貢幼貧失怙恃年十四始知書從郡庠士郭同山游授以經義郭嘗試

之曰吾知爾貧束修不計也他日何以報我對曰傳師之業廣師之惠他日授徒亦不

敢計束修是爲報耳後由貢選歷榮邱教授恬淡自甘取與不苟族弟無居讓宅與之

路拾遺金還其主郡守徵爲鄉飲大賓辭不至節推張材造廬禮焉清標雅望沒世猶

存俱同
上

唐朝允字邦儀儋州人早孤性剛毅克自樹立嘗從儒士梁成學勇於從善知無不爲州牧陳永時見學校傾圯議遷基改建區畫悉出朝允宏治辛酉符南蛇亂朝允率義兵堵禦一方賴以安有故人托金二十兩已爲賊掠及事平乃貸償之終不言及正德間任桂陽訓導至則敷陳條約止風教作士氣同官有彭姓者卒於任親爲視斂盡捐俸

餘賻焉乞休歸

儋州志

劉廷著字章甫定安人家貧力學躬爨事親少以孝名研窮理學教授生徒瓊定登科第者多出其門嘉靖己酉應貢北上遇故友張士毅之子張希舜落拓京華贈資遣歸司訓南靖循循善誘士子相慶得師未幾遘疾乞休諸生請留謝曰職雖微安可以臥病爲人師也浩然而歸邑人士爲之志去思焉孫銓歲貢有文名

定安志

林鶚瓊山人少孤貧竭力奉母以舌耕爲業人有貧負債者不取償年八十口授經書訓子及孫所著有別野集

陳高字宗陵瓊山人郡庠生天然仲子敦族睦鄰訓育孤姪如子奉庶母如母兄被誣抵

責高請以身代晚年謝絕世務吟咏自適牛志

吳一元瓊山人邑庠生少孤事母孝時以詩文適志年荒乏食經歷何應徵餽之銀米不

受其守如此同上

許伯良澄邁人仗義喜施初爲義寧訓導歷綏寧敦禮教肅學規門下有鬻女者代贖之

值歲荒捐俸埋殍骨卒於任祀綏寧名宦賈志

邢文成字道蘊文昌人守正不撓尙義好施業儒不售然好學篤行至老不倦厚延名師

教子傾家不惜子裔昌舉於鄉祚昌成進士

楊彥字兆東儋州人萬歷初偕薛通考貢督學以通年耄文劣屬意於彥力辭不就友人

翁正思省試卒爲經理其喪扶櫬歸葬以歲責任合浦訓導歷南康教諭湖州教授致

仕歸一肩行李清潔自持舉鄉賓十有七次卒年八十三祀州鄉賢儋州志

國朝

李說字言兌瓊山人膺歲薦鴻才碩學遠近求詩文及草書者屢滿戶外生平無疾言厲

色藹若春風而望之儼然有先民軌範卒年八十蕭志

王凝機號問溪瓊山人康熙間歲貢品端行潔善詩文工草書邑乘殘缺獨有志修明搜討編輯多出其手年八十餘方瞳皓髯吟咏不輟飄飄有出塵之概

周熙朝瓊山人澄邁歲貢少穎悟能文溫柔敦厚孝友兼至遭父喪鬻產營葬一遵古禮胞兄熙輔貧推已田產奴僕遺之無所吝

黃含宏瓊山庠生素履無玷行誼可嘉母病朝夕不離側撫姪如所生族戚有貧乏鬻子者捐金代贖曾修南渡墟岸立頓林渡船以濟人利物爲志

林昌煜字昭生文昌人歲貢素性儉樸躬謙謹司訓海康獎勉士類署邑篆清白自持雷有二蘇祠捐俸置香燈田雷人陳瓊有記

陳用楫崖州人康熙癸巳副榜沉靜端方謙恭接物潛心經史成就後學與昆季五人咸稱友愛

鍾世聖字師百瓊山附貢性純篤少失怙事母竭誠以承色笑讀禮哀痛毀瘠與人易直和煦善於勸諭里黨雀角得一言而解嘗倡修濟衆迎恩迎龍各石橋呈請疏鑿白沙河以便舟楫稱利賴焉

吳永泰定安庠生爲人淳樸性慷慨康熙年間捐田二十丁入義學爲多士膏火資至今肄業者賴之

邱璣字衡之瓊山歲貢文莊裔孫能讀祖父書乾隆十二年銓保昌司訓以母老告終養後補徐聞教士以敦行爲先幼時聞所居爲形家稱美語乃祖曰一家好不如一族好曷不爲邱氏宗祠耶祖從之生平見義必爲持躬清白一時當道稱其不愧名賢之後王元翰字蓋林臨高人乾隆己卯副榜爲人謹厚敦善行姪媳某氏孀居爲之立嗣分已田以贍之成其節家被竊賊曰此王老物也私負其物以還元翰慰勸之賊愧悔爲良民凡修廢舉墜悉捐囊爲之倡

吳福字綏之瓊山人賦性敦厚門以內無遺憾尤好善樂施建宗祠置義田立社學凡力能任者無他諉族有盲女二各給奩金三百兩爲之嫁子位和博羅學博孫典翰林院編修 贈如孫官卒年八十一人以爲盛德之報云

王必聖字愚若瓊山人庠生質淳厚母周氏嚴肅有不悅輒長跪承歡生平簡默自守望之令人生畏鄉人稱爲忠誠長者尤嫻於詩有萍逢偶帙遺稿

林嘉模瓊山人年十一有盜劫其家擒傷其父嘉模追里許攀樹巔大聲呼救鄉人出援

之父得無恙鳴之官盜伏誅居恆恂謹自持至老無非議之者

俱肅志

莫燦錦字綱心定安人順治間拔貢少以孝友聞爲人深沈慷慨鄉黨有不平得其片言立解邑素苦役累錦創議均徭鄉人至今德之值歲饑施米賑粟全活甚夥恤孤貧修

橋路尤究心儀禮里中吉凶諸事必躬爲指示人服其訓

縣志

王懋曾字沂元定安歲貢生明尙書宏誨曾孫少遭兵燹孤苦流離卒能復其先緒爲人雍容儒雅工吟咏力行善事創宗祠置祭產修橋渡不惜重資

同上

謝瓊猷澄邁人康熙二十年父元明被賊楊二等傷其首血流肌腐瓊猷以口吮之竭力調護得活兄歿撫猶子如已出置產業令子與二姪均分當寇亂時族人逃散瓊猷獨身當大役寇平招族還鄉衆咸德之

縣志

王時炯字晉予樂會人康熙庚午鄉薦爲定襄令秉性孝友服官廉明惟恐速謗以貽親憂勤撫字緩催科食其德者比之召杜涖任九載行取入爲主事士民建生祠立碑以

誌遺愛

樂會志

程鵬字雲際定安人康熙癸酉鄉薦家貧好學淹貫經史天性純篤所獲修脯悉以奉親

贈弟父沒後奉母命唯謹族人貧不能就傳者極意教養與諸弟友愛尤篤季弟鶴亦博學能文家居城市足不履公庭有司咸高其節地方要務多造廬商榷學使陳惠華表其門曰瓊南端士

縣志

林湖仁字帶五文昌人乾隆丙辰舉人少孤貧力學通大義性情冲澹與物無忤嘗被辱於市不與校其人自悔踵門謝罪卒爲感化遭兄喪或勸應試湖曰功名所以顯親苟忘吾兄何以功名爲竟不試嘗主本邑講席教人以品行器識爲先沈邑宰彰不時過訪語不及私宰甚器之

莫紘號紫峯定安人充澄邁恩貢跬步謹飭辭氣溫和平鄉黨有不協者得一言無不帖服乾隆辛酉偕貧友吳正栗赴秋闈試畢歸途病劇紘爲奉湯藥調護至家乃死壬辰大水村中廬舍漂沒紘煮粥賑之活者甚衆修家睦宗族性恬淡不樂仕進惟以讀書積善爲事年八十四卒以子景瑞任知府贈如其官

曾允俊陵水增貢生天性純厚一門雍穆文章品節士林所宗輕財好義捐建祠宇乾隆元年舉孝廉方正給六品秩卒年六十有八子書拔貢官開建教諭亦以學行稱

阮通志

林士正文昌人五歲失怙恃教養依於母舅性敏悟弱冠入儋州學累薦不第家益窘辛
羹諸粥或併日而食仍手不釋卷不自知其窶也居室湫隘誦讀每在叢竹下問字質
疑者多攜榼裹餼就竹間士正或以蔬食菜根餉客談坐竟日陶然也士林以安貧好
學稱之探訪冊

邢璣文昌人歲貢生風範端凝居心敦厚有從姪自市夜歸受傷卒於道姪屬含冤鳴官
久不獲犯擾累無辜璣力勸其家呈縣銷案鄰里德之偶途中遇盜詰之盜曰爲窘迫
耳璣諭以大義且助之貲盜感泣竟化爲良邑令伍重其學行延主義學講席髦士多
出其門同上

覃瑋猷本姓王字振素會同人充樂會歲貢任普寧訓導秉性和厚立品端方嘗捐己貲
以建宗祠族中子女無依者爲撫養婚嫁墳墓無嗣者爲修築掃祭乞休歸囊無長物
年八十而終

楊景山字仰齋萬州人弱冠登乾隆辛酉賢書癸未成進士出宰崇義誘獎士類軫恤民
艱解組歸士民餞送三十餘里生平不治產業惟以詩書課子孫至老手不釋卷嘗修

學舍建書院事關名教必汲汲爲之卒年七十三

韋之瑗號遽伍樂會人由拔貢領乾隆甲子順天鄉薦授稷山令建思文書院擢知寧州
又建泥陽書院多士德之遷洮州撫番同知值回部謀逆督率番民防備周密人賴以
安

王元侯字承弼澄邁人乾隆癸酉鄉薦見聞賅洽淡薄自甘由保昌教諭擢陝西洋縣令
豁除雜稅士民咸悅去任日闔邑紳民泣送數十里

莫景瑞字輯五紘長子少工文詞書法弱冠選拔乾隆甲午登賢書以教習期滿出宰慶
元廉潔自愛擢知趙州屢以捕盜功改順天東路同知遷大名知府攝巡道事嘉慶癸
酉以滑縣教匪滋事望吏議落職杜門不出以清白世其家年七十九卒

莫景環字象五定安人景瑞弟孝友持躬詩文清逸以優貢生任潮陽訓導春風和氣待
士甚厚潮俗械鬪當事每令景環下鄉勸諭多有解散者未滿任致仕歸家居創建義
田族黨事咸待部署論事和顏易色而聞者悅服年七十事老兄嚴肅如父里黨重之

俱同上

楊士鼎字龍文萬州人父名山歲貢督修學校造仙河石橋士鼎由拔貢舉乾隆庚子鄉薦歷香山三水教諭調欽州學正遷潮州府教授多士景從成就者衆重修萬安書院建文昌魁星樓卒年七十有六

陳琮字達權瓊山人敏悟好學爲文有理致九赴秋闈屢蹶愈厲乾隆丙午魁鄉薦丁未聯捷進士選授陝西淳化縣知縣邑故瘠瘠習尙樸野與民安之以不獲上官意罷歸吳瑾字懷齋瓊山庠生居心平易處事精明援例授陝西潼關廳同知時西陲用兵軍事旁午境當衝要瑾奉委司糧運前官多派役民夫或苛斂富室悉爲革除不擾民不虧帑每出家資以辦公陝民呼爲菩薩云

探訪冊

李賴予文昌人性抗直不詞色假人以信義重於鄉里由歲貢爲保昌訓導與諸生相勵敦品學既致仕囊無餘貲家徒四壁手織竹器爲生計陶然自得未嘗少屈挫居恒出入必布袍束冠肅如也年九十餘卒

黃能振號存愚文昌人以明經授四會訓導口不言財於門下士多所成全任滿致仕歸足迹不到公門爲人寬厚退讓寡言笑和粹之氣達於面目橫逆之來受之不報自奉

極約有公舉如建學宮修祖祠及俵助貧困必竭力不悛教人含容異順生徒日聚其門邑人僉稱盛德云

王德馨號惺齋文昌歲貢年弱冠以文行爲邑令衛希駿所器研究六籍尤深於詩文詞蘊藉爲人厚重深沈練達時務不爲無用之學里中事無鉅細必質之馨部署悉當然不自炫露足不登長吏庭族中自宗祠塋墓譜牒咸修理置祭產贍乏勸學皆賴焉學者稱惺齋先生

曾日景字介昕陵水人允俊孫貌魁梧奇偉能文工書法由拔貢領乾隆戊子順天鄉薦充教習期滿授直隸保定知縣捐修學校置新鎮書院膏火愛民養士以母老乞養歸服闋還任歷署通州霸州卒於任生平樂善有爲如修學校纂邑志建宗祠輯家乘皆竭力成之

雲崇維字道樞文昌增生貌清臞若不勝衣事親能愛敬待諸弟和藹中恒相切劘家素貧恬然安之吉凶酬酢敦崇古禮俗多淫祠歲時迎神賽會男女雜遯失業耗財維與諸弟取神像火之衆大譁或怵以禍不動自是邪氛漸息當道以詩文獎之邑族公事

必推肩任或有牴牾爲排解嚴訓子弟惟以禮義清白是勵大吏舉孝廉方正辭不就
著有除邪編並儀禮雜著等書卒年八十二四弟崇緒字道昌凝重如其兄而圭角渾
然安貧守約人稱二難

石含章感恩歲貢素行端正居鄉能排難解紛嘗稟請當路勦除賊匪陳有振等不惜捐
資不憚勞苦爲地方鋤暴安良故鄉里欽服

林開侯感恩人廩貢官訓導歷署茂名石城電白教諭栽培士類所至不肯妄受一錢家
居時嘗捐四百餘金倡修學宮又造六甲冲橋渡修臨高田官道人稱好義

林桂瓊山人乾隆己酉拔貢善文詞書法歷任吳川從化花縣學博爲人坦率瀟灑兄秀
亦有聲庠序

李恒暢字茂春澄邁庠生好學敦行少失怙事母孝其兄負債以己田償之建宗祠修橋
道族叔樹元孤貧失學恒暢極力周助使就外傳卒以成名後叔以選拔歷任仁化教
諭欽州學正清鎮知縣恒暢有力焉道光元年以叔之子恒謙官 貤贈宣德郎

陳玉書字麟徵昌化歲貢少孤貧力學尤敦實行任長寧訓導廉介自持訓諸生必舉古

人成憲以示之年七十八卒於家

林開溥文昌人性勁特自十四五時即能擇師友銳志學古人見善必為絕惡必力事親甚孝謹善居喪與諸昆友愛無間言為文深警直造古人堂奧辛卯鄉試卷既薦主司賞其清挺拔俗竟見遺溥益厚刻厲不少懈年三十二夢與人觴詠曰君愛梅花吾愛酒與君談笑過西湖竟以是年卒士林惜之

俱同上

人物志八 卓行 宋 明 國朝

宋

吳必大萬寧人號碧溪力學篤行嘗有商人失鈔一束於江邊顧而不拾待遺者歸指還

之時稱卓行云戴通志

明

唐英瓊山人舟之父博通經史百家之學嘗築義學教鄉子弟十餘載不計束修人號其

居曰東善外戚有馮姓者立券假白金五十市馬入驛後負債英焚券不較歲饑甘饘

粥盡所有以賑饑者後生子舟為監察御史牛志

梁偉澄邁人仁之弟好施與族有孤貧者嘗買田周給使至成立河中有漂流死屍施棺

捨地權葬鄉里貧窮值歲凶歉則施與稻穀至老積善不倦暇日則詩書自娛享年八

十牛志

鄧文善樂會人好施予遇暴露屍即掩之有本縣知縣周泰者始至任卒其子幼不能與

櫬歸文善為葬於己祖塋側築室處其母子送就學後子仕興府典膳牛志

邵銓字君衡崖州人宏治乙丑待試南省有昌化人時姓者寓京告囊罄銓憫之而不能濟乃介時詣同試生假白金數十兩約抵家償之後時竟負約銓慨然傾已貲以償全

無難色同上

楊秀瓊山人女為車傭唐佐牛逸輾死官擬依律罰佐鬻牛及女以償秀聞哀之曰吾獨

一女不能攜養我罪也安用罰金竟不受賈志

蒙端字德範瓊山庠生素有行義辛未三月海寇犯村挈家奔散有余達者其妻持包袱

裹銀肆拾兩及餘物忽忽失之端後至得之數日知失主姓氏當官完繳疑獄盡釋分

金酬之端力辭不受其居家以禮孝友無間云海忠介集府縣扁其門曰喻義牛志

陳宗昱瓊山人樂善好施諸伯仲賈而遊者率倚辦資斧宗人無凍餒者或以不能葬不

能娶告即周給之營代從子償逋初不令知之蓋富而好行其德者家有海艘取魚網

得番貨悉令輸之官人服其識郝通志

吳宥字原之瓊山人性資醇謹少孤哀慕終身事孀母怡色就養寢膳必躬親家素窘處

之晏如隣人侵所居地慨然讓之或詰之則曰子孫若能安守縱地窄而心亦寬里中

高其行誼卒年八十有一賈志

吳涵瓊山人郡庠生行己端方取予不苟有同廂陳可英借彭某銀七十兩貧乏不能償

彭訟之官英窘將自經涵知之盡數代償有友調塘都陳閻往任省親密寄銀一百兩

舉家不知也後閻暴卒涵持原銀還其家函封未啓阮通志

唐惇瓊山人少遊郡學仗義好施富而循禮嘗道拾遺金召原主還之棺葬枯骨米給孤

貧府縣旌爲義士同上

許富字世謙瓊山人少孤撫於伯氏性端慤無妄言遽色伯卒歲時必列考共祀妻母蘇

氏同居三十年事之如母隣人有竊入其後園伐樹者富見之却回謂家人曰吾恐其

驚墜也終不問其人牛志

梁廷棟瓊山人性簡靜素樸平生無疾言遽色家徒四壁處之晏如盧虎人吳基偶中衢

失貨兒贖銀金三兩縣志作失去贖兒金三兩棟拾得其人尋覓返而還之有時鄉人構訟亦力勸和

解衆服其義

林兆一字啟誠文昌人邑庠生秉性嚴而與人謙和幼服庭訓惟謹異母兄弟四人怡怡

如也與張還虛為道學交見義必為如修宗祠葺書院皆自捐貲竭力成之人服其篤

信俱同上

程國光字用賓定安人由會同歲貢授六安州吏目以廉能稱敦孝尚義與人和易曾於

邸舍中拾遺金百餘守待其人歸之世稱長者年八十卒子一林以歲貢司訓雷州勤

課恤士諸生德之所著有尚友錄定安志

王暹字慶源樂會人歲貢事母吳氏以孝稱崇禎中郡守南有臺核實以聞旌舉存廉為

人德性溫雅嗜學篤行與伯氏遵友恭無閒言族中賴以養育者甚眾晚置別業題曰

來青環蒔花藥以自娛尤好善樂施嘗捐修邑西文登石橋十餘丈石路二里許並會

同山竹樹石橋定安黃竹營石路此為郡東諸州縣孔道至今行旅稱便樂會志

廖元勳字欽若文昌人邑庠生秉性剛直不阿時賀沚為邑令與林有鸚有鳴兄弟創建

玉陽書院遇有公事義形於色雪鍾吳氏枉死之冤全清瀾華氏之墓周旋友人姚生

之貢又議設通縣夫額省每歲差役之擾以義倉羨餘銀置田贍科舉費皆見施行壽

九十餘歲而終文昌志

曾廷策字伯射號層城儋州人弱冠遊泮負笈從師發邱文莊公藏書肆力於學名人奇士虛左遜之敬事二親喪祭必循於禮友愛兩弟課之甚嚴父歿後不忍與弟折箸同爨終身屢蹶秋闈僅與兩弟後先同貢賈志子開別有傳

國朝

陳開潢瓊山人由拔貢中乾隆壬申鄉試工詩文尤篤於行幼聘王氏女為室後女病廢外氏以婿業成名請退婚開潢惻然曰此女不我歸將無所歸矣急娶之鄉評以為難

蕭志

符開交字采璧瓊山人姓淳厚兄歿撫姪如己子祖業悉歸之不為己有檢貧者借券焚諸火與廣州客某交易遺金五十兩越年客至舉還之客感泣而去

高裔昌瓊山人家素貧嘗路拾遺金二十兩坐守至晚失金者踉蹌四覓驗實付還絲毫
不取卒年七十有五

蔣桂芳瓊山人樂於義舉康熙年間城北天寧寺等處多寄遠年無主棺骸桂芳一一安厝埋葬嗣以獨力難支集同志十八人捐貲施濟卒年七十有四俱蕭志

雲志高字載青文昌人少失怙七歲遭亂與母相失渡海而北稍長服買獲奇贏喜濟人急踵門求助者無虛日會計之餘涉獵琴書輾轉三十餘年始歸母幸無恙在家建祖祠修譜牒學宮義學皆力任之所居雲莊渡築石爲承先橋費數千金志高以一人集事羊城育嬰堂諸公舉捐貲皆以千計著有家譜並蓼懷堂琴譜諸書傳於家

陳尙鏐號素菴崖州人拔貢生平手不釋卷尤喜誨人歲饑嘗煮粥以賑貧士婚喪難舉

者助之有廣客向尙鏐孫買沈香值五十餘金尙鏐知之遣家人追及於二十里外還

其值蓋香中多夾朽木孫既誤買不欲轉誤他人客感謝而去其長厚如此州志

鄭之玢澄邁庠生尙義好施康熙六十一年捐資在那留坡築堤開溝引水灌溉遂成二

熟腹田計數百頃鄉人至今德之縣志

黃大璋澄邁人增貢生勤學勵行歲饑施糜以賑有貧不能婚者助使聘娶捐建學舍修

橋梁開水利施棺掩骼皆無吝色同上

符高位字謙以文昌增廣生仗義好施鄰人鄭某將田宅售於位父未幾鄭家產蕩然婦

子無依位焚券還之偶適陵水途遇老嫗攜幼孩泣行詢之嫗曰夫亡子歿鬻孫償債

耳位出貲如數給之。嫗泣拜請姓名不告。嫗他詢始悉。迄後嫗孫生子成立。與位之孫院試郡城。相遇偶詢及之。感念前恩。偕至位家。哭奠於墓。里人始聞其事。學使並紳士均有額旌其高義。探訪冊

黃翔雁瓊山監生。勇於爲善。乾隆乙卯淫雨河溢。有玉夏馬坡二村水暴漲。翔雁自操巨舟拯溺者。晝夜不倦。全活甚衆。

吳玠字文侯。號質齋。孝行位和。季子恩貢生。嘗奉父命。囊千金往雷州市穀。以救荒米價。遂平。修舉廢墜。體恤貧乏。平生慷慨樂善。施藥餌。瘞暴骸。又捐白金五千爲瓊山士子鄉會試賓興之費。邑人德之。卒年七十。俱同上

人物志九 隱逸

宋 明 國朝

宋

黎子雲儋州人居城東二里許昆仲貧而好學所居林木水竹清幽瀟灑學士蘇軾雅敬禮之嘗至其舍子雲每與弟載酒過從請益問奇日相親炙東坡詩寂寞兩黎生食菜真臞儒又元柳貫詩四黎善善君子類有欲辟舉者固辭優游田里率鄉人子弟以孝弟忠信人多化之壽八十餘

牛志

符林儋州人東坡重其安貧守靜謂之老符秀才嘗過訪有詩序云海南人不作寒食而以上已日上塚手攜一瓢酒尋諸生皆出矣獨老符秀才在因與飲至醉詩云老鴉銜肉紙飛灰萬里家山安在哉蒼耳林中太白過鹿門山下德公回管寧投老終歸去王式當年本不來記取城南上已日木棉花落刺桐開

同上

杜介之郡士也爲高州司法真純野逸有隱士之風李參政光有詩贈之云南極多老人及見九代孫君生古崖州氣質清且溫今年八十一頗覺行步奔白鬚映紅頰疑是羲

皇人
阮通志

唐文嚴字克寬瓊山人任迪功郎宋末隱德不仕建一亭名曰松軒日遊覽其中留意經史景炎間翰林學士陳士徽薇省郎謝少敏抵瓊臨訪合歡終日改其軒曰廣蔭有詩相倡和云

黃通志

明

王懋字季成瓊山人惠之弟敦行善詩尤精於醫濟人不責其報有薦之者辭以才矩終身晦迹年八十餘

戴通志

王宏字孟遠號蟄庵瓊山人少孤力學工詩文以節母韓氏年老不仕開鄉塾訓子弟數十年正統間大參龔遂都闔王清及致仕御史唐舟輩遊靈山賦詩宏以布衣與列時人高之邱濬誌鄜俊墓有云吾離家十八年城中諸老彫謝殆盡唯王孟遠鄜廷輔兩先生在歸然靈光之在魯也

牛志

著有蟄庵集今不存

蕭志

王守敬臨高人資質純厚好學多聞動循規矩里人無間言參政詹冕甚敬重之正統間郡邑嘗欲辟舉固辭優遊田里率鄉人子弟以孝弟忠信之行人多化之

戴通志

趙璟字伯輝武衛胄子安貧樂道環堵蕭然吟哦不輟嘗與薛尙書繼遠邱學士濬友善

時接談笑每傷其妻父王霜筠家多書籍而後無能讀者因收藏寶蓄用資諸人以故

薛邱二公多得觀覽皆以學識爲海南名賢環有助焉

賈志

黎瓊字去瑕瓊山人博通五經有聲庠序將領貢悒悒不樂遂棄舉子業製隱居服足不入城市以讀書自娛有咏大學兩關詩曰人於險處皆能越抵死不來打此過有箇真能打過去試看光景竟如何門生梁維贈詩有云道心正直殊時俗老屋傾欹有古風一種鬢毛春雪白五車經史夜燈紅蓋實錄也有司請爲鄉飲正賓不就年八十餘卒

牛志

王用之字有行瓊山人幼通經史晚敦禮節屏棄塵囂日以詩釣愉志

蕭志

王濬臨高人隱居不仕所著有儒林一覽集邱文莊甚服其博

蕭志

吳濬澄邁人早登黌序不樂仕進肥遯自娛退隱於山谷中好接賓容遠近名士多攜琴載酒相訪名其居曰雲谷並作出谷迎賓圖殷彥中爲請序於邱文莊張汝弼有七言

古風題咏

澄邁志

莫盈字禮謙宣寶五世孫少補邑庠勵志舉業博通經史晚志不遂日以詩酒自娛口不

談非禮之言行不爲非義之事訓誨族中子弟一若己子不受修贄屢舉鄉賓年踰八

十

定安草志

吳覺瓊山人誠之子以歲貢任靈山訓導性篤孝友學贍詩文有安貧樂道之致郡守吳

尙友匾其廬曰世德清風年八十二卒

牛志

王振瓊山人元千戶助四世孫博涉經史徵辟不就壽八十一

同上

陳文賓瓊山人謙恭簡素鄉居足不履城市好施與有喪不能舉者助之子極舉於鄉

牛志

曾沂澄邁人儒雅宏博號幽求子當道給冠帶詩章不受所著詩有寵錫也知章服重邀

遊自覺野衣輕之句

同上

黃叔巖定安人其先黃巖人父寓定安因家焉叔巖自少端慤無妄舉動凡事執禮有古

人風屢次辟舉固辭不就壽七十五

蕭志

梁必強瓊山人萬歷甲戌進士任晉江知縣恬退歸休設館造士著有滄浪集

牛志

李伯林定安人安貧守分不求聞達嘗取古書誦之有所得則拍案曰人生貴自適耳何

湏以軒冕爲桎梏耶門前有巨榕蔭數畝恆暢飲其下鄉里耆碩每過必挽之偕醉海

瑞王宏誨慕其高隱時造廬相訪至則蔬食豆羹盤旋累日二公益重其操

定安縣志

雲名山號靜野文昌人穎悟好學以貢爲西寧新興訓導歸築月浦新居闢霞洞石室以資吟咏年九十餘猶手不釋卷嘗得瓊山唐博士秘法祈禱立應弟名元亦耽味道書年三十六卽棄青衿偕隱邑令賀泚表其隱德學使者給以冠帶不受兄弟具至上壽

郝通志

雲朝漢字倬我文昌人膺歲薦不仕居平與人無忤教授生徒邑髦士多出其門

賈志

林希高字廷遷文昌邑庠剛方有守以養親不求仕進棄舉子業擇雅淡同志者七人爲七逸友咏歌自適屢舉鄉賓不就

同上

國朝

洪其仁字天如瓊山人生平坦逸瀟洒工行楷篆隸尤長於圖繪年七十餘構一竹莊咏

歌自樂

賈志

雲士文字而章號默菴文昌人秉性醇厚端方自持耽古書淡世味人以爲三代遺直

蕭志

鄭如琨字美玉瓊山廩生篤志詩書雅善歌咏早年恬退不屑膺貢優游林泉欣然有自

得之趣年八十餘卒

探訪冊

人物志十耆舊 旌壽附

宋

黎伯亨崖州人盧多遜嘗稱為幽人處士牛志

黎威

黎徽

黎先覺皆黎子雲兄弟蘇東坡在儋耳有被酒獨行徧至子雲威徽先覺四黎之舍詩見藝

文葛方立詩四黎善善君子類是也牛志○黎子雲傳及藝文俱作柳貫詩此刻葛方立待考

黃中

羊萊皆年九十餘郡以名聞並授初品官輿地紀勝

元

裴預字時敏號守素居士崖州人瑞之孫天歷間王仕熙與之友善有贈詩二首同上

陳舜道瓊山人初屯田府萬千百戶俱用土人民甚苦之既革罷子孫猶有營充長官者

舜道建言革之賈志

沈公賜瓊山人撰呂統德教碑上同

明

陳尚瓊山人豪邁負氣貫通文藝蕭志

唐乾興瓊山人諷方子安禮守節善六書學

陳捷瓊山人父能服儒慕義助修郡學天順初捷偕進士莊敬纂修郡志時名隱君子

符信昌瓊山人持行端方著有自修集上同

王恭瓊山人睿之堂姪安靜喜詩牛志

王纘瓊山人睿子所居有清溪釣磯詳樓閣下蕭志

周鼎瓊山人昇之兄讀書持敬兼通醫術上同

唐瑜瓊山人詳樓閣竹軒下子亦飴敦雅賈志

曾學確瓊山人修癸巳志

馮源瓊山人海之兄博通經史犯而不校上同

李世隆號道亨瓊山人少事儒業長習岐黃生平淳謹未嘗疾言遽色五尺之童迎以善

氣醫不計貲素爲當塗推重卒年八十有五牛志

潘濟瓊山人敦篤睦鄰賈志

唐文枳瓊山人縝之孫孝友善詩

黃鈺瓊山人詳樓閣東臬下賈志隱居東臬李東陽贈以詩蕭志

林養英博雅篤行校修郡志賈志

林遂澄邁人善書喜吟公門不苟入牛志

柯沿臨高人性行純樸好善不倦鄉人有鬪訟者悲泣勸諭人皆從之生於元至元甲午

卒於明永樂癸巳年一百二十歲同上

王政臨高人隱居力耕詩書訓子弟與物無競蕭志

韓真祐文昌人輕財好義重建文昌學明倫堂子昇孫繼芳能世其德賈志

韓昇文昌人真祐子有德義言恐傷人行不越禮一切世味視之漠然橫逆之加受之而

已

林璋文昌人從邢貴學德義著聞鄉里重之俱同上

林用功文昌人年九十一長子世壽年九十三次世奮世偉世隆各八十一季子世儁七

十八孝友仁壽藹然一門蕭志

黎方升會同人孝廉嗣盤之祖父醇厚義方善處鄉黨授冠帶賈志

王昌允會同人積德修善周急焚券授冠帶

王璣樂會人謙恭忠信輕利好施老而不替

馮宗崖州人訓導光之父以州吏護州及寧遠縣印躬統民兵防禦倭寇境賴以安俱同上

李剛萬州人性好善捐白金百八十兩助遷州學蕭志

王文字煥章萬州人篤學不售志益堅以名義自持以耕讀教子孫當時士大夫高之造

盧訪焉同上棄舉業教子弟痛絕異端與物無忤賈志

馬仕彪瓊山人能詩設館訓誨武弁多出其門牛志

夏忠瓊山人訓導欽之父賈志

金貴瓊山人大學士邱濬之外父

王鵬舉瓊山人通醫術

曾義瓊山人有篤行

楊琦瓊山人有高行大司馬薛遠之外父

馬順瓊山人自姑蘇謫戍善詩

李忠瓊山人有操行同上

高節瓊山人有士夫氣象牛志

傅伯安瓊山人自寧波謫戍號梅軒版築翁賈志

李芳瓊山人舉人明之伯父善詩

薛善瓊山人遠之兄通醫

邵敏崖州人賢之子習道學

江洋崖州人與邵敏同時亦文雅俱同上

國朝

陳鳴珮字肖中瓊山人郡庠生器宇端重年八十舉介賓蕭志

張有旌字惟孝瓊山人孝友端方壽九十餘

徐頤字慎之瓊山人幼敦孝友精於醫業郡舉者賓

陳之濬字爾淵瓊山人儒雅捐介年九十一舉者賓

黃廷輔字用襄瓊山人郡庠生性謙厚精醫學舉介賓

李長春字景元瓊山人性坦易年八十餘郡舉者賓

唐有慶字章可瓊山人性尚敦睦年七十餘舉者賓

陳祥字毓涯瓊山人性朴誠壽九十餘日課子孫舉者賓以上八人賈志俱作明朝人

陳宋第瓊山庠生守貧舌耕手不釋卷年九十康熙十一年 詔賜米肉綿絹道府有清

朝人瑞旌匾牛志

王豪瓊山人仁厚坦易年九十五嬰鑠不衰康熙十一年 詔賜米肉綿絹道府旌匾

紀公崖州人其名不傳年百有八歲牽牛力穡感恩知縣金英遇於田間歎為無懷葛天

之遺贈以詩俱同上

李志賢字巨峯瓊山人孝友能詩年八十三闔邑公舉者德子瓊枝澄邁學生員孫炳文

恩貢生賈志

周師成會同人好義急公守身約法友愛諸弟教訓有成知府賈棠給以善行可風匾

蕭志

陳德齊文昌人年一百一十八歲無疾而終官給百歲餘秋匾表其門

陳仲九文昌人年一百一十三歲妻黃氏一百零七歲齊眉難老古來所稀

王寶鍾瓊山人有隱德年八十一妻吳氏一百零三耳目聰明能步履子四人皆龐眉皓髮當路給綿帛優之

謝又新瓊山庠生少失怙家貧舌耕養母能得其歡心生平醇樸不欺篤志好學年八十一手不釋卷子寶成進士

吳田慶瓊山人生平謙恭簡樸與世無忤壽八十有五

吳義宗瓊山人椽吏樂善好施嘗捐築道耨橋造寶蔭社學爲鄉中子弟肄業

張健鬪瓊山人性嗜學恂恂隱約不愧儒風士論高之壽八十有三

周振瓊山人有至性爲人謹厚謙恭素爲里黨後進典型壽八十

紀廷壽瓊山人爲人謹厚督修官路八十餘里所居圖中廢市稅貽累力請豁之壽八十有四

潘爾倬號天章文昌入增生醇謹謙睦足跡不入公門學使嘗獎優行年八十二俱同上

吳宗美文昌人年一百一十三歲 國初土寇擾攘宗美有謀畧鄉里多賴保全知縣何

斌表其門探訪冊

蔡振瑚文昌人慷慨有智勇當鼎革時土寇蜂亂振瑚出力集衆捍禦一方晏然壽九十

五同上

林顯名瓊山人敦龐謹厚守分力田雍正六年賜八品冠帶瓊山志

黎士標瓊山人世業岐黃能以其術濟人不計酬金人多德之壽九十一

張步武瓊山人明孝子可載裔孫謹樸醇雅不與閒事闔邑仰其端方壽八十六

陳友仁瓊山人性友愛撫異母弟友信延師訓誨得膺歲薦鄉黨稱之壽八十一賜米俱同上

吳文明澄邁人年高德劭值歲饑捐貲賑濟壽近百齡知縣馬煇贈以額澄邁志

鍾懋澄邁人少業儒晚絕跡塵囂屢舉鄉賓不就壽八十而終同上

張基偉字厚齋定安庠生敦篤持躬友愛諸弟平生不出一欺人語不作一虧心事鄉里

矜式教子義方壽八十二以子岳崧官 誥贈通奉大夫湖北布政使司布政使探訪冊

陳忠字文昌人性好善嘗爲鄉人排難解紛遇有投水者身已沉溺忠字親爲援救竟獲全活壽一百有二賜冠帶

林其菁文昌人七歲喪父家貧未葬母每過殯所必泣與妻盡鬻奩具營葬後夫妻俱壽逾九十

邢有哲文昌人年九十樂善好施嘗收瘞暴骸鄉人稱之

林其秀文昌人年八十一嘗捐銀二百兩置義田并捐己地以建祖祠俱同上

黎邦憲會同人嚴恪持已閒雅接人老成典型以邑庠給冠帶會同志

黃揚名會同人忠誠醇篤教子義方知縣馬谷嘉其行優禮正賓賜額獎之上

王時焯樂會人嘗置田以奉先祀捐貲代完兄糧援例縣丞壽九十四樂會志

黎楷樂會人監生嘗捐社穀百石又戮南門青塘大路以便行人鄉人勒碑紀其事壽八

十八

覃玉儲樂會附生性敦厚和鄰睦族壽九十四

張瓊位樂會附生敦和樸實壽九十二

韋昌烈樂會人慎重老成壽九十六

王世栗樂會人居心公正好義樂施壽九十九

嚴欽南樂會人忠誠好義捐修挑牛路以便行人壽八十五俱同上

楊秀春會同武庠生年逾八十猶善騎射嘉慶庚午武鄉試馬步技勇合式督撫奏給正

七品秩並准與鷹揚宴會同志

鍾熙朝萬州廩生耽古書淡世味見義必為嘗出貲築砌和樂墟石路以便行人壽八十

餘萬州志

文爾珍萬州庠生壽一百七歲同上

王良蘊陵水庠生惇信誠樸善處族鄰年九十八精神矍鑠陵水志

旌壽附

林天桂臨高人妻王氏年一百三歲乾隆三年 旌阮通志

王寶鍾見耆舊妻吳氏年一百五歲乾隆十四年 旌

蔡子何瓊山人妻莫氏年一百三歲乾隆十九年 旌

高涵瓊山人妻莫氏年一百二歲乾隆四十一年 旌

彭某臨高人妻吳氏年一百二歲嘉慶十一年 旌

林某文昌人妻馮氏年一百一歲五世同堂嘉慶十二年 旌

陳訓琮山人妻吳氏年八十七歲五世同堂嘉慶十三年 旌

林家達文昌人妻馮氏年一百歲嘉慶十四年 旌

吳元輔文昌人年一百六歲嘉慶十八年 旌

葉聲祝探訪冊作華聲祝文昌人年一百四歲嘉慶二十一年 旌上俱同

王紹位文昌人年一百二歲道光十三年 旌探訪冊

王雲魁瓊山人年一百歲道光二十年請 旌同上

王某澄邁人年百歲建百歲坊於新安都

...

...

...

...

...

...

...

...

...

...

...

...

...

瓊州府志卷之三十六下

人物志十一 方伎 明 國朝

明

王懋字季成惠之弟洪武間由合肥來籍於瓊精醫術治人不責報鄉里咸重之

參瓊山志及舊志

周鼎瓊山人博通醫書尤精王叔和脉訣成化乙未同知馬叔文按治抵定安病危迎鼎

至診之曰食冷物耳叔文連首肯曰先生固有見耶本在萬州噉鹿血過多士醫誤以

胃瘴治之以至於此始服藥而愈

肅志

王鵬舉瓊山人醫名著一時馬璿梁端皆名醫並出其門

薛善瓊山人精醫治療無不愈

陳文徽字允諧瓊山人善墨竹而秘其名凡見其墨竹者皆知好之不知為何人所作

沙洪字文遠瓊山人從吳騎學豁達坦易善書大字尤遒勁名聞遠近辭章亦足自達子

廷梧汀衛經歷楷書有乃父風

鄭海瓊山人傑之姪書法獨步一時點畫生動不苟凡碑碣大書多出其手

吳宸瓊山人初遊邑庠善書為涂副使裴作義學書院大字僉事何漢中見而深愛之

王敞瓊山人善畫馬及花卉翎毛而繪像尤妙遊南畿有武弁眇一目者求圖其形敞為

一曰審矢狀以匿其短人服其機警

傅佐字秉忠瓊山人善小楷邱文莊著大學衍義補進呈稿及家禮儀節世史正綱學的

諸刊稿皆出其手

俱同上

徐美猜醫術有節婦耿氏聞夫溺死遽閉門自經未幾夫歸而耿氣已絕美聞哭聲入視

心尚微溫依法治之良久遂甦

郭守誨文昌人精醫術活人甚衆

文昌志

林富華陵水人平生詠諧樂善以醫濟人所治無不效里鄰乏藥資者富華捐施之素為

田司馬宏祚所推重稱為瘴鄉國手邑侯趙振鐸贈額云學究靈樞

陵水志

國朝

王賓臣字敬而瓊山廩生康熙庚辰

通志作庚申

七月赴高州考貢值大早有司求禱不應賓

臣言求雨必得奇門真傳，異其言聞之，有司敦請之，披髮仗劍立壇上，以目視日，竟日不下，睫已而果雨。觀者稱其術之神。賓臣曰：雨未足，當再禱。之明日，烈日如故。曰：此却數也。奈何？有司士民懇之不已，乃至發祥寺登浮圖四級，上下左右悉以符篆封之。且曰：明午必大雨。但從東南來，可保無虞。若從西北，則吾命休矣。因作書與家人訣。次日未刻，烈日中忽狂風大作，霹靂環繞滂沱，如注。有老人見大鷹口含火丸，旋塔左右，勢甚可怖。須臾，天氣晴明，意為無事。及仰視，賓臣已僵立於轟震中矣。州人以賓臣為百姓死立廟祀焉。有禱輒應。督學陳公為文祭之。蕭志

梁師授字傳心，瓊山歲貢生。自幼讀書，潛心思索，以身多病，因業岐黃，尤精王叔和脈法。病者踵至，戶外常滿。師授診之，安危立判。嘗醫其婿病，歸謂家人曰：今者無恙。明年將復發，不可救也。既而果然。人皆神之。壽八十五歲。探訪冊

廖相武，瓊山庠生，善書馬，而不肯輕以與人。得其片紙寸幅者，珍如拱璧。蒙定字瓊山人，以寫生名。其家有傳神阿堵之妙，時稱廖蒙雙璧。俱同上

人物志十一 仙釋 宋 元 明 國朝

宋

雞窠小兒瓊山人太平興國中李員

通志作李守忠

為承旨奉使至瓊逢一翁自稱楊避舉

通志作霞舉

年八十矣邀員造其家見其父叔皆年一百一二十

通志作父叔連年一百二十二

祖宋卿年一百九十

五梁上雞窠中有小兒出頭下視宋卿曰此吾九代祖也不語不食不知其年朔望子

孫羅拜而已

舊志

劉遁瓊山道士也丁謂居洛治別業有仙遊亭仙遊洞嘗與遁往來遁作詩贈云屢向仙

遊亭上醉仙遊洞裏杳無人他時駕鶴遊滄海同看蓬萊島上春謂莫曉其意及南遷

遇遁於崖始悟為異人與之詩曰謫宦三年尚未回故人今日又重來莫道崖州一萬

里今朝須盡數千盃與泛舟共飲曰今日成子詩意矣

陳仁矯廣州南海人父玘寓瓊仁矯嘗夢為逍遙遊及寤每追思夢境不置忽八月望日

有仙數百從空招之仁矯即隨眾昇舉宋元祐中降於廣州進士黃洞家

王肱字君輔

輿地紀勝作公輔

家居儋城年百三歲猶童顏人呼為百歲王六翁世傳天文占星多

驗東坡一日往拜不遇書其壁曰軾來奉謁往莊未還樞密折彥質謫居亦與之厚一日沐浴整冠賀折曰夜來觀星象公當還內果會妙移郴州

交阯道士年九十九別號漫叟因渡海船壞結庵於萬州金仙水石上養一雞大如倒掛子日置枕邊啼即夢覺又養一獼猴小如蝦蟆以線繫几案間道士飯已即登几食其餘又有龜狀如錢置盒中時使出戲衣袖間僧惠洪見戲指其面曰公小人國中引道神也後莫知所之

白雲片鶴金明縣人爲道士自稱白雲片鶴宣和初遊汴見趙鼎大呼曰中興名相人驚異之他日又遇鼎曰吉陽相逢後鼎於紹興五年入相未幾竄吉陽軍忽與白雲相見白雲曰憶疇昔之言乎公將歸矣鼎果卒於崖俱同上

僧和靖臨高毗耶山人生宋靖康丙午少慕佛祝髮儻之松林嶺殮松飲露後往凌霄福地面壁六年淳熙丙午冬功成騰化錫命有南天白衣慈父之號鄉人陳道原通志作元以

蛻骨塑像結庵祀之時龍門村有葉牧童者時餽餽果亦蛻化所善符族兄弟五人及松林嶺婦常供花果卉服者俱解化去參黃氏通志

白玉蟾姓葛氏名長庚瓊山五原人年十二應童子試常於黎母山中遇仙人授以洞元
雷法養真於松林嶺長遊外方得翠虛陳尼丸之術時士夫欲以異科薦之弗就及翠
虛解化於臨漳玉蟾往來羅浮武彝龍虎天台金華九曲諸山又於九曲作止庵丹竈
尚存時或蓬頭跣足往來塵市或青巾野服浮沉人間人莫識也博洽儒書究晰禪理
出言成章善四體書法尤精於畫常遊西湖墮水中舟人驚救莫得明旦已在水上後
至臨江慧月寺之江月亭飲酣袖出詩與諸從遊因躍入江流中衆呼舟人援溺玉蟾
出水面搖手止之而沒人以為水解矣是月又見於融州老君洞嘉定中詔赴闕奏對
稱旨命館太乙宮一日不知所在所著有上清武彝指鉉玉隆海瓊問道文集六卷續
集二卷傳於世自贊云神府雷霆更瓊山白玉蟾本來眞面目水墨寫霜縑又曰千載
蓬頭跣足一生服氣餐霞笑指武夷山下白雲深處吾家

蕭志

林道玖臨高人幼好老莊長悟元機結茅屋棲跡呼召風雷立降雨澤嘗以履擲水中化
爲魚身常輕舉高數十丈又能豎旗劍於空中景炎二年蛻解鄉人以爲異名其居爲

崇眞堂刻像祀之曰妙道眞人

同上

元

僧月林澄邁人幼穎悟入山苦行修煉住持普明寺元文宗潛邸時賜金及楮幣甚夥未嘗私用留貯寺中年五十涅檠作偈曰昔不曾生今何曾滅月過長空清光皎潔趺坐而化焚時有五色舍利蕭志
僧無我俗姓林氏名龍瓊山人自少辭親出家穎慧過人妙悟禪理苦心修行建雷順塔於那廉橋後之廣州光孝寺坐化

僧佛功俗姓陳氏臨高人骨相資稟迥邁庸凡早年悟道雅慕達摩僧九年面壁之功至元戊寅常往西塘結茅隱居每以符水濟人有驗至正戊子春所居忽雲霧環擁坐化鄉人肖像立大海庵祀之俱同上

明

劉佛子臨高人幼好善壯不置室每春耕播種日即絕粒惟茹菜果秋成乃復食年四十餘至買耶村廣福堂修煉悟道嘗著屐攀椰樹至其巔倒首先下以劍指樹其實自墜人皆異之洪武庚申積薪坐焚里人築塔於堂之左藏其餘燼凡遇災旱禱之有應蕭志

周思仁字愛卿瓊山庠生自稱一岳山人精於易學常居書舍有異人敝服垢面就思仁乞食數來稍暱一日求宿館中思仁無難色夜分其人忽變形衣服珍麗召思仁謂曰吾仙人也感子相遇甚厚今有異術當授汝然未可以語仙道也因取樹葉作書示之云異日上天君湏記比年入室君自吉未濟始到坎離宮既濟乾坤爲侶終且戒之云吾去慎勿追言畢出門其行如飛思仁潛修其術能知休咎以符呪治人疾病卽愈或令人取雜物爲丸入口皆成香氣或以簪珥化爲蟲蛇蠕動如生大率類介象軒轅集云嘉靖丙辰來遊省城人爭求識之至壇衢市條有大蠶集人衣領衆乃散去歸瓊山一年而卒能逆知死期或謂思仁曾於族人郎中名世昭者得異書讀之遂盡其法然爲人謹愿非欲炫其術者年僅五十餘豈異人所謂未可語仙道耶

馮啟字尙高號海秋瓊山人馮仕俊孫少業儒弱冠有奇志通子史諸書尤精星數從仲父馮源遊宦北歷燕趙南涉閩越凡值佳山水輒登覽忘歸飄然有超世之思後遇謝道士傳役雷符法歸構靜室終日焚香端坐州邑有病狂顛或爲妖魅所乘者咸乞符祛救啟袖手屏氣揮毫作符以片紙付之未抵害病者已先駭愕及至焚飲其病卽愈

好鼓琴吟詩每召乩仙唱和終日句極清逸嘗預營樂邱於潭謝之濱有物如毬紅艷
流轉至坐室震聲如雷叟知必殆作詩偏辭諸親舊而卒年八十四啓壙納棺有叟新
履步跡在內衆咸驚異

海天孤鶴姓唐名秩瓊山人別號水竹司徒唐公胄次子也爲諸生時異人授以道書尤
精符篆會肅宗召方士秩至京遇旱禱雨立應時宮中有鼠妖諸術莫除秩用符水驅
之遂絕授官博士召入紫霄宮京師號爲仙師隆慶初放歸至淮安卒

俱同上

國朝

康熙三十五年五指山白日中雲鶴翔空香霧繚繞有一仙人升舉空中語山中人云我
三國時徐庶也修煉千餘年久今得冲舉汝輩可傳與世人知之

蕭志

僧無非文昌人少年削髮入華封寺爲僧靜默修道不與世爲緣晚年大開戒壇遠方來
受戒者數百人齋戒誦經日夜不輟又長於詩紳士來遊者互相酬和年七十五坐化

萬州志

僧見我文昌人少孤苦祝髮入沙門長齋誦佛日無休息初寓萬州龍池庵繼遊陵水三

昧庵後隱於萬之覺林庵出入緇衣瞻視不苟凡禪門徒弟一遇而惰慢全消並嫻於文詞喜與士人賦詩贈答嘗建草子坡報恩寺罄所積置田以供佛臨終先覺一睡溘

然而逝

參萬州志

符八公失其名感恩縣十所人不著年代相傳兵荒被番人所掠得修煉之術既而羽化番人爲立廟祀之乃公不欲身留異域浮其尸於海至十所至之日有廟御風而來珠梁香域備極輝煌非人力且夕所能構者公駕鶴以示曰此番人之所建以祀我者也吾將棲止於是焉里人奉其尸而祀之顏曰飛來廟屢著靈爽祈報輒應

感恩志

瓊州府志卷之三十七

人物志十三列女 漢 唐 元 明 國朝

漢

初孀珠岷令女年十三珠崖多珠繼母連爲繫臂令卒妻女還漢法珠入關者死繼母棄之其子九歲收置奩中關吏索得珠曰誰當坐者女意母所置遂進曰母解棄妾惜而置之奩中母不知也妾當坐母爭曰此珠妾繫臂也妾不忍棄何與於女妾當坐皆痛哭哀動路人吏亦垂淚曰母子若此何忍加罪已而知九歲子所內遂釋之

唐

王英符鳳妻亡其姓寶祐間鳳以罪徙儋州至南海爲獠賊所殺脅王英私之英給曰一婦人安足事衆男子請推一長者賊以爲信乃請更衣有頃盛服立舟上罵曰受賊辱不如死遂沉於海

元

瓊山縣

唐五妹伯壽女至正甲辰陳子瑚寇乾寧郡與從妹俱被執至舟中躡其妹曰我必不免於辱縱還何顏立於世乎汝小尙可求生也乃給賊曰妾家破親亡將何之乞解縛當相從賊然之即投江而死時年十八從妹以幼得歸

蔡九孃千戶克憲女有姿色解書義多勇畧年十一喪父擇配越三十不嫁

雞肋集云父亡弟幼不欲以

上屬之他人故親統父兵俟弟之壯不肯適人

元末寇亂統父兵保障鄉里未幾陳子瑚陷乾寧郡邑九孃固守不

下日久力竭泣謝鄉人曰賊帥新得郡城不守而來爲我也我死則禍息矣乃投入鋪錦巖避焉子瑚怒縱火巖口熏之死巖中其妹適王和年二十二而孃爲賊邱田所獲欲犯之不屈亦自縊死

李氏教授林君用子婦年二十五孀守泰定間憲副阿刺公聞於省部表其門憲副楊伯徵贈以詩云丹心已化望夫石血指猶存織女機

文昌縣

林氏陳道安妻年三十至正甲午陳子瑚亂道安陷賊中與脅從人吳眞慶密謀圖賊眞

慶泄其謀賊執道安殺之林潛往負屍瘞焉既畢咽土而死鄉人高其義葬於墳側
韓氏二女父良可長年十八次年十六陳子瑚亂母兄皆遇害二女潛奔草莽中至江側
長顧妹訣曰家既破寇來且逼汝能遁聽所往吾其死矣次泣曰母兄既亡惟姊是依
姊死余將焉往乃攜手同溺於江蔡微爲之傳贊王佐有詩咏之

明

瓊山縣

胡氏江南華亭人夫高文貴爲海南衛右所吏胡從焉洪武壬戌文貴遘難卒胡年三十
收骨以葬誓死守節教子誼以學業爲諸帥守所重楊升嘗爲作傳知府王伯貞跋之
程氏南海衛前所鎮撫凱之女有容德頗涉書史年十八歸同官子賈岳未幾岳病劇屬
程曰若少艾善事後人無念我也程曰必不辱君門戶因齧指血灑地誓與同死岳卒
含殮畢夜潛沐浴整衣自縊時洪武丁丑也事聞旌之學士解縉爲傳

陳氏適唐舟之子家居澹薄陳奉甘旨未嘗缺姑病危晝夜侍側廢寢食焚香祝天割股
和藥以進人無知者姑食之病愈久乃覺人莫不歎其孝其子繼祖娶同邑教諭馮源

女名銀字汝白奉姑孝亦嘗刲股療病云

畢氏南直太湖人年十五嫁南昌衛指揮屠經爲側室宣德初經累謫海南衛千戶病劇

訣別畢誓同死經卒既殮乃登堂辭母痛哭潛入室自縊

張氏陳普恤妻年二十八而寡孀居六十年壽八十餘而終正統己未旌

韓氏海南衛後所王勇妻宏之母年二十九守節撫孤成立壽八十餘成化丁亥旌

李氏邱傳妻澄邁李易周女文莊公濬之母也年二十二寡矢志無二撫育幼子母兼父

道天順辛巳旌後以濬貴封一品夫人

莫氏周宣妻年二十而寡毀容守節摘髮垂盡及老人呼爲髡婦正統間縣以上聞

耿氏歸金用和未三月金渡河遇颶訛言溺死耿聞即自經氣絕而金適歸有名醫徐美

救之甦耿性慧閒談論古今咸有典據金或不知也及金罹禍耿避難役得而昇之耿

曰昔王凝之妻爲逆旅主人所持即斷其臂今吾以目視惡人可乎不如死之爲愈也

即瞑目不食數日役懼昇還其家尋卒

吳氏前所昇女生員王鑾妻年二十六寡子宗源甫四齡矢節事親教子有義方長領鄉

薦成績學宏治乙卯詔表其宅張詡爲之作銘

韓氏太學生邱敦妻文昌韓繼芳女年二十四敦赴京入國學卒韓與側室徐氏守節終身

吳義姑俊之妹適辛卯舉人李明明卒吳年二十四無子歸母家撫孤姪誠如己子教育成名領正德己卯鄉薦卒誠喪之三年

田氏前所生員鍾秀妻年二十九寡無子奉親孝爲鄉里所稱正德戊寅郡守上其節年八十餘終

韓氏陳菊芳妻年十九孀居苦節父母窺其貧窘倍與資奩令改適韓痛哭撫孤自矢父母誘之歸至門而返移居夫墓傍旦夕泣掃至老不移孝廉張學顏稱其完節以比共姜云

岑氏指揮王守臣妻夫蚤喪授子秩以學長襲父職通詩律同知陳夢雷請建坊旌之謝氏庠生海瀚妻年二十八寡子忠介公瑞甫四歲家計蕭條謝矢志鞠育口授孝經學

庸諸書長就外傳少有戲謔必嚴辭訓飭之後瑞領鄉薦官至右都御史以氣節名天

下謝之教也府道欲請旌當路有與瑞左者遂沮其事瑞繼室邱氏年十四歸瑞事姑
孝二十八而寡撫孤孫延嗣

韓氏謝應昇妻居文昌紡績爲生年二十爲海賊曾一本擄去時抱男乙常在手俄見母
陳氏亦被擄韓乃給賊曰若放我母與子歸當從汝賊信而釋之韓度母子去遠遂投
海死數日其兄夢韓執蓋行海濱因至其地求之果得屍於破傘下面色如生乃收葬
焉

陳氏知陸川縣張子翼妻隨子翼任嘉靖甲子翼入省闈有搖賊數千劫庫擄陳爲質云
順我則生否則死陳大罵賊怒刃死三日顏色不變子翼歸爲營葬於陸川官旌之立
祠春秋致祭後以子紹初官贈安人

唐氏郡庠生陳瑀妻年二十六孀守郡守周思久旌其門

陳氏儒士潘穰妻穰省試卒陳年二十家計蕭條翁孀子之楫尙幼上供甘旨下撫遺孤
辟纊佐讀當路獎之御史王某周以帛米賜之田提學胡某請建坊旌表

馮氏上東岸王演武妻年十八夫故無嗣苦志守節撫姪承祧兩院爲請旌表

王氏舉人張玉妻涉書史年二十適玉逾六載玉應會試卒於道訃聞哀毀欲絕或勸之再醮王曰石爛海枯吾志不可移也織紡教子年六十二卒

唐氏海南衛王宗義妻遭繼母次弟讒妒借棲外家猶勤問視年二十四寡撫孤成立屢經家難冰霜益勵題奉旌獎壽七十餘終

林氏邑庠生陳鉞妻侍翁姑以孝聞年二十九鉞卒欲殉之或勸曰孤未成立也乃孀居課子宗濂宗濬膺鄉薦宗洙宗泗遊太學人稱賢母

林氏生員陳輔妻年二十寡紡績撫孤遭海寇許瑞焚掠延燒其家林冒火僱人救出夫棺與家人避賊渡河舟溺又奮命援其妹得俱免人稱天佑守貞課子壽七十八

林氏儒士陳鑿妻通志作陳鑿年二十八寡母憫其貧勸以他適林刺臂自誓姑病焚香虔禱

願減己算益親壽教子紹文遊泮

馮氏生員張希曾妻年二十夫死剪髮八殮誓不再醮撫嗣子教以義方孀居五十餘載人無間言

方氏庠生岑冕妻年十五歸岑甫三載岑卒撫子夭又撫遺孫稍長亦亡更攜二曾孫相

依壽八十七終

邱氏女貢生邱崢之女性至孝以父無嗣不肯字人隨父任廣西思恩縣訓導父歿女爲殯殮扶柩而歸卒於徐聞年三十八有司旌之曰孝女垂芳

黃氏郡庠生唐敦妻年二十而寡矢志守節孝事翁姑教育嗣子長登仕籍壽八十有六朱氏海南衛陶懋妻左所百戶朱燦之姊年三十而寡生遺腹子鉅撫育成立食貧守節閨門肅然

周氏生員潘積妻年十八歸潘越三年而寡孝事舅姑撫訓遺子成立與潘孝廉之楫母時稱雙節云

鄧氏謝有馮妻年十九生男甫一月夫亡苦節孀居紡績自給年六十餘卒

胡氏方伯濂女年十六歸進士張世衡世衡卒於京邸胡年二十八守節嘉靖壬辰旌子

穀娶鍾氏侍郎芳女年二十寡嘉靖丁巳旌

陶氏海南衛許撫謙妻隆慶六年倭陷海口被執不辱死

陶金孀舜卿女年十六賊陷海口獲女美其色欲污之唾賊大罵以死自誓竟遇害

張氏唐世興妻隆慶六年倭賊攻海口八村傷其父興持楛救父爲賊所殺張年二十七
食貧孀守孤苦零丁四十八年如一日人謂夫孝婦節世所罕有

張氏乙酉亞魁王伯霖妻年二十九寡食貧守節詔旌其門郡守王可大銘其墓

路氏左所百戶踪女同左千戶舍人王班妻年二十一寡無子誓不再醮完節終身

高氏中所儒士李元良妻生子際春甫朞年夫死高年二十五截髮毀容訓遺孤事病翁
歲荒忍饑以供甘旨年六十卒學道題請旌表際春後領萬歷壬子鄉薦

黃氏陳以忠妻年二十二寡撫孤尙之矢志不渝李氏中所唐福妻年二十五寡未幾子
女三人俱夭孀守終身

蔡氏前所楊銀妻年二十一寡守節不改

黃氏陳表妻定安訓導黃景成之女年二十四表卒守節終身

陳氏右所溫鑑妻年二十七夫亡勵志守節終身不變

王氏教授王用之女許廕妻年二十三寡矢志孀守克全其節

澄邁縣

王氏倫驛人李傑妻年二十四寡養姑撫子苦節不易成化間督學趙邑令周撰文表其

墓

吳氏庠生李璟妻年二十四寡堅志不渝教子文炯爲邑庠名士嘉靖二十六年督學旌

其門

王氏封平人馮那有妻嘉靖四十四年海寇猖獗那有拒敵爲賊所殺鄉隣瘞之王奔哭踰時自縊時年二十有司爲給棺殮

李氏富實入林有源妻萬歷元年海寇犯境李年二十被擄給曰我有首飾埋牀下盍免我歸取焉賊信之與俱至其家中庭乃厲聲奮罵曰我不欲爲路鬼耳今歸得死所矣願速殺我延頸就刃賊遂殺之

徐氏邑庠生林煌春妻年十九適春甫二載春病危誓以身殉夫卒遺金環與母訣痛哭不食自縊死萬歷三十七年太守倪凍表其門曰正節可風

吳氏林晚成妻年二十五而寡守志撫孤當道旌其門

林氏康女年十五適王姓二十而寡紡織自贍撫育二孤皆成立

梁氏廩生雷源妻年二十源卒矢志靡他撫子應期入邑庠督學蔡以貞節旌

童氏李一根妻年二十而寡母憐其幼欲奪之嫁堅守不從撫遺腹子果瑞爲邑庠生
鄭氏洪惟良妻年二十五孀居柏舟自矢撫孤子俟成績學遊庠序萬曆甲午直指縣令
皆旌之

陳氏封平人羅維楫妻年二十五生男嗣芳十日而夫亡守節教子成立爲邑增生崇禎
十六年縣令爲詳請旌表陳力止之其賢如此

定安縣

李氏吳邦光妻光赴科試道卒李年二十二矢志撫孤姑以家貧欲另醮之李乃毀面堅
守訓子允明允健允融俱入邑庠縣令謝應元旌其門

程氏陳瑛妻年二十喪夫舉遺腹子託乳保撫之慨然曰夫有子矣與其後死而失節不
若同穴之爲愈也夜自縊卒與夫合葬檢討陳繡輓以詩

李氏吳夢雷妻年二十寡嚙指毀容撫繼子成立崇禎十五年旌表建坊

吳氏陳時隰

縣志作
姓程

妻少慧悟知大義年十八歸隰九月而寡舉遺腹男曰文裕或諷以

他適則撫孤而哭曰吾忍身歸別姓子父他人耶孀居三十餘年冰蘖益厲

徐氏廩生吳懋謹妻年二十二喪夫孝事翁姑義方垂訓子體乾孫煜榮光俱庠生孫正中已卯副榜皆徐之遺訓也家有異鵠喪雄不復再配人以爲節義所感云

陳氏王瓊妻瓊山陳蔭女也年二十五瓊亡苦志守節撫子克智有成孀居三十餘年足不出戶孫士衡登賢書官中書舍人

王氏莫士興妻中書王士衡女年二十寡孝事舅姑喪葬盡禮以義方教子元健元順皆成立

李氏何芳妻年十六歸芳二十二而寡堅志守節教二子雲龍雲遶成立傷外家無後爲買義田祀之

林氏程潮妻年二十二喪夫矢志孀守人無間言參政林士元爲之傳

甘氏舊志亡其姓今依定安志縣城南門人年十八適舉人吳翼爲妻年二十翼卒無子家貧堅守當崇

禎末年兵賊肆暴艱苦顛連操持益凜年六十餘卒

文昌縣

何氏南溪何顯女歸田瑤僅四月瑤暴卒何遂更衣自縊同穴而葬

路氏清瀾所百戶高亮妻左所百通志作千戶舍人琮女年十九寡孝奉誓姑得其歡心有女

弟為瓊山左所百戶舍人王珏妻年二十一寡亦誓不再醮終身無玷正德間並以孝

節申聞

岑氏廩生韓國憲妻時氏翁名俊為河南按察副使與夫隨任未幾翁卒偕夫扶柩歸行抵

大洋寇猝至欲犯之氏給曰曷釋我夫與子則唯命賊許之氏瞰人與柩遠去乃大罵

賊赴海死七日獲其屍海濱色如生人謂副使有後皆氏貞列所遺云

林五娘主事密孫女也年十四僑居瓊山舅氏家值舅氏舉家出避禍獨女在室鄰有吳

汝安素與舅氏讐且慕女色因導勾者執女挾上馬欲強犯之女遂自嚙臂流血遍身

昏墜於地汝安懼急囑勾者送歸夜即縊死隆慶二年立碑建坊旌之

林淑溫文昌人通志作瓊山繼統女受瓊山沈魴聘魴死於途女聞訃即日去櫛盥朝夕哀慟

會海寇掠其家見女色挾至海女奮身投水賊急救之知其難犯欲殺女父母脅之從

女曰辱吾身及吾父母亦何顏立於天地耶遂碎首流血嚙舌而死賊憐之釋其父母

令葬女焉事聞直指戴璟立祠建坊旌之淑溫能詩今所傳誦者惟白菊花一律餘多

散逸

李七孀子貴女少失怙恃兄宜春撫之年十六許瓊山黃務有盜夜攻宜春家女被執義不受辱鬻舌求死昏迷仆地賊知不可犯解去有頃甦謂其兄曰吾被賊擄不死何爲兄及諸親慰解之夜自縊死

朱氏韓機訓妻年二十寡遺腹生男鉉勤儉撫養長娶婦葉氏生一孫未幾子孫相繼歿姑婦相依朱逾七十而死家貧不能具棺葉貸棺殮晝夜號慟鄉人哀之聞於官給銀助葬

王氏韓節儉妻通孝經列女傳言行端懿年十七適韓二載而寡無子茹苦事姑居處一室無大故不踰闔外姑死殮葬如禮父憫其無依迎歸坐臥一榻終身不移年五十七終

林氏生員邢文叙妻年十七適邢逾年夫卒誓不再醮無子撫姪應麟自甘貧苦孝事翁姑終身縉素不爲容飾直指每按郡必獎之壽八十三

邢氏黎天注妻夫兄天池貢官租府役潘六符宗達攝之天池他往見邢色美拘之去邢

子方在襁褓付天池妻韓氏曰此去母子無再見期矣晚至東坑投宿邢解衣易油明燈達旦六等不能近次日至宗達家置諸別室六果來犯邢痛哭厲罵爪胸流血六懼而去夜卽縊死宗達移屍山麓越六日面色如生事聞直指擒二役正法建坊旌表鄭廷鵠爲作青燈記

吳氏諸生鍾正氣妻府判應龍女夫亡守志後以家難訟連氏縣丞梁勗矯逮之吳不受辱投河死三日面色如生事白梁去官

韓氏雲曷妻年十六寡遺腹一女矢志不嫁逾年夫兄繼歿嫂病瞽遺姪子女四人翁姑亦在殯氏乃拮据禮葬三喪事瞽嫂起居不懈撫姪如己女壽九十三邑令馬公重之令夫人親往拜謁

華氏生員王高賓妻舉人廷芳孫女萬歷二年海寇林鳳攻陷清瀾所城高賓夫婦及十六歲女皆被執堅不從賊母子俱被害

林氏吳世傑妻年十七歸世傑甫三月而寡父母以家貧強再醮林哀泣自縊以殉
吳氏韓文濬妻年十六歸韓海寇許萬載肆掠吳被執觸石而死賊忿刃其屍未及殮七

日如生

潘氏廩生韓文源妻年十六歸韓海寇何喬劫掠文源死於賊潘市牛酒犒官軍追擒賊四十餘人以報夫讐茹苦紡績鞠孤奉母里閭稱其節義

李氏韓文一作元敏妻年十九孀居事繼姑人無間言直指旌之

符氏林高妻年二十二夫歿誓不再適撫成二子壽七十三成化間縣尹鄭宏表其門

鄭氏葉景熙妻年二十二寡無子食貧孀守巡按優獎壽七十餘

林氏生員李文敏縣志作文毓妻舉人林士明女年十九寡無嗣孀守縣令旌其門壽九十三

趙氏生員黃中紅妻年二十二寡遺腹一子茹荼撫育縣令表其門卒年六十八

林氏陳天聰妻年十九生子三月夫卒矢志靡他苦節奉姑按院屢獎之并給帛米題請

旌表

葉氏韓亮敏妻夫隨翁任卒於閩氏年二十四矢志撫孤直指王優獎之

王氏韓裔芳妻年十九夫卒守志不渝始終一節

朱氏生員王賓妻千戶朱廷珍妹年二十四寡奉姑鞠子克盡孝慈孫懋德登第人謂節

孝之報

陳氏生員林希翰妻年二十生子椿彌月而寡黽勉婦道善事繼姑夫有姊妹備奩嫁之年五十而卒椿以歲貢任廣州司訓

符氏生員趙元妻年十六歸趙孝事翁姑年二十五夫故斷髮矢志食貧撫孤壽七十二黃氏林梗妻梗亡矢志孀守竭力撫孤俾有成立壽九十四

陳氏雲朝縉妻年三十寡撫訓四子及諸孫皆游庠處家勤儉樂周貧困壽九十一卒當道旌其門

馮氏庠生林兆翰妻年十九兆翰亡子昌燦甫週歲馮撫育入泮昌燦生子家珀珀娶張氏生子運鑾甫六日家珀卒張守節課子爲庠生雙節萃於一門林氏一綫賴以不絕

唐氏何朝紳妻年十九寡矢志鞠孤壽七十餘終

會同縣

馮氏彭裕妻年二十裕卒殯殮畢即自縊死

楊氏王標妻標卒楊年二十四父母強之嫁剪髮毀容以誓嘗撫其子曰吾豈惜一身所
苟延旦夕者爲汝未成立也性嚴毅兄弟妯娌非時不見課耕讀勤女紅足跡不踰閭
外

黎氏王佑先妻年二十孀居父母勸之再適誓死不從撫猶子爲嗣御史蔡贈匾額獎之
莫氏王順言妻年十八順言故指遺腹仰天泣曰我當從死念夫無嗣湏存此王氏一塊
肉耳後果生男撫養成立子故又鞠穉孫兆熊力學成名壽八十終

王氏別駕繼昌孫女庠生黎嗣顯妻年二十寡柏舟自矢事姑至孝撫姪廷諫爲嗣教之
成名

黎氏王式先妻舉人黎嗣盤姑母年二十二守節始終不渝邑令葉中聲鄧桂芳俱贈以
匾額壽九十五卒其次子王珂婦亦年十七寡冰霜自矢教子成名梓里欽之

黎氏生員王起龍妻歲貢黎夢祉之妹年十八夫亡守節終身邑令陳沃心獎之
張氏謙之之女庠生王宏妻年十七夫故撫幼女守節立嗣以延夫後卒年六十縣令申

請旌表

胡氏方伯濂孫女舉人黃烈妻年二十五烈會試卒於金陵胡毀容截髮矢志鞠子長子受祖歲貢次子榮祖副榜皆賴母教成立又築西宛石橋以濟行人御史表其門曰柏舟遺響

黎氏安義縣令黎時雍孫女廩生王鉉銓妻年二十五而寡撫育三子俱列庠序孀居四十年內外族黨無間言

王氏貢生劉有謙妻廩生王環之女年二十五孀守事翁以孝聞訓子嚴正五男俱列庠序壽六十二縣令夏旌之

樂會縣

王氏黎邦佐妻佐溺死流馬渡王聞奔至投水殉焉知縣劉叔鰲爲立旌烈碑

馬氏王世勳妻少寡有完節壽九十八嘉靖二十三年知縣翁桂以聞詔賜存問旌其門吳氏生員何廷訓妻年二十六廷訓應試道卒吳冰蘖自矢事翁盡孝教子有方以哭夫喪明子有由選貢任臨川主簿孫日丁領隆慶丁卯鄉薦

王氏符于均妻年十九喪夫子文鐸方在襁褓有中表陳某勸之再醮曰是呱呱者猶荷

珠稍動輒傾矣斥之至文鐸遊庠王乃指謂陳曰此荷珠養成照乘珠矣陳大慚卒年七十二

周氏生員王夢金妻年十九寡孝事舅姑撫姪振基爲嗣捐建上寨河渡以濟行人鄉里立碑記其德壽八十縣令王懷仁旌之

黎氏廩生王贊卿妻贊卿卒黎年十九矢志孀守孝養翁姑不事容飾撫男夢熊成立內外無間言

臨高縣

唐氏王元愷妻瓊山唐侍御舟姪女知書嫻禮年二十五愷卒守節撫孤教子佐以文學名於時官郡丞贈宜人

李氏許希賢鄰通志作希曾妻年二十二爲海寇所擄誓曰婦人血不汚地魂可貫天及寇逼辱

抱柱罵曰速殺爲幸賊怒殺之

楊氏馮啓妻年二十八海寇掠境楊負幼子被擄逼犯不從賊殺其子以威之罵盜不屈死

王氏生員洗樂沂妻年二十三孀守父母欲奪其志不從孝舅姑撫穉子家故貧竭力支
持子早喪復鞠遺腹孫年八十三當道旌之

蘇氏楊應妻年十八應以誣陷死蘇勤紡績以奉舅姑送終盡禮知縣海鯨旌之

鍾氏明經鍾金女適王廷器早寡守節始終無瑕

謝氏生員陳諍妻諍歿謝年二十四矢志不渝家貧紡績以養舅姑教子力學食餼年六十餘督學旌之并贈以詩

謝氏吳廷圭妻年三十而寡始終不渝其志

儋州

陳氏庠生林維翰妻嘉靖二十二年維翰應試卒於省陳聞晝夜號哭欲以身殉喪至遂
閉門自縊時年十九巡按旌表其墓

范氏林重通志州志俱作林任重妻年二十二夫歿守志隆慶末叛兵陳祿逼城婦女多被繫范奮罵

不爲所污遂遇害

林氏生員李培春妻知州林世清女適培春五載夫亡年二十二生女二矢志守節兩夫

弟不能自立林獨持門戶弟以訟傾產林捐田以救延師訓子姪俱有成壽八十六

沈氏李築妻年二十孀居奉姑教子成立孫棫登仕籍壽九十

符氏生員蕭鞏妻年二十五鞏歿母欲奪其志撫孤自誓曰若棄此兒何面見夫子於地
下孀居二十餘年孝事耄姑訓子汝仁成立全節無玷

林氏蕭文慶妻年二十九夫亡刻苦守節事姑盡孝教子鳳成名年逾七十

陳氏生員沈卿妻年二十二夫亡誓不再醮家貧紡績養姑姑卒葬如禮

朱氏百戶陸剛妻年十八歸陸陸死於王事朱守節撫孤孀居四十餘年克全貞節郡人
士咸有詩美之

徐氏蕭鳳妻年二十五寡甘貧守節撫孤有成年八十四林世清爲立傳

陸氏貢生胡允謙妻年二十五寡無子孀守終身壽七十

劉氏廩生葉榮妻年二十六寡矢志孀守孝事耄姑教育四子克剛克宏克敬克恭俱登

仕籍壽八十餘

曾氏生員何羽翔繼室羽翔卒前妻子六歲氏子二歲矢志守節教育兩兒俱列成均壽

八十三而終

湯氏生員翁承祖妻承祖赴試卒於省湯守節育孤補庠生亦以赴試卒湯兩遭家難極力維持節操益堅壽八十七

符氏生員曾廷璠妻年二十二夫赴試卒於途符生一女方數月擇繼承祧茹荼守節卒年五十

昌化縣

張氏生員孫廣學妻宏治辛酉符南蛇亂夫婦被掠至峒賊欲置張他所張正色曰即死吾夫婦同穴可也何他往耶賊怒出廣學殺之張抱夫屍號哭罵不絕口亦被害

陳氏百戶榮長女贅本衛前所千戶舍人溫瀾爲壻時符南蛇亂陳與三子并一女年十三俱被執陳度不免厲聲罵曰我家婦豈受犬彘污哉奪賊刀先殺其女乃自刎
沈氏庠生吳曰巽妻武宣教諭沈心融女年二十寡苦志守節壽八十二

萬州

陳氏紀欽明妻年十七歸欽明越四年夫亡悲哭欲從死母防甚密乘間竟自縊鄉人高

其烈為之合葬

史氏庠生張鳴翼妻年二十翼遊學卒於粵西訃聞史慟哭屢絕及喪至自縊於棺側官

為立嗣

王氏廩生曾紹榮妻教諭會同王嘉賓女年十七榮贅未及葺嘉賓赴京紹榮以病不能

送王母怒不許與王見榮忿歸再娶楊氏父母迫之嫁王矢死靡他聞紹榮歿號泣奔

喪後楊亦繼歿遺三男二女王撫猶己子州守茅一桂旌其門壽八十九

文氏千戶張榮之妻適張四載而寡養姑鞠子矢節不貳未幾姑與子相繼亡氏子身紡

績年七十卒州人募金葬之巡按旌其門

陵水縣

王氏百戶世恩女生員譚以謨妻年二十夫死守節撫子道淵補邑庠道淵亡撫孫正亦

入邑庠正又亡復撫曾孫備歷艱苦六十餘載卒年八十

王氏廉州府教授王真儒女監生秦廷試妻痛其夫死於難竟以身殉有司以聞表曰貞

烈祀節孝祠

陳氏王造龍妻生員陳兆鼎妹嫁甫及葑夫亡殮畢自縊以殉

萬氏千戶人傑女百戶王國彥妻年十九寡無子擇族人應襲者撫爲嗣閨門清肅年六十四卒邑人請旌

羅氏萬州人適邑庠生曾備一時黎寇焚劫村落羅抱子以逃路人欲扶之行羅叱曰吾即遇害肯容汝扶哉賊至挾入林中欲污之羅度不免擲子於地乃抱樹罵賊賊怒剖其腹聞者哀之

崖州

湯氏邱鼓子妻邱卒哀毀絕粒罄家貲爲殮具葬畢自縊以殉

張氏遊擊王錫嵩側室自北直隨任之崖錫嵩以征黎病死張痛悼欲自縊家人防之後乘間新粧炫服竟投纆死知州李如柏誌其墓

劉氏庠生伍嶽妻嶽赴試渡海溺死劉聞哀毀數月卒撫按表其閨

李氏女年十八許字訓導馮廷器子馮子病卒李誓不再醮奔喪自縊父母憫其志昇與合葬

王氏千戶郝通志作百戶煥之女舍人於楠妻姑胡氏警王事之唯謹楠隨父征黎中矢死王年

二十一撫幼男矢志不貳後男憲文襲千戶年六十二有司旌之

馬氏千戶所軍廣女生員劉裕妻年二十六寡守節黽勉教子崇官順德訓導正德乙亥

提學張移檄旌獎

洪氏百戶曾衡妻年二十三衡卒哀慟不食絕而復甦舉遺腹男國忠恩勤撫育茹苦養

姑年六十三卒州牧旌其門

林氏生員王大謙妻年二十寡謹事舅姑撫二子令就傅脫簪珥以資脩脯長子應試崇

禎乙亥拔貢次子應諭順治丁酉歲貢州牧罷竿旌其門卒年六十八

王氏二女關西人瑋女也一適梁一適楊俱早寡誓不改嫁各撫孤成立以壽終人稱爲

王氏雙節

張氏何伍妻年十九伍歿孀居無子豪門屢求聘兄弟欲奪其志峻拒不從壽七十

花氏千戶所花經之女歸蕭炳年十九炳亡父母憐其幼令他適花誓不從閉門紡績不

復歸母家卒年五十六

周氏蔣誼妻年二十五寡守志終身

李氏巫文貴妻年二十七孀守壽九十餘

黎氏黃蘇妻事翁姑以孝聞年二十五寡守節不渝

國朝

瓊山縣

尹氏海口水師左營守備黃世賢妻康熙二十三年海賊楊二破海口城尹懼辱仰藥死
有司爲立附祀江公祠

楊氏晉江張元潞側妻僑寓於瓊潞亡氏年二十有閩人欲脅娶之楊誓死不從閉戶自
縊聞者哀之與潞合葬於新學之左

高氏吳廕昌妻年二十五夫故家貧與孀姑相依撫藐孤恩勤尤至于經邦入泮康熙四
十五年旌

葉氏周璧郝通志作周國璧妻夫早亡撫孤孀守家貧日勤紡績以奉翁姑茹苦二十餘年以完節

終雍正七年旌

李氏陳應熊妻夫亡年二十四子在襁褓有議婚者輒絕食父母勸之李曰上有耄姑下有幼孤忍舍之乎閨門嚴肅人莫覩其面康熙三十一年院司給匾旌表

屈氏澄邁人夫失姓名居海口所海盜楊二破城逼之去屈罵賊賊怒斷其手足而死有

司志其貞烈

陳氏明進士是集女適庠生邱夢暘生二子一在襁褓一甫彌月夢暘故陳年十九鬻奩治喪孝事舅姑撫二子珩玟並列庠序壽六十餘學道旌其門

莫氏廩生邱夢璧妻夢璧赴省試迫卒莫年二十一聞訃哀毀欲絕乃撒簪珥扶襯歸孝奉姑孀婦兼子職子身孤苦數十年學道旌之

吳氏曾恕妻庠生象斗女年二十一寡堅志守節以女紅佐老姑甘旨得其懽心鞠二子有臨文奎俱成立年踰六十壺範肅然當道旌之

唐氏庠生珍女適林茂年二十四茂卒值鼎革時兵燹中唐備嘗艱苦以辟績撫孤子入武庠冰操凜凜壽七十六

謝氏貢生清女適周煥早寡丁變亂謝備米煮粥飼兒拾野菜自食課二子讀書俱補庠

生壽七十餘學使旌其門曰以節成慈

彭氏明兵備道中軍徐後達妻年二十二喪夫遺孤三人長履益甫六歲次作楫雲裁皆在襁褓值鼎革饑饉艱辛守節教育三子皆入泮未幾相繼亡彭與寡媳胡氏鞠孤孫

壽八十二

林氏庠生高配天妻年二十夫故食貧孀守撫襁褓子錫純恩勤教育舉明經年七十卒王氏邑庠馮兆英妻廩生宗京母年二十五兆英卒王冰霜矢志守節四十餘載雍正八年旌

年旌

黃氏邑庠克斌女庠生洪嘉素妻年二十七夫卒黃矢志不移皓首無玷雍正九年旌

潘氏廩生思孔女生員周乘穹妻年二十三寡守節足不踰閩人罕覩其面撫子洪煥補

弟子員食餼雍正十一年旌

吳氏庠生于舒女廩生陳今興妻年十六歸陳未踰年夫殞孀守撫嗣子治補邑庠壽七

十餘雍正十二年旌

鄭氏存禮女陳宏綽妻年二十六夫沒誓不改嫁鞠育嗣子成立雍正十二年旌

馮氏孝廉馮嘉遇孫女生員許世華妻年十六喪夫撫孤嘉義嘉禮備嘗艱苦歷三十餘

年雍正十二年旌

符氏庠生陳宏謨妻生員符聖紀女夫早世符弱齡孀守歷三十餘載全節無虧乾隆元

年旌

吳氏馮偉運妻年十七歸運甫三載夫歿松筠勵操孀居三十餘年乾隆七年旌

伍氏郡庠必勝女年十七適吳毓奎踰年毓奎卒伍少年勵節大義皎然撫遺腹子士衡

補邑庠乾隆八年旌

王氏陳燦妻年二十六燦故王矢志不二教育嗣子贊疆有成乾隆八年旌

王氏天文女年十四贅林學文通志作文學甫一載學文歿王奔喪守節踰年有匪人周加令窺

王姿色強委禽焉聲言擇吉迎娶王閉門自縊乾隆九年旌

曾氏郡庠陳宏鑾妻年十七歸陳次年宏鑾歿曾誓不再適鞠嗣子懷士成名孀居三十

餘年人無間言乾隆九年旌

陳氏郡庠吳有要妻年二十七夫亡陳即封髮自守食貧撫孤歷三十餘年乾隆九年旌

劉氏楊朝選妻年十七歸楊踰五載朝選卒哀傷欲絕以孤兒在抱不忍遽死守節以終
乾隆十年旌

盧氏許字周建賢未嫁而周亡盧年十六哀慟欲絕奔喪守志能以義方訓嗣子白首無
玷乾隆十年請旌

周氏陳毓英妻廩生其焜女年二十三寡周矢死靡他撫孤執中成立乾隆十年旌

陳氏增生益金女邑庠黃元先妻歸先五載寡矢志孀守立嗣子翰春爲後乾隆十年旌
劉氏邑庠金女生員陳邦祚妻夫早喪矢志完貞撫一子所傳成立乾隆十年旌

黃氏貢生嘉瑩女年十八適羅輝斗踰五載輝斗亡黃堅白自守撫孤以寬列膠庠乾隆
十一年旌

陳氏馮潤妻年十六歸馮踰五載潤歿陳冰霜自矢家貧夤勤女工以養翁姑翁姑卒喪
葬盡禮持家有法子典膺歲薦氏年八十餘終乾隆十三年旌

蔡氏吳世卿妻年二十寡堅志貞守閨門清肅撫子滯有成卒年八十乾隆十四年旌

趙氏李捷魁妻年十五歸魁康熙辛酉海黎肆掠趙逃匿山中賊搜山獲趙脅之不從刀

血遍體一賊曰是烈婦也不宜枉殺一賊復至又脅之趙罵不絕口賊怒以刀刺其喉
幾斷越三日有自賊中逃回者言其事甚悉捷魁乃往山中昇歸奄奄一息尋卒

吳氏庠生理燦女舉人王賓妻賓會試卒於京邸吳聞訃痛哭閉戶自縊

許氏高臺妻年十五歸臺祖姑在堂越五年夫客死會同許鬻奩運柩歸葬二子在襁褓
以次子爲伯兄嗣勤紡織養祖姑其子甫成人復天親黨諷使改節泣曰高門不幸天
也吾何怨焉孀守凡三十餘年堅貞不二

張氏陳啓蘊妻年二十二而寡子紹榮甫二歲或以子幼家貧勸其他適氏勵志益堅辛
勤操作養翁姑生事葬祭皆盡禮夫有幼弟三人皆爲娶婦苦節三十年如一日

黃氏方伯宏字孫女適辜全斌生二子年二十四夫歿鬻奩殮葬矢志柏舟值寇亂氏攜
二子匿山中三日不舉火採木葉食之賊退得脫茹苦終身教子力學次男宏亮食餼
林氏王相臣妻庠生汝驥母年二十而寡鞠一子無二志以女紅奉舅姑自甘淡泊人無

間言

符氏生員嘉祉女郡廩生潘待聘妻素嫻女誠年十七歸潘生子甫倅待聘亡誓以身殉

或勸曰死誠善矣如翁姑穉子何遂矢志孀守奉二親撫藐孤丁歲凶拮据支持歷年八十子之璘後膺歲薦

蒙氏王廷俊妻年二十六寡家徒壁立無莽功親可倚舅氏憫其孤苦勸他適蒙嚴詞以拒食貧撫孤後孫子衆多壽七十三

周氏林大經妻年十六歸林甫二載夫歿子方襁褓家貧周矢志撫孤歷久不變有司旌其門曰貞節流芳

趙氏李際春妻年二十四際春渡海溺死趙欲以身殉子廷栻呱呱待哺隱忍含冰三十餘年屢經寇亂辛苦備嘗其節益堅有司匾旌曰玉骨冰操

林氏庠生蘇和妻生子明試年二十一寡四壁蕭然林甘貧孀守勤織紝訓子讀書明試食餽郡庠皆畫荻丸熊力也壽八十卒

鄭氏生員陳良貴妻邑庠人偉女年十五適良貴十八而夫歿子煥方襁褓鄭保孤俗歷艱辛堅貞不改

吳氏邑庠黃爲弼妻年二十五寡誓不再適茹荼飲蘖撫育二孤廷極廷和皆成立里人

欽其貞操

陸氏邑庠黃瑞妻年十七歸瑞四載夫亡冰霜矢志閨闈肅然教子瑚補弟子員

何氏貢生魁宿女陳垓妻年二十三垓亡誓不再醮家計蕭條奉親撫孤孝慈兼盡守節

三十六年卒

陳氏貢生王君極妻年二十五寡守節不移奉翁姑以孝撫嗣子有義方孀居三十一年

闈內外無間言有司請旌表

張氏甘潤美妻年二十一寡育一女矢志守節年五十卒

陳氏生員吳希聖妻年二十四寡堅志守節撫子繼周成立卒年五十有五

謝氏庠生林維學妻早歲而寡誓死完節奉老姑撫孤子僮歷艱辛孀守三十餘年子輝

先補邑庠

陳氏符萬安妻年二十四夫亡矢志守節撫孤汝和成立孀居三十餘年

沈氏邑庠吳經邦妻年二十三夫歿矢志堅貞撫二子早逝各遺穉孫廷璠廷琇提攜成

立卒年六十三

王氏梁啓學妻年二十五梁故誓不再嫁奉姑誨子艱苦備嘗尤能持家政上下帖然子雕鳳補庠生年六十餘卒

楊氏庠生吳道南妻生員溼母年二十六寡事翁姑婦兼子職撫穉子母兼父道族黨稱白璧無瑕

陳氏年十六適何大開二年寡熒熒孀婦志堅金石遺孤光衢生九月提攜教誨以迄成人徐氏王天佐妻夫早逝子殿元甫六歲貞守撫訓以全節終

王氏生員鄭紹斌妻年二十五寡食貧守節孝奉耄姑教育孤兒動合禮法卒年五十二王氏生員瑞華女陳文炳妻年十八歸陳逾六載夫故子于佩僅四齡矢志靡他家貧紡績奉姑訓子成人有文名年五十八卒

李氏陳聖學妻早寡奉二親盡孝訓育二子有家法長炳斗補邑庠次輝斗領鄉薦任山東博興知縣年六十六卒

陳氏馮文忻妻年十七歸馮八年夫歿陳誓無二志力貧撫孤子廷瑛膺貢選孀居三十餘載完節無忝

李氏吳鉤寶妻年二十五寡守貞垂三十年撫孤子昌儒教誨有方族黨咸欽壺範

潘氏歲貢文寵女年十八適廩生陳聖哲三載聖哲亡無子潘誓以身殉念兩代公姑俱

衰邁熒熒無依乃強視息織紉以供菽水孀守三十五年

王氏廩生周李松妻舉人王賓之女年十八歸周五載夫亡節凜冰霜蔭居三十餘年無玷性喜施捨修治橋路鄉人德之

莫氏周堃妻年十七贅堃踰年堃死無子守義事翁姑生養死葬如禮撫姪丙爲嗣苦節四十載

鄭氏蒙維燦妻早寡家徒壁立有諷令再適者鄭截髮自誓日勤女紅奉翁姑撫訓藐孤光碧補郡庠壽六十有八

林氏郭瓊泰妻年十六歸郭二十二歲夫故林守節不二擇姪承祧事翁姑至孝養生葬死不留餘憾教子鍾奇成名乾隆二十七年旌

李氏杜鍾麟妻年二十一生二子而寡夫弟玉麟妻張氏年二十三寡有二子同志孀守奉耄姑色養備全撫孤兒恩義兼盡姑歿共鬻釵裙治喪相依三十餘年不聞詬誶一

門雙節里閭稱之乾隆三十六年旌

陳氏鄭樹鼎旌年二十六寡矢志靡他孝事老姑姑歿罄奩營喪葬訓子瑣入庠有畫荻風又念伯兄無嗣大宗不可絕以己子爲之後沒齒無怨人稱爲女中君子邑令鮑啓泌旌其門

游氏杜常輝妻年二十六寡誓不改適事舅姑養生送死無憾撫七月孤攀梭教育成立孀居三十年艱辛備歷鄉黨稱爲苦節

吳氏生員高超妻年二十四寡矢志柏舟自甘淡泊事老翁以孝撫嗣子以慈守貞三十四年清操不改

張氏歲貢字泰女年十五適洪世琮甫四載琮故家貧無子與孀姑相依父母欲奪其志張曰我嫁寡母何依誓不改日勤女紅以供甘旨姑歿喪葬盡禮守節終身

王氏邑庠必祿女年十八歸詹登科踰四年寡守節事孀姑以孝聞撫姪經文爲子寓嚴於慈經文由邑庠食餼膺貢王猶惓惓勗以力學閨門整肅孀居三十一年鄰人罕覩其面

陳氏朱光璉妻二十二而寡遺子甫二歲家復貧陳守節不二躬織紝奉姑忍饑哺子姑
歿哀動鄉里殯葬合禮完節而終

張氏貢生必達女年十七歸邱瑛逾年瑛故家貧無子父母憐其幼令再醮張勵志益堅
事姑得其歡心撫猶子士侯爲後苦節三十九年教諭鍾靈以古節冰霜旌之

陳氏庠生其珍女年十七歸王允予予外往教讀死陳變奩扶櫬回葬訓子紹先列邑庠
教授黃壯表其門

陳氏蒙聖連妻年二十五夫歿二子在抱陳拮据奉翁姑撫二子孝慈無間長子娶陳氏
生二男而夭次子娶張氏舉一子亦亡一姑二媳皆守義相依爲命一門三節尤世所
罕觀者

羅氏馮廷佐妻年二十二寡生遺腹子成茹荼飲藥以養姑姑歿爲營殯葬竭力摒擋孀
居三十五年無玷清節

邱氏年十八適貢生潘相國踰五載夫亡孀守奉翁姑克盡孝養撫嗣子命九補弟子員
尋歿婦馮氏年二十二遺孤和介方在抱姑婦食貧鞠和介亦列膠庠邱壽八十三馮

年六十餘學使王際華旌其閭一門雙節鄉里重之

饒氏年十九適邱宗邦越六年夫故遺二孤家貧翁姑多病侍奉唯謹翁姑歿喪葬盡禮持家訓子年六十四歲終

趙氏張應朝妻年二十七守志勤女紅供翁姑菽水撫遺孤宏猷成立孀居六十三年

邢氏歲貢生爾麟女年十七適張公模十九夫故舉遺腹子守節孝事翁姑子娶婦尋歿擇姪孫爲嗣恩勤尤篤與寡媳相依五十餘年學使程巖旌以節義可嘉

林氏生員馮茂春妻年十六歸春二載夫逝含殮畢欲以身殉翁姑以親老子幼諭止之事舅姑以孝聞篝燈課子寓慈於嚴壽七十乾隆三十五年學使翁方綱旌曰柏節松操

潘氏歲貢生湘孫女適李鍾芳年十九寡截髮明志立繼嗣勤機杼以供翁姑生事死葬如禮教授鍾南麟表其門曰金玉完貞

馮氏廩生永祚女年十八歸謝倬運越五載而寡遺孤在抱甘貧守義苦節五十年始終如一

李氏兆祚女許字鄭同明未婚夫卒李聞訃奔喪守節家貧如洗冰操三十餘年里鄰好義者憫其孤苦共捐置舖二間取租息以贍之

曾氏庠生黃仕越妻年二十三夫故遺孤五齡曾柏舟自矢勤紡績事翁姑喪葬獨任教子成立年五十二終

沈氏林潤珩妻年二十寡林兄弟偕亡父母老而無依氏克殫婦職清操自持四十餘載謝氏張書升妻年二十四夫亡無子誓不再醮孝養耄姑撫嗣子玉鳳教以義方補郡庠霜操歷三十餘年如一日

張氏王冕妻年二十夫亡累日不食誓從死其姑曰爾死無愧爾夫如老身無依何氏遂忍死勤女紅以供甘旨撫猶子減己食以哺之族有憐其貧捐田資饘粥者卻不受貞潔自守至老益堅

王氏廩生潘朝敬妻年二十五夫亡子家駿甫三齡志矢冰霜家貧紡績奉耄姑必誠必敬子稍長命就外傳教誨嚴肅後列膠庠學使翁方綱旌之曰節比松筠

黃氏年十九歸嚴宗岳五載而寡遺孤甫三月夫疾篤將訣氏嚙指流血誓不改節上事

翁姑下撫幼兒孝慈兼至年六十有一

林氏許字沈鏞未婚而鏞歿林奔喪守義事親能執婦道撫姪為嗣卒年六十

林氏王紹統妻年二十五守節撫孤子章入泮後章歿媳吳氏事姑孝謹姑病籲天請代

疾立愈與姑辛勤鞠子之藩登進士之垣補邑庠林壽至八十二吳卒五十餘學使鄭

虎文旌之

吳氏廩生符公爵妻年二十五孀守事耄姑撫孤兒孝慈備至苦節三十三年卒

林氏年十七歸吳元美越五載夫亡矢節事翁姑鞠弱子孀居五十餘年人無間言

吳氏林發桂妻孀居撫穉子為海寇所擄恐被污密囑同難者曰吾不復見吾兒矣若等

得歸當為吾兒告之即投水死

胡氏王世位妻年二十三夫故有巨室欲娶為婦其姊力勸之謝曰吾命薄不能為貴人

婦也清苦守節七十四歲終

吳氏

庠生王章妻

謝氏

呂奇侯妻

陳氏

吳文淑妻乾隆十七年旌

張氏

王麟妻乾隆三十八年旌

莫氏

高涵妻乾隆四十二年旌

潘氏

庠生王元輔妻

王氏

梁萬邦妻俱乾

隆四十六年旌

謝氏

林其攻聘妻

鄭氏

王鈞妻俱嘉慶三年旌

謝氏

廩貢吳琮側室嘉慶五年旌

符氏

王緯章妻

雲氏

馮淑妻俱嘉慶六年旌

雲氏

馮棟妻

韓氏

馮枚妻俱嘉郭氏曾魁文妻嘉慶二十四年旌徐氏編修吳典側室嘉慶二十五年旌陳氏鄭龍功聘妻呂氏廩生許子功聘妻王氏陳以傳妻具馮道元旌

陳君吳氏廩生王翰學妻俱道光八年旌覃氏蔡江妻吳氏周宏琳妻俱道光十五年旌張氏游國藩妻道光十一年旌鄭氏陳邦瑞妻馮氏陳翰妻李氏

楊廷珏妻具道光十四年旌林氏編修吳典側室道光十五年旌蔡氏符兆熊妻馮氏廩生吳以均妻楊氏葉泗潤妻梁氏王炳妻楊氏蔡任智妻馮氏增生符俊瑛妻

林氏陳日誦妻黃氏庠生陳元模妻馬氏覃魁兒妻洪氏覃純仁妻王氏庠生何其熾妻王氏蔡勵妻林氏武生鄭鋒妻具道光十六年旌符氏楊廷馮瑞妻

氏王儒佩妻吳氏林家瑞妻鍾氏吳德讓妻粘氏吳以懋妻饒氏符運謨妻具道光十八年旌曾氏梁士淮妻道光十九年旌潘氏高之拔妻道光二十年旌馮氏

洪見邦聘妻直光二十一年旌陸氏陳見瑞妻直光二十一年旌張氏生員陳日冕妻道光二十一年旌吳氏王時泰妻道光六年旌吳氏周文妻蔣氏周甫懿妻具道光十年旌

澄邁縣

黃氏諸生王紹寔妻年二十一歸王遇黎寇亂被掠黃誓死不從賊怒斷其兩脛洞胸而死

死聞有司立廟祀之教諭蔡嗣襄為之傳

李氏吳奮洙妻年二十為黎寇所擄將汚之堅執不從遂遇害

吳氏李是楫妻二十二與九歲妹被賊擄乘以騎至稍陽橋自馬上躍入河死後妹贖回

始知其事

王氏貢生弼明女諸生邱紹蘭妻康熙辛酉海寇掠鄉中妯娌相謂曰事急矣將奈何王曰婦人之義守身爲大倫不測惟死而已未幾賊至與夫匿林中被執逼之使行王大怒罵賊殺之同時有陳氏者武生曾相國妻亦爲所執不屈死之事聞並旌其門

陳氏羅維楫妻年二十五生子嗣芳甫啐而夫故陳堅貞自守承歡母氏敬事兄嫂教孤子成立補增廣生年六十三終

陳氏許耀斗妻年二十生一女夫死歸依母家誓不再醮順治壬辰歲大祲母欲奪其志私爲受聘陳知之自縊死

蘇氏李遇天妻年二十一夫故痛哭欲殉以舅姑泣勸強起治喪事舅姑以孝鞠子以慈冰霜之節老而益堅乾隆元年旌

徐氏年十八適陸挺秀踰四載陸亡徐投繯者再以救得甦祖姑泣諭曰死得矣老婦穉子將安依耶遂留殘喘奉姑撫兒祖姑歿脫簪珥殯葬子世昌又殤以猶子世宸繼嗣守節四十二年乾隆十年旌

黃氏王大猷妻年二十三夫歿遺子德潤甫週歲黃勵志守節孝敬翁姑姑歿力勸翁再娶生兩夫弟翁與繼姑相繼淪亡哀毀盡禮撫育二夫弟過於己子延師訓誨俱補邑庠乾隆十一年旌

姜氏年十九歸王國膝六載夫亡哭泣欲絕念孀姑與二孤無託乃不死仰事俯育曲盡孝慈訓夫弟國勝與子瑚俱補邑庠乾隆十一年旌

邱氏庠生士義女生員陳士輝妻早寡事祖母與翁姑以孝聞二子俱幼艱辛鞠育翁姑病篤籲天願以身代及歿殯葬以禮子欽習舉貢士孀守四十五年乾隆十六年旌

譚氏韋上貴妻年二十三夫故食貧守節以紡績供老姑撫週歲男朝選俾列郡庠更為夫黨無後者立嗣存祀年六十餘卒

魏氏陳某妻李氏邱某妻俱逸其夫名有劉阿蠻者圖姦魏魏拒之有廖姪短者調謔李李忿之俱自經魏以嘉慶十九年旌李先一年旌

王氏 李遇妻乾隆二十二年旌 莫氏 庠生土之寶妻乾隆五十五年旌 吳氏 王燮妻乾隆六十年旌 辜氏 貢生曾楷妻嘉慶二年旌 鄭氏 陳學藩繼室嘉慶十五年旌 李氏

邱立勳妻嘉慶十八年旌 李氏 邱某妻嘉慶十八年旌 魏氏 陳某妻嘉慶十九年旌 唐氏 李巨材妻 吳氏 王德昭妻 馮氏 羅元升妻 林氏 王立中妻俱道光元年旌

黃氏 王洋妻 道光十年旌

定安縣

陳氏舉人宗洛女廕生士昌言妻順治己丑許宗孔林冲霄等煽亂昌言率師擊賊陣亡及城陷舉家被擄陳給賊釋其姑及子懋曾願以己身為質度姑與子去遠罵賊咋舌出血噴賊而死太史龔章為之傳

韋氏樂會歲貢章端 郝通志 作端誤 女程演妻為黎賊所擄解其衣厲聲大罵齟唇血噴賊遂遇

害屍暴三日顏色如生教諭梁廷佐為立傳

王氏生員莫伊妻年二十餘寡孝慈兼盡白首完操康熙六十一年旌

張氏廩生莫斯始妻莫有三喪未舉而卒張拮据營葬教幼子勉以成立孀居三十七年

雍正五年旌

蔡氏王焜妻歸王三歲夫故老姑繼逝蔡哀毀盡禮守節四十七年雍正五年旌

陳氏莫昭斗妻早寡矢志堅貞善事舅姑撫孤兒成立孀居三十八年雍正五年旌

孫氏楊日晉妻少嫻內則通翰墨年二十寡哀毀欲絕服喪三年不一理髮撫遺腹女與

孀姑相倚爲命有求婚者峻拒之堅貞之性百折不回歷三十餘年如一日

周氏謚女年十六適生員莫賢樸生一子掄踰三載夫亡矢志守節賢樸少失怙恃祖母年老惟依叔嬀撫育周事之如姑嬀歿遺孤聯標鞠如己子延師訓誨與子並列黌宮
祖姑亡喪葬如禮乾隆六年旌

吳氏黃鑑妻年二十鑑卒舉遺腹子家貧吳日耕夜績以事翁姑翁姑歿夫妹二人尙幼
提攜長大出已奩以嫁之乾隆八年旌

許氏舉人黃鐸妻貢生元坊女年二十四鐸卒三月舉遺腹子翁姑相繼亡許力舉三喪
性好周急鄉里有婚喪無措者多沐其惠乾隆八年旌

王氏生員徽育女年十八歸黃鏞二十五鏞故遺孤甫週歲王冰蘖矢志事舅姑孝夫弟
鐸歿與姒許氏勸節撫孤一門雙節鄉里賢之乾隆九年旌

周氏舉人景之女廩生莫阮妻年二十七阮故子綱章絢章俱幼周矢志不二事祖姑及
舅姑養葬盡禮夫弟與姒連喪遺孤姪二人鞠育如子俱成立乾隆十一年旌

許氏王鉉妻年二十一夫亡矢志事翁姑撫姪爲嗣夫弟與婦繼歿遺一孤保養如己子

乾隆十一年旌

王氏生員吉士女庠生莫豫魁妻年二十五夫歿藐孤二人在襁褓王誓死守志事親撫子孝慈無間更推一子爲夫兄後未幾二子相繼亡與二媳艱難撫孤乾隆十四年旌陳氏生員輅之女年十七適黃正基常以不逮事翁姑爲恨懸遺像於庭必先薦而後食越九載正基死易簪珥治喪遺孤僅八月紡績自給或勸其再醮泣曰吾若再適則藐孤饑寒而死黃氏之祀斬矣鞠子成立乾隆十五年旌

鄧氏王守正妻年二十五寡家貧菽水奉翁姑皆出十指翁姑亡弟妹俱穉提攜長成爲之婚嫁及夫弟生子鞠爲夫後苦節三十餘年乾隆十五年旌

程氏廩牛鶴之女年十七歸廩生王霽事翁克修婦道年十九霽故擇姪繼嗣以蠶織所出併鬻簪服營葬翁姑與夫三棺乾隆十七年旌

邱氏庠生廷褒女莫令模妻年二十寡柏舟自矢奉耄姑以孝稱撫子煜元燿元炯元俱列鬻序乾隆十七年旌

陳氏煥之女年十八適莫崇勳二十二夫故遺孤三歲矢志靡他事孀姑先意承志撫孤

姪如已出乾隆三十三年旌

吳氏增生必萃女庠生張奇勳妻年二十守志事祖及翁孝養備至二翁繼逝卜地安葬

擇嗣承祧乾隆三十五年旌

王氏吳運濟妻年二十五孀守事姑得其歡心立嗣承祧子歿遺孫與媳莫氏相依守節

五十年乾隆三十六年旌

莫氏廩生振昌女適陳廷鈺年二十夫故誓不改嫁舉遺腹子事姑唯謹娶媳後子隨歿

與寡媳撫孫足不出閨門者三十餘載乾隆三十六年旌

徐氏澄邁繼晁女許字庠生陳廷鎰年十九未嫁而鎰卒氏奔喪守貞嚙指自誓甘貧約

勤紡績以奉孀姑生養死葬曲盡其誠鄉里推為節孝卒年四十六

梁氏林挺松妻雍庠生莫沂妻雍廩生莫震元妻俱正十年旌劉氏正十二年旌邢氏縵章妻周氏乾隆四十五年旌方氏邱懋先妻乾隆王氏洪綱

妻乾隆五張元俊妻嘉葉氏莫紹宗繼妻李氏廩生張晉勳繼張氏庠生許官漢妻蘇氏王朝泰妻道光光

十年許氏廩生吳璿妻道杜氏莫元和妻道王氏張錦妻年二十二夫歿氏投王氏莫乾元妻道光十六年旌

陳文積妻道王氏胡景劉氏胡岫王氏胡章風妻俱道光二十八年旌

文昌縣

林氏邢光揚妻年二十而寡遺孤汝錫甫二歲撫之成立順治癸巳土賊劫掠執汝錫將殺之林罵賊母子遂同遇害

韓氏女父兆時年十七未字康熙四十七年海寇掠其家母潘氏以不辱被戕女乃給賊曰若脫吾父願以身從賊信之縱父歸將汚之女曰既以身質急何爲者賊又信之女望父去遠猝赴水死

張氏林家珀妻瓊山副貢世熹女年十七歸珀越一年寡克盡婦道尤謹母訓守志四十二年康熙四十七年旌

賴氏符先揆之婢符旺其夫也旺卒賴一痛而絕時年二十有二符氏生員符鴻飛之婢年二十痛夫朱老病卒飲泣絕食以殉雲氏許定斌妻康熙十二年海寇亂掠雲欲汚之不屈投海死

董氏曲阜人孔毓珠妻毓珠携家隨父興祥令文昌先卒興祥念子成病董割臂肉以進後翁亦不起扶二櫬回籍備嘗艱苦

陳氏雲志颺妻貢生陳宗趙女年十六歸雲踰年而寡遺孤方彌月矢志孀居養姑教子
歷三十六年以完節終康熙五十八年旌

邱氏生員陳天相妻年二十夫卒誓不改適事親撫孤以孝慈聞鄉黨稱之雍正元年旌
陳氏王宏基妻參政王懋德家婦年二十四夫故陳拮据食貧教子續祖補邑弟子員守
志四十餘年

陳氏舉人陳表孫女適雲姓早年孀守撫子四人俱成立氏操家政好行其德嘗推貲以
濟貧困壽九十餘終

李氏潘士利妻廩生李景亮女年十八生子守德甫五月而寡有韓姓者厚賄親族強委
禽焉李以死拒之葬夫訖攜孤廬墓側媳雲氏亦寡姑媳食貧訓誨子孫長孫孝感膺
歲薦邑令表曰節孝之門

陳氏鄭沿儒妻守備陳廷昭女歸鄭數月夫故遺腹生男嘉壘冰霜勵節與耄姑相依教
子食餼姑亡哀毀成疾卒里黨傷之

邢氏符公李妻年十九寡鞠孤恩勤事祖父母得其歡心艱苦備嘗卒年五十五

紀氏李日珍妻貢生應賢女年二十而寡矢志柏舟事姑以孝聞捐奩貲嫁夫妹子士備甫入泮又夭偕寡媳機杼度日閨闈肅然姑媳俱享上壽

符氏庠生應龍女年十八歸生員雲士武踰五年夫亡哀毀不欲生以舅姑泣勸得不死事親至孝撫孤志璽成立壽七十餘

林氏李開芳妻早年守節撫庶子如己出事翁姑至孝喪葬盡禮捐腴田入宗祠大義皎然壽九十餘邑令孔興祥旌曰冰清玉潔

林氏生員符天樞妻年十八生子應鳳踰月夫死守節事姑撫孤備歷艱辛貞操益勵應鳳列諸生邑令孔興祥旌曰霜清雪白壽七十八

范氏庠生雲士遠妻年二十三寡子志高尚幼爲兵所掠范孤苦養姑姑亡依母以居食貧三十年而志高忽歸已援例授職矣

許氏張洪佑妻年十九夫亡痛哭幾絕遺子文僅週歲茹苦守志事孀姑菽水承歡撫孤名列膠庠守節四十二年有司請旌

馮氏何文偉妻年十七適何三月夫故遺腹生子均堅守苦節備歷艱難事翁姑以孝著

教孤兒成立有司請旌表

邢氏張柄英妻年十六歸張二十一寡邢誓死守節毀容飾操井臼竭力以奉舅姑力舉

三喪獨任劬勞子鑾奎補邑庠年六十一有司請旌

陳氏女父名連通志作陳志賢有強暴脅之女羞忿仰藥死事聞旌表

葉氏韓淑騰聘妻未嫁淑卒曰吾豈以未合昏而有異志哉遂奔喪矢守祖翁以年幼無

子難之立志益堅奉祖翁盡孝垂老始立繼嗣有司請旌

符氏生員蔡宏俊妻年二十五寡守志撫孤事毫姑以孝稱有司請旌

葉氏潘箕命妻年十六歸潘數月夫亡誓以身殉翁泣勸止醫奩爲殯葬資勤女紅以奉

甘旨有司請旌

韓氏鄧昌琳妻年十五適鄧踰年夫歿堅志守節拮据葬夫事翁以孝聞有司請旌

林氏增生范京科妻年十五歸范踰四年夫故飲泣孀居事姑至孝撫姪承祧有司請旌

王氏生員林淮仁妻年二十一夫亡王矢志靡他孝養翁姑恩撫嗣子有司請旌

吳氏生員邢先時妻年二十寡勵志孀守淡薄自甘奉老翁孝謹撫藐孤仁慈有暴露棺

骸必為掩瘞常推食以周鄰里之乏邑令旌其門年七十餘終

韓氏雲在楠妻楠慷慨好施早卒韓冰霜自勵尤能體夫遺志邑修學宮捐金二百其姒
韓氏雲漢妻亦早寡守志捐金二百助工節義出於一門有司皆旌之

林氏韓健循妻年十九夫歿守節撫遺腹子成立卒年三十八

陳氏符振鏘妻嘉慶十三年旌邢氏雲子葵妻嘉慶十六年旌吳氏黃仕珍妻嘉慶二十一年旌雲氏武生韓明申妻嘉慶二十二年旌馮氏庠生林所堅妻道光元年旌王氏

吳必忠妻道潘氏韓貞彝聘妻道光九年旌史氏附生林詩正妻聘妻雲氏韓性翼聘妻韓氏王偉鍾妻韓氏雲子泰妻俱道光十一年旌韓氏林人瑯妻雲氏

庠生符賜言妻俱王氏林邦弈妻潘氏附生許耀鍾妻子居忠聘妻符氏雙節俱道光十三年旌林氏韓遵素妻林氏邢志進妻俱道光十四年旌唐氏雲崇續妻鄭

氏雲在潮妻道光十五年旌韓氏張維百妻道光十六年旌吳氏韓信葬妻韓氏黃樹本妻俱道光十七年旌符氏王則妻李氏雲茂玉妻雲氏許居所妻林氏

韓填韓衍附生韓邦輝妻俱葉氏蘇大銓妻道光十九年旌韓氏雲茂桂妻葉氏韓明翼妻葉氏潘有耀妻韓氏張有耀妻

十年陶氏林學源妻道光十九年旌王氏符世仁聘妻道光二十一年旌

會同縣

楊氏舉人應鳳女年十六歸庠生王家翰踰年而寡封髮自誓足不踰闕者七十餘年壽

過九十順治十六年旌

陳氏庠生李學文妻年二十四喪夫遺子三人家甚貧康熙三十四年歲歉往貸母家迫之更嫁矢志靡他遂仰藥死縣令年文煥輓以詩并勒石表其墓曰節烈

林氏楊源妻夫亡無子立嗣爲後甘守窮約冰操凜凜事翁姑三十餘載孝著里閭年踰六旬乾隆二年旌

王氏廩生馮瑜妻年二十六瑜卒王堅志守節立繼承宗侍舅姑色養兼備閨門整肅人無間言壽八十乾隆四年旌

王氏黎敷妻年二十七夫故雪霜勵操孝養翁姑教二子均列膠庠壽八十三乾隆六年旌

李氏生員王雋成妻年十八喪夫冰蘖自矢事耄翁養葬盡禮撫繼子訓成立壽七十三乾隆七年旌

何氏晉洩妻年二十一寡誓不再適生遺腹子恩勤撫字舉未葬六棺婚夫之兩弟皆獨任其勞閨門雍穆聲著里黨壽六十六乾隆十二年旌

張氏何嗣葵妻年二十二夫故張柏舟矢志撫姪爲嗣竭誠以奉二親歷久不懈苦節四

十八年乾隆十三年旌

王氏庠生符業銘妻年二十夫歿撫孤成立甘節五十八年乾隆十七年旌

符氏庠生王元錫妻年十九夫亡事親鞠孤孝慈無間子死又撫孤孫備歷艱苦五十八

年乾隆十八年旌

楊氏馮瑀妻年二十二寡松筠矢節覓甘旨養翁姑篝燈課幼子孀守四十年全節無玷

乾隆二十九年旌

林氏梁九華妻年二十二夫喪有勸其改適者林剪髮毀容矢志孀守足不踰闕者四十

餘年乾隆三十一年旌

施氏庠生馮斯燧妻乾隆三十七年旌

王氏黃國棟妻嘉慶十九年旌

李氏邢瑄妻道光十二年旌

王氏庠生楊永宦妻道光十四年旌

許氏

韋基龍妻

林氏

邢泮昭妻俱道光

光十九年旌

樂會縣

楊氏莫獻珪妻年十八夫亡柏舟矢志孝事舅姑擇嗣承祧守節三十餘年雍正六年旌

陳氏何龍焜妻年十六歸焜越二年夫歿潔志守義克盡婦職孀居四十餘年以節孝聞

雍正六年旌

王氏生員周從吾妻從吾為海寇陳朝選所掠踞其室將污之王不辱自縊死

蒙氏翁琳妻年二十夫死孝事翁姑孀居四十餘年完節無玷乾隆十三年旌

黎氏生員王宏才妻宏才溺死新寨河黎痛哭欲往從死以翁姑泣勸而止苦節撫子翰

文成立乾隆十四年旌

何氏王演妻年十七夫歿矢志不二勤辟績奉姑盡孝德乾隆三十七年旌

馮氏王殿龍妻年十九夫亡守節事翁姑孝謹孀居三十餘年乾隆三十八年旌

黃氏陳宗舜妻年十九夫亡刻勵守義四十餘年全節無虧乾隆三十九年旌

王氏韋之圭妻年二十五守節撫子恩勤備至非婚喪大故足不出戶庭卒年五十八

何氏陳朝佐妻年二十三夫亡矢志守節父母欲奪而嫁之何詣夫塋痛哭欲絕歸自經

於室

龍氏

王廣選妻嘉慶十三年旌

周氏

宋朝紳妻

符氏

候選訓導王模妻

黎氏

王廷槐妻

姚氏

王永奎妻

何氏

郭學修妻俱道光七年旌

吳氏

王杞妻道光十二年旌

臨高縣

陳氏年十四許字王家瑛瑛孤貧力學十七補弟子員未娶而夭陳聞訃卽縞素奔喪持家瑛衣誓以死殉遂閉閣不食唯嚙其衣而死

李氏貢生兆英女年十八歸庠生馮廷選踰二載夫亡遺孤甫二月有勸之他適者李變色曰婦人從一而終吾肯以一身事二人乎志益堅日勤女工鉛華弗御課子兆麟成名孀居五十八載乾隆五年旌

符氏廩生王峻極妻年二十四夫故二子尙在襁褓矢志守貞事翁姑養葬盡禮子長就外傳勤紡績以資膏火督課甚勤長一聖恩貢次一賢選拔年八十三終乾隆六年旌
王氏生員林耀峨妻年二十三寡事瞽姑以孝聞撫孤文懋文憲俱列庠序乾隆十年旌
陳氏廩生吳廷甲妻貢生發徽母年二十二夫故柏舟勵節撫嗣子教養成立經營家計日事蠶織以奉翁姑鄉里賢之乾隆十一年旌

李氏年十八歸庠生薛振龍生子彥士振龍病篤李侍湯藥不懈適海寇夜劫鄉人皆遁夫令逃李曰病人坐臥不安可離人耶脫有悞悔將何及吾肯貪生而忘義乎卒不去

賊亦不至其室踰年夫喪誓死守節事耄姑撫穉子孝慈備至壽八十六乾隆十二年
旌媳王氏歸彥士七年而寡遭家多難與姑竭力支持撫孤廷幹食餼姑歿喪葬盡禮
壽七十乾隆三十八年旌

王氏庠生世榮女許字黎必明未婚必明死王年十六聞訃奔喪欲殉念翁姑在堂家無
次丁矢志奉養力紡績以佐甘旨翁姑歿喪葬畢閉戶自縊時年二十有五

儋州

李氏

儋州志
作項氏

王尙策妻山東人康熙初緣事成儋病卒李預治同殯具自縊以殉

羊氏蔡元明妻年二十五夫故妾羊氏生子昌祚甫三歲嫡庶勵志守節飲冰茹荼教子
成立爲庠生孫公弼亦遊泮

胡氏吳之仲妻廩生胡庠女幼歸吳奉姑以孝年二十八夫故堅貞自持以詩書課子家
貧無僕每自攜粥詣館餉子珩名列庠序壽八十四

羊氏生員符景星妻年二十歸符越四載而寡僅遺一女撫姪繼嗣孝事翁姑持身嚴肅
和順妯娌四十餘年人無異議卒年六十六

何氏甘禹妻年二十四夫亡撫姪爲嗣勵志守節孝事翁姑孫元登食餼壽七十二卒

曾氏謝遇春妻年二十二夫故撫姪承祧事翁姑以孝聞備歷辛苦四十七年全節無玷

羊氏黃甲林妻年二十六夫卒冰霜矢志事翁以孝聞撫藐孤河照膺甲午鄉薦翁歿拮

据殯葬里閭稱之乾隆三十四年旌

羊氏薛國偉妻龍川訓導顛女年二十適薛踰年生一女夫亡撫姪承祧勤女紅以養舅

姑捐己奩以嫁夫妹乾隆三十四年旌

何氏庠生梁國頤繼妻年二十七夫卒何食貧守節事祖母與姑喪葬盡禮撫前室子同

己子均成立乾隆三十五年旌

王氏

庠生沈鏞妻

胡氏

沈培妻俱乾隆四十一年旌

蔡氏

邢登第妻乾隆五十三年旌

詹氏

李鍾岳聘妻嘉慶二十四年旌

樓氏

邱現琪妻道光八年旌

昌化縣

沈氏生員吳日巽妻武宣教諭沈心融女年二十寡苦志守節壽八十二順治九年署縣

徐斌暉詳院賜匾曰柏舟繼美每月給米贍之

萬州

李氏楊沂妻年十九而寡冰雪自矢守志四十餘年完節無玷州牧雷凍詳請旌表

曾氏庠生歐畧妻年二十二夫亡辛苦守節篝燈課子不以家貧易其志壽八十二

陳氏士秀女少失怙恃依兄舜典後舜典以罪發遣嫂又故陳矢志不字撫孤姪男女婚

嫁一以己任之卒年六十餘

陳氏增生黃上苑妻年二十而寡家貧守節不渝年六十三卒

陳氏楊士緘聘妻乾隆六十年旌楊氏李應垣妻嘉慶九年旌許氏卓儒珍妻嘉慶十三年旌

陵水縣

陳氏顏德備妻年二十夫歿立志不二生遺腹子未幾殤擇姪繼嗣勤織紉以養姑姑病

醫藥罔效或語以山猪腹可療購之不得號泣於野忽有山猪負箭奔蹶獲之歸取腹

奉姑病遂愈族人憐其貧以祖祠田二畝與之每歲倍穫人以爲孝感所致卒年四十

有八乾隆三十五年旌

羅氏庠生曾備一妻萬州庠生羅憲章女時黎寇劫掠氏挈子以避中途遇賊捽其髮至

檳榔園欲污之不可擲子於地抱樹痛罵賊怒剖其腹而去

陳氏林天福妻由文昌遷陵水苦節自守嚴訓子孫均成立年百有一歲人稱爲貞壽邑令張永熹特表其門

鄧氏

通志作邱氏

萬文燦妻年二十四寡撫孤甫長早卒又訓育遺孫年芳膺貢選芳卒又撫

曾孫元聖成立年九十八終

崖州

慕容氏生員蕭士彥妻開平訓導正傳之母年十八歸蕭敬事翁姑三載夫亡杜門紡績父母欲奪其志截髮自誓撫遺孤登仕籍年六十卒順治十六年旌

裴氏陳克書妻歸陳甫及門陳故堅持大義誓不他適家淡薄勤紡績以奉孀姑姑死營葬盡禮擇嗣承繼苦志三十餘年州牧朱請旌

符氏生員王幹臣妻年二十四夫故遺子在襁褓符勵志守節子燦稍長延師訓迪食餼於庠年八十餘州牧宋錦旌之曰節壽雙高

陳氏顏膺寵妻年二十三夫卒遺孤可伸辛勤教育不令與家計既入州庠猶惓惓勗其力學卒年七十三

黃氏年十八適儋州庠生羅克譽甫三載克譽歿無子翁姑憐其年幼命改嫁不從奉翁姑克盡婦道夫弟三人俱幼撫養提攜爲之完娶後遷居岷州年六十卒

何氏李汝璫妻年二十二夫亡遺男僅週歲家貧姑勸改適不從子三歲而夭又勸之矢志彌堅辛勤織紝以養姑姑死哀毀骨立竭力殯葬鄉里賢之州牧宋錦旌其廬

曾氏庠生映星女適生員潘元璋年二十夫歿無子有富室求婚者曾日夜痛哭嚴詞拒之擇立繼嗣鄉里咸稱其節州牧宋給匾旌獎

陳氏庠生廷燦女年二十二適尹商儒五月商儒故家貧無措復歸依母家生遺腹子母欲奪其志陳守益堅辛勤撫子州牧宋旌之

陳氏林基發妻年二十歸林三年夫歿生子僅五月以貞節自矢孝事翁姑義方訓子歷久不渝州牧宋旌之

感恩縣

林氏女名茗黃年十六未字色殊麗有匪人矚而猝犯之死焉嘉慶二十年旌

瓊州府志卷之三十八

藝文志一 勅表疏

勅

宣諭海南勅

明洪武

蓋聞古先聖王之治天下也一視同仁無間遠近况海南海北之地自漢以來列為郡縣習禮義之教有華夏之風者乎頃因元政不綱群雄並起朕舉義除暴所向廓清邇者師臨南粵爾諸州郡不煩於傳檄奉印來歸向慕之誠更可嘉尙今遣使者往諭朕意爾其益盡乃心以輯寧其民爵賞之錫當有後命

勞海南衛指揮勅

明洪武

南溟之浩瀚中有奇甸方數千里歷代安天下之君必遣仁勇者戍守地居炎力多熱少寒時忽瘴雲埋樹若非仁人君子豈得而壽耶今卿等率壯士連歲戍此朕甚念之今差

某往勞

勅報督臣奏瓊州五色雲見

雍正八年

上諭廣東瓊州於三月十八日祥雲朗耀煥彩緒紛自卯達辰經歷兩時之久年來奏報慶雲者甚多朕並未以為祥瑞屢降諭旨勸勉地方官民各修職業益加黽勉以迓天庥

勅報督撫臣奏瓊黎歸化

雍正八年

上諭生黎誠心向化願附版圖朕念其無田可耕本不忍收其賦稅但既傾心依嚮若將丁銀全行豁免恐無以達其輸誠納貢之悃忱將遞年每名輸納丁銀二分二釐之數減去一分二釐止收一分以作徭賦地方文武大臣時時訓飭所屬有司員弁等加意撫綏悉心教養務令安居樂業各得其所以副朕胞與地方之至意

勅賑恤崖州感恩陵水災傷

乾隆六年

上諭內閣朕聞廣東崖州及感恩陵水二縣今夏雨水短少迨後雖經得雨而為日已遲播種

不能遍及撫臣王安國雖飭州縣官發穀借糶以資接濟而彼地連年歉收其極貧之民無力借糶者仍苦不能餬口深可軫念著該督撫即飭有司加意賑恤務令窮黎不致失所又聞瓊州雷州二府屬于本年八月十四五日風雨大作吹揭瓦屋其田禾室廬有無損傷之處亦著酌量辦理

勅免瓊州牛薪等項無著稅銀

乾隆十一年

上諭內閣廣東瓊州府屬應徵牛薪等項稅銀四千二百餘兩據該督撫查奏此項稅銀內有無著銀一千七百餘兩實係畸零小戶難以照舊派徵等語朕思牛薪等項稅銀雖載在全書例應徵納今既查明此內有無著銀兩若按額徵輸民力未免拮据著將廣東瓊州所屬應徵牛薪等稅內無著銀兩加恩永遠豁免俾邊海貧民不致有追呼之擾

勅開墾瓊州荒地

乾隆十八年

上諭內閣據廣東巡撫蘇昌等奏稱瓊州爲海外瘠區貧民生計維艱查有可墾荒地二百五十餘頃請照高雷廉之例召民開墾免其陞科等語著照該撫等所請查明實係土著貧民召

令耕種免其陞科給與印照永為世業仍督率所屬妥協辦理庶土無遺利俾該處貧民得資種植

勅撫卹颶災

嘉慶二十五年

上諭據阮元等奏粵東濱海地方本年九月間猝被颶風大雨雷州府屬之遂溪縣被災較重雷州府屬之海康徐聞高州府屬之電白茂名吳川瓊州府屬之瓊山陵水各縣被災較輕委員酌帶司庫銀兩會同該府縣等分投查勘妥為安撫遂溪縣淋濕倉穀分別曬晾出糶城垣衙署營汛等項各有倒塌坍塌損勘驗彙辦等語粵東猝被颶風大雨雖據該督等查明勘不成災其田禾被淹收成亦無妨礙惟高廉二府僻處海濱瓊州孤懸海外該督等現經派員將吹倒民房及沈溺商漁船隻傷斃大小人口確實查勘務妥為撫卹不可稍有諱飾致令災黎失所其淋濕倉穀及損壞城垣等項查明照例辦理將此諭令知之欽此

表

到昌化軍謝表

宋蘇軾

今年四月十七日奉被告命旨授臣瓊州別駕昌化軍安置臣尋於當月十九日起離惠州至七月二日已至昌化軍者並鬼門而東驚浮瘴海以南遷生無還期死有餘責伏念臣頃緣際會偶竊寵榮曾無毫髮之能而有邱山之罪宜三黜而未已跨萬里以獨來恩重命輕咎深責淺此盖伏遇陛下堯文炳煥湯德寬仁赫日月之照臨廓天地之覆育譬之孺童稍賜矜憐俾就窮途以安餘命而臣孤老無託瘴癘交攻子孫痛哭於江邊已爲死別魍魎逢迎於海上豈許生還念報德之何時悼此心之未已俯伏流涕不知所云

自昌化軍量移廉州謝表

蘇軾

使命遠臨初聞喪膽詔辭溫眷亟返驚魂拜望闕廷喜溢顏面否極泰遇雖物理之當然昔棄今收豈罪餘之敢望服膺知幸揮涕無從伏念臣頃以狂愚再罹譴責荷先朝之厚德寬蕭律之重誅投彼遐荒幸逃鼎鑊風波萬里嘆衰病以何堪煙瘴五年賴喘息之猶

在憐之者謂之已甚嫉之者恨其太輕考圖經止曰海隅其風土疑非人世食有并日衣無禦冬淒涼百端顛躓萬狀恍若醉夢已無意於生還豈謂優容許承恩而近徙雖云僥倖實無夤緣茲蓋伏遇陛下道本生知聖由天縱舊勞於外爰及小人之依堪家多艱監於先帝之德奉聖母之慈訓擇正人而與居凡有嘉謀出於睿斷憫臣以孤忠援寡察臣以衆忌獲愆許以更新庶使改過天地有造化之大不能使人之再生父母有鞠養之恩不能全身於必死報期碎首言豈渝心濯去泥塗已有遭逢之便撥開雲日復觀於變之時此生敢更求榮處世但知緘默臣無任云云

進大學衍義補表

明大學士邱濬
濬瓊山人

臣竊見宋儒眞德秀所撰大學衍義四十三卷於大學八條目中有格物致知之要誠意正心之要修身之要齊家之要而於治國平天下之要闕焉臣不揆愚陋竊倣德秀凡例採輯五經諸史百氏之言補其闕畧以爲治國平天下之要立爲十二目曰正朝廷曰正百官曰固邦本曰制國用曰明禮樂曰秩祭祀曰崇教化曰備規制曰慎刑憲曰嚴武備

曰柔遠方曰成功化又於各目之中分爲條件凡一百十有九共爲書一百六十卷補前書一卷目錄三卷總一百六十四卷名之曰大學衍義補所以補德秀前書之闕也前書主於理而不出乎身家之外故其所衍之義大而簡臣之此書主於事而有以包乎天地之大故所衍之義細而詳其詳其簡各惟其宜若合二書言之前書其體此書其用也今已繕寫完備謹撰表文一通附寫卷首以進伏念臣濬遠方下士叨冒朝廷厚祿六轉官階以至今官一家溫飽三十餘年今年近七旬常恐一日委命九泉有負國恩無以爲報幸天假之以年以衰朽之餘任師儒之職無政務之擾得以暇日纂成此編第以性質昏庸學識迂僻加以老耄精力衰憊所見不能無偏所纂不能無誤然區區一念忠君愛國之誠蓋有出於言語文字之外者况臣所纂輯者非臣之私意杜撰無一而非古先聖賢經書史傳之前言往事也參以本朝之制附以一得之愚雖曰掇拾古人之緒餘亦或有以裨助聖政之萬一伏望皇上寬其妄作之誅察其願忠之意於清閒之燕時賜省覽遇用人則檢正百官之類遇理財則檢制國用之類與凡臣庶有所建請朝廷有所區處各隨其事而檢其本類則一類之中條件之衆必有古人之事合於今時之宜者矣於是審

而擇之酌古準今因時制宜以應天下之變以成天下之務而其大要則尤在於審察其幾微之先焉易曰惟幾也故能成天下之務此臣妄意著書之本指也臣之精力盡於此書皇上親政之始而繕寫適成盖有幸然也冒昧進獻不敢自謂其皆可用儻採於千百之中用其一二見於施行以成治效使臣平生竭力盡瘁報國之忠得以少效其萬分之一則臣學爲有用而歿爲不朽矣臣不勝懇悃願效之至

進珠崖錄表

明知
府人
王佐
瓊山人

臣佐言竊見古珠崖地乃今瓊州府十三州縣也唐虞三代未入禹貢職方漢武帝元鼎五年平南越明年始與南海等並立九郡爲內地漢不擇守者因鄙夷其民治之不以道遂致郡縣陷沒復爲裔土終兩漢之世以迄六朝五百餘年唐宋鑿漢失選守牧治以內治數百年間遂成雅俗衣冠文物與中州等元始以土人爲官分管州縣兵民卒受其弊九十三年之治無足觀者我朝聖聖相傳百年以來風移俗易嬾美唐宋蔑以加焉伏觀太祖玉音嘗稱海南爲南溟奇甸又稱其習禮教有華夏之風天語昭回照耀今古豈容

既死之奸邪欲分事權乃敢分裂我祖宗之土地人民輕與土人做人情用濟其私以貽後患者乎昔已痛革今復舉行承襲無窮何時能已此乃一方臣民所不再聞而痛恨者臣自恨衰老之年無由報効竊念海南自漢至今珠崖事體以遠方之故多所缺畧敢味萬萬死罪詳考歷代國史珠崖治亂典故併今臣愚昧所及不避斧鉞之誅謹編爲珠崖錄一冊庶以盡海南曲折事情除具本另奏外謹奉表進獻者伏以嘉禾布畝豈容稂莠之兼雅樂在堂難奏鄭衛之曲人物一理治亂同推蓋伏遇陛下睿知聰明聖神文武紹述堯舜憲章祖宗位當有臨而歷代所存德全廣運而典謨斯在人臣但當遵奉以爲彝訓豈可妄作而亂舊章所恨既往之奸邪貽患後來之境土既援土酋敵州縣以分本府之權復誘良民爲梗化以益土酋之勢覬覦今之列土比擬古昔諸侯豈知事勢不同況乎人亦難概天下既是共尊一主政事豈宜分爲兩家掣肘尙有難行敵體豈堪爲治譬人十指既足便是全軀又復駢拇多餘終爲剩物適以碍體豈能益人况珠崖延袤道里三千漢朝失地於前元人誤事於後漢之失地由於孫幸之父子本非治郡良材元之誤事由於至元之君臣不識中華事體捐棄南服三千里之封疆而爲海外五百年之廢地

此非漢之失而誰失哉多餘瓊管十三翼之冗濫而開海南千百年之弊源此非元之誤而誰誤也唐宋之治效雖有加焉漢元之失誤所當鑑也前姦造罪既往轍之難追後人效尤敢來患之不慮况又事關邊患恐其難報國恩敢獻一得愚衷上瀆九重睿覽伏願明目達聰廣視聽於四海求言納諫來忠直於萬邦俾芻蕘得以盡其誠而姦邪無由害其正邊臣咸服祖訓尊所聞而行所知邊民不忘前王樂其樂而利其利澤衍萬年之運德參兩儀之功臣謹以所編珠崖錄一冊隨表上進以聞

臣等竊惟我朝設官分職以治天下而治天下之要莫先於用人用人之要莫先於知人知人之要莫先於聽言聽言之要莫先於納諫諫之要莫先於求忠直於萬邦俾芻蕘得以盡其誠而姦邪無由害其正邊臣咸服祖訓尊所聞而行所知邊民不忘前王樂其樂而利其利澤衍萬年之運德參兩儀之功臣謹以所編珠崖錄一冊隨表上進以聞

疏

請建景賢祠疏

正德十年

明劉春

竊惟崇祀先賢非但表章於既往實以激勵於將來已故少保兼太保戶部尚書武英殿大學士謚文莊邱濬起自甲科歷事列聖惓惓以經世宰物忠君報國爲心修職之暇著書垂訓今考其學的世史正綱蓋欲學者首明綱常以端本原而大學衍義補則皆酌古準今隨事制用期於應變以成天下之務誠用世之學於世教非小補也晚入內閣志見於行非空言者不久而沒人感惜之若不崇祀表揚何以風示天下訪得瓊州府見建有奇甸書院州人以宋學士蘇軾謫爲是州別駕時作書推明絕學以啓迪邦人至今思慕建祠設主私祀於中合行該府量爲修飾而增設邱濬神位每歲春秋致祭庶海內之士聞風感慕學於家者當務有用而仕於時者當思建功於國家用賢圖治之意不爲無補矣

請改海南兵備道兼提學疏

明尚書
王宏誨定安人

竊惟今天下稱邊遠而苦多事者則廣東是已而廣東所屬最遠而苦者尤莫如瓊州瓊州去京師水陸計將萬里上官大吏終歲不至其地中間吏情民隱蔽而不獲上聞者常十而九姑不具述獨儒生之苦乃臣生長於斯自少所稔聞而身歷者感激一念積有歲年幸今叨蒙國恩備員史館復際聖化雍熙四海章縫輩舉蒸蒸然仰見德化之成而臣海邦儒生苦切至情遠望天門無由自達故敢不避斧鉞披瀝爲陛下陳之該瓊州府所轄地方爲州者三爲縣者十環海而周爲里者凡三千有奇青衿學子每歲集督學就試者不下數千計然遠涉鯨波之險督學憲臣常不一至每大比年駐節雷州行文調考自瓊抵雷航海而北近者如瓊山定安文昌澄邁臨高會同樂會七縣或二三百里或四五百里遠者如儋萬崖三州陵水感恩昌化三縣多至七八百里或千餘里貧寒士子擔簦之苦已不待言及其渡海率皆蜚航買舶帆檣不飾樓櫓不堅卒遇風濤全舟而沒者往往有之異時地方胥靖所慮者風波耳邇來又加以海寇出沒歲無寧時每大比年揚揚

海上儒生半渡盡被其擄貧者殞首而無還富者傾家而取贖其幸無事者皆出一生於萬死耳言之可爲痛心至於督學憲臣多不知其苦祇執常格嚴程限試諸生迫於期會不憚危險所傷甚多如嘉靖三十有六年覆沒者數百人臨高知縣楊址與焉併失縣印可爲往鑿間有一二提學能體卹亦不過行文該府截考夤緣作弊黜陟不舉考察不行教化廢弛士習厭怠甚如隆慶三年恩貢例惟瓊山定安澄邁會同等三四縣考餘各州縣以一時遠不及試竟置不錄致使朝廷浩蕩之恩遠方士子未獲霑被臣竊觀天下儒生之遠而苦者未有如瓊之甚者也查得陝西甘肅地方先因隔遠提學巡歷不周改屬該御史至今稱便瓊州之遠無異甘肅而艱難險阻抑又倍之揆之事體誠爲相同即今巡按提學俱不至而海南道額設有兵備副使一員駐筭本府臣以爲此事爲誠宜屬之伏望皇上敕下該部如果臣言不謬卽照甘肅截考事例改海南兵備道兼管提學道換給敕命每遇員缺必選科甲之有學者充之其瓊州一帶師儒考試巡察任其便宜行事如此庶見聞習而人材之賢否不淆法度新而德化之流行不壅矣

平黎疏

明提學副使右參政

鄭廷鵠

瓊山人

瓊自開郡以來迄今蓋千六百餘年無歲不遭黎賊之害然未有如今日之慘者也蓋其盤山踞峒其中州縣反爲之外捍是彼無外寇也食飽棄餘狼悍豕突至虔劉我人民坑陷我官軍是我有內憂也其地彼高而我下彼膏腴而我鹹鹵其勢彼聚而我散彼無外寇而我有內憂則州縣之兵罷於奔命何日而有息肩安枕之地哉臣生長地方竊嘗訪之故老得之征人聞其出戰之時人挾數矢以一當百無不應弦而倒者矢盡力窮遂竄身荆棘中獸奔鳥伏故我軍至有臨險欷歔而止爾故前日倡亂不過止強石松諸賊其勢尙孤今連昌化感恩之寇其黨日熾若進兵非調狼目募打手加集數萬人不可臣聞成功在勇圖揆在謀克捷雖難經畧爲上臣嘗考今昔勦除黎患者見二大舉焉元至元辛卯黎叛十月渡師又明年七月深入黎巢盡空又明年春刻石五指黎婺山而還中間雖二經變故而謀不亂卒以成功可謂捷矣但元夷俗得罷棄之猶能奏置屯田府立定安會同二縣至今衣冠文物稱爲名邑此以知其可經畧也又前嘉靖十九年黎叛後軍

陷沒請兵討之明年大渡師徒十二月直破其巢崖州諸峒無處不至未嘗不大捷也但班師太早漏網數多誠有如前奏各官所言者當時識者見賊巢德霞平衍可耕可守擬建州縣招集新民以絕異日之患然一時失議遂爾毀成故黎賊一聞兵出相率歸巢兵散於前賊聚於後謂官軍能捷而不能守故也欲其不爲今日再舉之害其可得乎此以知其不經畧之害也故臣不患成功之不早惟患圖揆之未周不患克捷之無日惟患經畧之無術何也螻臂徒張其技有限蟻封雖密其險可夷徒以激於有司殺人無數遂以肆行無忌爾今文武之臣戮力同心一旦大軍臨之勢如破竹但願先事要在圖揆後事要在經畧深以前車爲戒始不貽後日之悔也何謂圖揆謹條三事嗟黎地方大勢南出崖州西出感恩西北出昌化北抵凡陽黎岐東通郎溫嶺脚二峒然二峒實萬州陵水之衝地形外險內實坦夷賊若被攻甚急其合二峒以擾我陵水必矣爲計當先分奇兵由陵水以攻二峒彼二峒之賊自救不暇然後大兵直擣崖賊巢穴使其黨渙於東勢分於西莫知端倪自相疑貳而風霆之下悉可擒也此其所當圖揆者一也前奏又云元惡那燕等已入凡陽構集岐賊此或有之但恐其所構集或即郎溫嶺脚之賊也蓋此賊十九

年陷我軍不數日羅活賊黨即傳箭崖州徵納百牛袍宥賊黨即傳箭九所屯亦然其與之搆禍通謀久矣此或嫁禍黎岐以多方誤我或聲言搖惑以堅黎岐助逆之心皆未可知此其所當圖揆者二也黎賊原無奸細其消息動靜出於所轄土舍故百年之禍皆土舍釀成之黎將附籍州縣百計沮撓有司或失黎心多方煽惑已成禍變又走泄軍機若使嚮導我軍遂道迂迴險阻以致陷沒如成化時之王道乾前歲之符文龍是也防杜之術不可不謹又發軍輿制所貴不擾而首功之數不可預定此則用兵之事所當圖揆者三也何謂經畧謹條三事一曰一勞永逸之計夫瓊人與此賊共此土也數年一反數年一征雖往往克捷所傷多矣天地之心並生育豈若馴以縲籠置之莊嶽易介鱗而爲衣冠是誠有望於今神武之化獻馘之後願招集新民定以約束因其勢而利導之多興學宮禁挾弓矢使不得復爲狼豕之態則堯舜之世尙復有黎哉尙復有反且征者哉若徒得而棄之不復經畧如前歲所爲反滋今日之禍則興兵動衆終無安時真大鑒也二曰恢復啓土之功臣按崖州輿地本自數百里也故西一百五十里有隨延德縣址東南一百三十里有唐臨川縣址東五十里有唐落屯縣址西一百里有漢樂羅縣址感恩東北

七十里有宋鎮州址原附郭有鎮寧縣址今俱在賊中所當恢復者也况又有德霞之膏腴千家羅活之饒足招集之後願建州縣因以屯田且耕且守務廬其居而東南其畝又由羅活磨斬開路以達定安由德霞沿溪水而下達於昌化道路四達屋廬相望井里既定豈不爲國家增拓輿地哉三曰久任責成之道漢建武十七年馬援已平嶺南所至卽置城郭興水利條建封溪諸縣又申明漢律傳爲馬將軍故事至二十年秋始還豈不貴綏定之術乎願乘征討之餘威震懾山谷建參將府於德霞聯絡州縣亦如馬援故事治城郭興水利條奏便宜事務以鎮安人心其新附之民尙有異志者設法遷徙之或於海北地方屯田或於附近衛所入伍如漢徙澗山蠻七千餘口於江夏以永絕禍本徐求仁明之長慈惠之師奏留久任以終其事其庶幾乎瓊人萬世瞻仰在此一舉臣待罪諫垣以言爲職知而不言罪也况切臣鄉土聞見且眞言而不詳亦罪也故敢干冒天威伏望勅下兵部再加詳議

藝文志二 記上

伏波廟記

蘇軾

漢有兩伏波皆有功德於嶺南之民前伏波邕離路侯也後伏波新息馬侯也南越自三代不能有秦雖遠通置吏旋復爲彘邕離始伐滅其國開九郡然至東漢二女子側貳叛嶺南振動六十餘城時世祖初平天下民勞厭兵方閉玉關謝西域况南荒何足以辱王師非新息苦戰則九郡左衽至今矣由此論之兩伏波廟食於嶺南均矣古今所傳莫能定於一自徐聞渡海適珠崖南望連山若有若無杳一髮耳艤舟將濟股慄魄喪海上有伏波祠元豐中詔封忠顯王凡濟者必卜焉某日可濟乎必吉然後敢濟使人信之如度量權衡必不吾欺者嗚呼非盛德孰能如此自漢以來珠崖儋萬或置或否楊雄有言珠崖之棄捐之力也否則介鱗易我衣裳此言於當時可也自漢末至五代中原避亂之人多家於此今衣冠禮樂班班然矣其可復言棄乎四州之地以徐聞爲咽喉南北欲濟者以伏波爲指南事神其可不恭某以罪謫儋耳三年今獲還海北往返皆順風無以答神

卷三
一
貺乃碑而銘之曰至險莫測海與風至幽不仁此魚龍至信可恃漢兩公寄命一葉萬仞
中自北而南洗汝胸撫循民彝必精通自南而北端汝躬屈伸窮達常正忠生爲人英歿
愈雄神雖無言我意同

峻靈王廟記

蘇軾

古者王室及大諸侯皆有寶周有琬琰大玉魯有夏后氏之璜皆所以守其社稷鎮其人
民也唐代宗之世有比邱尼若夢恍惚見上帝得八寶以獻諸朝且傳帝命曰中原兵久
不解腥聞于天故以此寶鎮之卽改元寶應是以知天亦分寶以鎮世也自徐聞渡海歷
瓊至儋耳又西至昌化縣西北二十里有山秀峙海上石峯巉然若巨人冠帽西南向而
坐者里人謂之山胳膊而爲漢之世封其山神爲鎮海廣德王五代之末南彝有望氣者
曰是山有寶氣上達於天艤舟其下斲山發石以求之夜半大風浪駕其舟空中碎之石
峰之右彝皆溺死儋之父老猶有及見敗舟山上者今獨有石存焉耳天地之寶非人
所得睥睨者晉張華使其客雷煥發豐城獄取寶劍佩之終以遇禍坐此也今此山之上

上帝賜寶以奠南極而貪昧無知之彙欲以力取而已有之其誅死宜矣元豐五年七月詔封山神爲峻靈王用部使者承議郎彭次雲之請也紹聖四年七月瓊州別駕蘇軾以罪譴儻至元符三年五月詔徙廉州自念謫居海南三載飲鹹食腥凌暴雨颶霧而得生還者山川之神實相之謹再拜稽首西向而辭焉且書其事碑而銘之山有石池產有紫鱗民不可犯石峰之側有荔枝黃柑得就食持去卽有風霆之變銘曰瓊崖千里塊海中民彙錯居古相蒙方壺蓬萊此別宮峻靈獨立秀且雄爲帝守寶世嚴恭庇廕嘉穀歲屢豐大小逍遙逐鰕龍鷄鵠安棲不避風我浮而西今復東碑銘赫然昭無窮

惠通泉記

蘇軾

禹貢濟水入於河溢爲滎河南曰滎陽河北曰滎澤沱潛本梁州二水亦見於荊州水行地中出沒數千里外雖河海不能絕也唐相李文饒好飲惠山泉置驛以取水有僧言長安昊天觀井與惠山泉通雜以他水十餘缶試之僧獨指其一曰此惠山泉也文饒爲罷水驛瓊州之東五十餘里有三山菴下有泉味類惠山泉東坡居士過瓊菴僧惟德以水

餉焉且求爲之名名之曰惠通元符三年六月十七日記

威武廟碑陰記

宋李綱

故翰林學士承旨蘇公謫儋耳既北歸作伏波將軍廟碑言兩伏波皆有功德於嶺表廟食海上爲往來濟者指南辭意瓌偉自作碑迄今逾三十年未克建立蓋闕典也綱以罪謫官萬安行次海濱疾作不果謁祠下遣子某攝祭病臥館中默禱於神異時倘得生還往返無虞當書蘇公所作之碑刻石廟中使人有所觀以答神貺時建炎三年十一月二十有四日也既得吉夜半乘潮而渡翼日次瓊筦恬無驚憂後三日祇奉德音蒙恩聽還疾良愈躬禱行宮卜以十二月五日己丑北渡不吉再卜六日庚寅吉果己丑晝風霾大作庚寅乃息日中潮來風便波平舉帆行安如枕席海色天容軒豁呈露不一時已達岸乃知神之威靈盼蠻昭著若此蘇公之言信不誣也次雷陽書碑施金委郡守董侯總其事大書深刻垂之無窮且敘所以蒙神之優者志碑陰式告觀者正廟新息馬侯也宣和中詔封佑順王別廟邳離路侯也宣和中詔封忠烈王皆在蘇公作碑之後故併記於此

瓊州通守劉公創小學記

宋莊 方

古者以教學爲先有大學有小學王畿置小學辟雍之側其在侯服邦國則列之頻宮之右六年教以方名十年學書計十有三年學樂誦詩舞勺十有五年舞象學射御學成有秀異者移諸庠序自庠序移之小學由小學貢天子其不躋等若此國朝崇飭人文學校徧天下瓊環海爲州在天極南文物彬彬有中土風士之聚於學廩給之養特厚於廣右諸郡建學以來垂二百年而小學獨倏置弗及講慶元改元潮陽劉公通守是邦攝府事旣別蠹吏姦民用靖安則葺學校訪儒雅思欲激昂振起之迺喟然曰古人於學自有次序小學爲學者始進之階方人心未漓天機未散取而養之以固其天則德性全學力充而后大學之功成此邦逢掖之士亦衆矣然未能大有震發以雋特聞者或者教之無其漸與於是勗小學羣里巷之成童旣衣之佩觿且慮其亡貲從師捐公帑之羨爲錢五百緡以廩之率七十員分隸諸齋延師訓導日有課程旬有覆誦月有會試公擇其優者時出清俸以勉其進又爲之醫民田募工墾耕官有閒地辟爲旁廊悉收其租借小學廩歲

入亦數百緡迄今垂髻之童執策爭奮唯恐後羸之矜佩佻達逸于城闕者咸無焉不寧
唯是公時至黌堂延大學諸生相與講明道要且寓諸文用示激勸而又修崇文宣王廟
像繪彩聿加金碧交映欄宇欄楣舉整而新丹漆黝聖各極工堅曩者大比供需之費悉
於養士中取給今月椿郡計之贏備科舉用毋使復侵學庠前餽廩多不時給今如期散
之儋學舊無贏租今溢額增之它如附齋生徒不以大小悉半其供爲祭噐爲庖傳爲寢
浴所爲几席具莫不精媿遠而諸郡皆聞風來游雖黎獠犷悍亦知遣子就學衣裳其介
鱗踵至者十餘人人謹曰前未有也歲杪公將趨朝權教授梁君永年條其事有書來請
曰州之士與民同辭云瓊之學校未有如今日之盛而小學勑始公之惠瓊人爲無窮可
不紀諸堅珉使後有攷盍爲記之方比分麾海上嘗得奉公後游知公設施最詳其奚辭
因爲之說曰天之降材初匪爾殊長育成就上之人實爲之牛山之木嘗美矣自其萌蘖
之生培植何往非美材若日聽其伐於斧斤又牛羊牧之弗卹逮其濯濯則以爲未嘗有
材無材豈山之性公今不鄙夷斯人以忠信望十室故於其喜怒哀樂始發之際禁之養
其清明純粹之天使之極於致知格物之妙則小學之作誦說云虛哉公名渙字伯順天

姿忠淳溫厚挹之如春風和氣其豈弟慈祥之政易直子諒之教在人不可約而孚士民已播諸歌謠比列其成績備詳於借恂之章諸臺行以課最聞於上它微不勝紀述姑徇邦人小學之請於是乎特書

遷建儋州學記

宋李光

學校王政之本也自唐虞三代至治之世未嘗無學所以明人倫崇教化長育人材而化成天下也周衰至春秋之際學校廢缺雖齊晉之國晏嬰叔向之名賢曾無一語及於學校者魯獨僖公能修泮宮而詩人詠歌其德鄭惟子產不毀鄉校而仲尼追稱其仁蓋古之學者以聖正爲師而專師孔子則始於鄒魯之士當時諸侯雖不能盡用而四方學者翕然從之其徒至於三千升堂入室者七十有二人雖疑問答其畧見於論語皆入道之門也自衛反魯然後樂正雅頌各得其所三綱五常之道賴以不絕故孟軻氏謂自生民以來未有盛於夫子者又曰以予觀於夫子賢於堯舜遠矣豈過論哉故自兩漢而下推爲素王雖天子之尊亦北面拜跪薦祭非道足爲百世師言足爲天下法疇克當之我宋

之興至仁宗皇帝始詔大臣問治天下之要當時條對者咸以學校爲語熙寧元豐以及崇寧大觀繼志述事必以是爲善及關成均建辟雍黨庠術序無愧前古雖海隅邊徼莫不有學嗚呼盛矣皇上龍興雖遭權多難而專以仁恩覆冒海宇崇文偃武天下廓然無事乃詔中外謹庠序之教以設大學之制旁達郡國靡然嚮風又親洒瀚墨以五經徧賜列郡昭回之光下飾萬物士生其時豈非千載之遇哉海南自古無戰場靖康以來中原紛擾而此郡獨不興兵里巷之間晏如承平時人知教子家習儒風青衿之士日以增盛郡試於有司者至三百餘人舊學卑陋下偪民居頻年以來士氣不振乃周覽四維得亢爽之地於郡城之東南隅平原迤靡氣象軒豁黎阜昌江拱揖映帶得陰陽之中占一郡之勝龜筮旣從人謀允協由是學錄躬率諸生告於郡守陳侯適守旣樂從四鄉之士莫不奔走從事富者樂於出財貧者樂於出力而宮殿益隆獲古像於名家而廟貌增煥華冠象佩之榮遠稽於鄒魯羣賢列坐之次取法於上庠御書有閣講筵有堂齋祭有室什物有器誦讀之舍列於兩廡賓客之位附近三門繚以周垣崇以列戟固足以起邦人欣慕之心增後學進修之志士有不肄於學宮者則鄉人笑之矣自朝廷罷舍法省教官之

員後生無所從學觀經者多守於俗說閱史者或不思於全文僥倖因仍以苟近利而已
今於斯學之設也士皆激昂奮勵求師學古講先王之道考六經之文焚膏繼晷兀兀窮
年絃誦之聲洋洋盈耳教化行於上而風俗美於下梗氣遷革日趨於善而不自知也故
喪葬婚姻無違禮之失禱祠祭祀無循俗之陋教化興行風俗淳美固可一變再變而至
道然後爲學之成也紹聖間蘇公端明謫居此郡有游城東學詩其畧云攝衣造兩塾窺
戶無一人邦風方杞爨廟貌猶殷因先生饌已闕弟子散莫臻今此復何國豈與陳蔡鄰
蓋歎之也今十餘年學者彬彬不殊閩浙異時長材秀民業精行成登巍科膺膺仕者繼
踵而出予雖老矣尙庶幾及見之經始於紹興辛未之春而落成於明年之冬予放逐至
此得與士子杖策相從霄等又皆宿學及見前輩喜與逐客遊一日摳衣踵門以學記爲
請余方老病久廢筆硯既辭不獲因書其大畧如此上以奉朝廷教育之意下以慰學者
樂育之心云紹興壬申冬記

瓊州學明倫堂記

宋朱子

昔者聖王作民君師設宮分職以長以治而其教民之目則曰父子有親君臣有義夫婦有別長幼有序朋友有信五者而已蓋民有是身則必有是五者而不能以一日離有心則必有是五者之理而不可以一日離也是以聖王之教因其固有還以導之使不忘乎其初然慮其由而不知無以久而不壞也則爲擇其民之秀者羣之以學校而職之以師儒開之以詩書而成之以禮樂凡所以使之明是理而存之不失傳是教而施之無窮者蓋亦莫非因其固有而發明之而未始有所務於外也夫如是是以其教易明其學易成而其施之之博至於無遠之不暨而無微之不化此先王教化之澤所以爲盛而非後世所能及也淳熙九年瓊筦帥守長樂韓侯璧旣新其州之學而使以圖來請記曰吾州在中國西南萬里炎天漲海之外其民之能爲士者旣少幸而有之其記誦文詞之習又不能以先於北方之學者故其功名事業遂無以自白於當世僕竊悲之今公堂序室則旣修矣然尙懼其未能知所興起也是以願有謁焉吾子其有以振之熹竊惟國家教學之意不爲不廣斯人蒙化之日不爲不深然猶有如侯之所慮者豈前日之所以教者未嘗導之以其身心之所固有而徒強之以其外是以若彼其難與因爲之書其所聞於古

者以告之使瓊之士知夫所以爲學者不外於身心之所固有而用其一日之力焉則其德成行修而無所疑於天下之理將無難者而凡所謂功名事業云者其本已在是矣若彼記誦文詞之末則本非吾事之所急而何足爲輕重乎瓊士勉旃天生蒸民有物有則民之秉彜好是懿德是豈有古今之間遠近之殊哉俟於是邦政多可紀已具刻於池亭之石固不獲書而是役之面勢程工又非侯所以屬筆之意也亦畧不論著云

瓊州知樂亭記

朱子

瓊筦在中州西南萬里鯨波浩漾之外其長吏常以領護島中四郡鎮撫民夷爲職委寄甚重然以其險且遠也朝廷往往不暇擇人請而往者意亦私有所利固不復知有承流宣化爲何等事是以其地今爲王土數百年而舊俗未盡革論者因鄙夷之以爲是果不足以與中國之聲教其人蓋深恥之而未有以雪也淳熙八年今帥守韓侯始以經畧使廉察表行州事而天子許之至則爲之正田畝之籍薄鹽米之徵教之以耕耨灌溉之法而緝其官吏之無狀者民業既有經矣然後日爲陳說禮義廉恥之意以開曉之既又表

其從化之民以厲其不率教者出入阡陌勞來不怠行之期年民吏浹和俗以一變化外
黎人聞風感慕至有願得供田稅比省民者以是侯亦自喜其政而幸其民之不我違也
乃取莊生濠上之語作知樂之亭於放生池上北望觀闕於雲天縹緲之間以爲歲時瞻
仰祝延之地且曰其使邦人士女嘉辰勝日有所詠歌鼓舞以自樂其得被聖化而不愧
於王民也間以書屬予記之予惟韓侯之於此邦其勤至矣不但一亭之作爲可書也然
其爲政本末之序則於此亦有可觀者因爲書之以告後人使凡居侯之位而遊於是者
必以侯之心爲心又觀於其政而取法焉則庶乎民生日厚民德日新而王化之純無遠
邇矣世豈有絕不可教之民哉

澹菴泉記

宋方世功

嘉定丙子夏世功以瓊郡丞受部使者命攝守儋耳行臨高道中如薰如炙亭午次博頓
得水泉清冽異之有戴雄飛者曰此澹菴泉也先是胡公澹菴以危言忤權貴南遷珠崖
時夏愆陽水涸先生步村陰止茂林泉滂於地感發清溜由是汲者聯綆接轡率盈缶以

旋是豈無所司相者哉驚異咨嗟盤桓久之而雄飛具言其父定實曾受春秋大義於先生得預計偕綴名吏部籍命擇善書者作澹菴泉三字於井之湄壬戌之秋得方宗萬書之獨未有文以紀其事思昔群陰在朝忠賢擯逐天下以言爲諱彼時有提刑方公抗論於廷願削己爵以贖先生罪抑非先少卿其人乎幸公軫先世爲記之世功自揣不肖何足以與於斯文惟昔賢之迹有不容泯故因雄飛之說敘而勒之石嗚呼學不極則德不深身不危則道不直是泉也以旱而後利濟之名顯而先生顛沛炎陬固所以昭其忠誠於不朽與蘇文忠記韓昌黎廟曰公之精誠如水行地中無所往而不在譬如鑿井得泉而曰水專在是豈理也哉吾於是泉也亦云

節錄磨崖碑記

宋知昌
化軍 邢夢璜文昌
人

渺矣朱垠重溟絕島百峒窟山群盜宅海西交南占而崖以百餘戶孱民五六千疲卒植軍其間有屬鎮曰臨川距州百里而遙國初寘統領本軍是疆暨五六十年姦孽互相攘寇自相易置本軍力弱且去天遠未遑上聞問罪咸淳三年陳氏二兇明甫公發倚黎藪

逋竊據爲盜建砦於鹿迴頭駕舶有雙龍首服器僭越榜稱王號繫累軍卒擅征民糧占稅戶五十餘邨剽襲商貨司舶虛設掠及瀕海八州居民以鬻外番惡貫山積尙遣天討六年春值瓊黎犯界經闡薦欽守馬公成旺於朝任南征事秋偕其子撫機來蒞卽率壯士疾驅群黎數十餘戰拓故地數百里集流民數萬人八年秋九月詔馬正席瓊筦十年迺遣其子撫機應麟總制軍馬申命鈐轄雲從龍協贊軍議三月辛巳公餞於師囑以盡賊迺還師舟啓行辛卯舟次雙洲門行汲不利衆輒氣沮總師曰有進無退乙未至臨川港賊以數十舟逆戰善射者射之輒斃賊退保柵丙申輕舟濟精兵潮澗涉淺先登拔賊外柵攻連珠寨東西夾擊總制中流矢裹瘡乘勝拔其大寨賊潰自相蹂躪死者枕藉火其巢窟累月燭霄公發竄入上江洞四月戊申攻擒之明甫走黃流峒又遁占城入交趾遣軍跡之計窮復回五月甲辰水戰賊敗走總制曰此賊若遁我無還期四面截之獲其父子又繫賊孫六人兵之所至民悉安堵六月獻俘桂府徑使馳奏上聞詔廣右帥正法乃取二兇鈎脊懸竿先判子孫逆黨於碓斧然後備刑兩醜懸髻窒吭穴手釘足烙膚膾肉運刀若風民黎震悚筦帥進二秩帶閣職仍外任總制特轉五官餘功行賞有差列郡

諸民峒落諸黎始知有朝廷臺閩州郡是役也運籌三載出師七旬平崖之勳前此未有馬公自桂歸命雲鈴轄宣天府德意撫餘黨相陰陽造廬舍捐徭稅勞徠民族迺疆迺理爰有遠邨近峒色喜相告曰此地昔爲暴區今爲樂土襁負而至者摩肩接踵殆無虛晷崖風以和崖人以歌邦人咸願磨崖紀績屬夢璜記之璜雖不文姑識其實云

至元癸巳平黎碑記

邢夢璜

皇元以神武一萬方自邃古正朔未加者梯航悉服海南一島四州蚤列職方迺百峒中蟠黎岐宅焉猶雕題禽行侵軼我疆場虔劉我編氓至元辛卯夏丁酉朔安撫陳仲達詣闕奏曰天以皇帝合德俾作民主大一統無外蠢茲獠黎敢抗天威願假臣兵數萬以陛下聲靈比及三年庶克底服帝曰俞遣蒙古軍二百漢軍二千順化新附軍五千承命戰道復慮權輕請以重臣董師命未下軍已行十月丁丑渡海修械峙糧佐以民兵萬有四千師甫集而天不愆遺帥星宵隕天子乃命湖廣行中書省平章政事闍里吉思督視十一月壬子至師以仲達嗣謙亨領萬戶墨綴即戎繼歟先志分命副元帥王信伯顏于思

萬戶教化楊顯祖韓旺領蒙古漢軍順化軍廣西宣慰楊廷璧副使林應瑞副萬戶秦彪千戶蔡有闡等領諸黎兵鎮撫高祐領帳前拔都軍南番兵庚午攻大塘清水十二月己丑擒賊符某明年春正月傳首諸峒二月師次萬安破清塘等峒三月次南寧戮符察等賊值溽暑瘴興乃暫振旅息威冬十月丙午復攻陳萃搗梁六犢之穴凡十餘戰十二月丙辰得降賊不殺用其計遣陳謙亨林應瑞往擒六犢戮以釁鼓貸其脅從明年春二月取黎茅降王卽執王嗣戮千餘人轉攻陵水降陳子淵執黎福平復普調烏石等七十寨三月班師如初其鳥獸散者柔惠招諭七月辛酉平章召赴闕以善後事宜授元帥朱斌十月戊申西征儋黎師次銅鼓十一月己未鎮撫高祐奉檄來趣師十七日會於茶根十二月晦分遣士卒抵古振州斌攻其南祐攻其西謙亨攻其東盡復故土春正月壬子朔登山刊石昭神武功翼日勒五指山越三日丙辰勒黎婺嶺二月壬午朔凱還先是平章納省幕烏古孫澤議分立黎學諭教新附分遣廉幹招徠未降爰編戶入籍屬儒學李元吉王季恭等掌之統四路得峒六百二十六戶口四萬七千有餘立屯田萬戶以鄧高領之置定安會同二縣設萬全寨三年底績堪垂萬祀矣

東坡祠記

元范 棹

先生事宋神宗紹聖間被譴謫儋州無地可屋嘗偃息城南桃榔林有銘石及元大德間郡校官購之得諸邏人之爨下遂置學宮先生居儋四年計平生所歷爲久而迄宋之世儋無祠延祐四年春僉海北海南肅政廉訪司事大都軍行部至是乃求其偃息之地構堂三間而像其中周以堂廡門室兩廡爲房將以處郡人子弟擇師教焉命儒者六十家奉祠事又植桃榔爲林而表之歸銘石林下祠成屬記之棹也竊嘗撫銘而感焉曰惟先生海內之士其始至儋也雖以罪然去朝廷投荒裔極矣識與不識亦知其宜有以禦燥濕辟風雨也當時之人曾無念茲者至使居無室廬同於野處今去之數百年宜若遠然而山川之墟城郭之圯始有慨然過之以思者曰是先生之所止也思之不足又將棟宇肖貌如欲聞見其容聲率其學人以挹其流風遺韻若然者吾亦不自知其何心也豈古今之賢者殆有不相似與不然何若是其曠也禮曰有其廢之莫敢舉也有其舉之莫敢廢也是故無所廢而舉也舉之者賢者也是非舉者之自賢也亦以示儋之人知所闕也

闕者宜舉也祀先生亦其孰敢廢也耶夫往者不追已敍而刻之以諭來者儋州今爲南寧軍云延祐己未夏范梈記

重修瓊山普明寺記

元參處 集臨川人

皇帝遣工部尙書臣士宏命翰林臣世延等製大龍興普明禪寺碑文皇帝若曰昔我皇考武宗皇帝撫軍朔方朕生之三年歸繼大統在位四年而棄羣臣仁廟臨御傳之英皇是時權姦帖木迭用事構譖離間宗親近屬幾無所容海南之爲地炎霧吐毒往鮮生還而使朕居焉越歷歲年有安無苦朕於是覃思以求豈非上天垂祐祖宗洪庥而致然與乃捐金鳩工卽瓊陽之勝地建釋氏之精藍以答天地祖宗昭貺以介福於太皇太后又以綏保其民人焉創始於至治元年十月六日締構維麗嶺海之間鬱爲奇觀朕雖未嘗躬落其成而想見其處常往來於懷也臨御之始慨念疇昔因賜名曰大龍興普明禪寺其記朕意托諸金石俾示悠久臣世延等拜手稽首颺言曰昔者大舜歷試諸艱商王高宗舊勞於外蓋惟賢聖之資尤必困心衡慮而後膺天下之大任而行帝王之能事今陛

下躬冒瘴癘備嘗險阻則其所以下悉民情上成聖德者夫豈一日之積哉且夫頓挫流離之餘人之常情豈暇他顧而陛下於茲時也曾不動其心顧方惓惓君親之恩閱閱黎民之苦不惜萬金建大佛寺以致其誠嗚呼君天下之量已見於此矣不亦盛乎且臣聞之天之所以照臨萬國者日月之明也茲於淵潛之所錫龍興之美名俾天下之人咸仰觀於隆平之效炳炳赫赫以致於萬億年而無窮又豈溟渤之外獨得而私乎敢述銘而刻之詞曰於惟元聖受命自天本固支分正緒留傳天相厥德櫛沐風露以恬而康貞幹之固旆旆龍旂來歸孔時臣力師武至公何私肅肅青宮夙夜徯戴固辭固讓至三至再赫乎當陽思舊不忘曰我梵祠在彼海邦昔瞻廟朝莫獲近只親矚下岷顛崖病只言依佛乘自我祖宗曷既于懷於焉作宮惟天祖宗錫我景貺茲不表章闕彼容望乃賜嘉名如日之升文臣授詔刻石以徵咨以鳥隅龍君海伯波瀾不驚各率厥職鏗鏘鼓鐘來儀來朝內嚮而趨天子匪遙嗟嗟遠人天子念爾念爾艱食嗟徵用弛天子無爲一日萬幾孰不勞心而爾是思爾有臺老爾有婦子均感殊眷何閒遠邇蔚斯文金石相宣謳歌欣愉於萬斯年

臨高縣修城記

明河南道唐
監察御史

舟 瓊山
人

聖朝混一區宇輿圖之廣亘古莫及皇上一日萬幾念及嶺海之外皆赤子繭絲保障者恐或有怠乃勅命按察使蕪湖郭公整飭廣東一道兵務公則攄忠端節戴星沐雨風霜凜然山嶽搖動正統八年冬按節瓊郡十一月節駐臨邑進縣令柳江徐侯曰是邑前逼黎嶺後邊大海倘或有警何以備之徐侯承命惟謹寢處弗遑於是因民之隙以身先之度地之勢相地之宜壘之以石圍之爲垣經畫措置俱合儀度崇計一丈圍計六百丈譙樓門路偉然一新創始是冬十二月初九日畢工於次年四月十九日土舍王端與諸父老謝東衛鍾用等言曰昔我臨邑荒居野處蕩然無閑今則垣壁堅牢得以禦侮防奸府藏固密民不見苦財不見費是皆憲使郭公縣令徐侯之賜也乃來求余志其歲月以示不忘余謂古之子民者當愛民力春秋凡用民力必書是也今郭公能體皇上愛民之心俾徐侯堅其保障即周王命仲山甫保彼東方之意侯復能內修德政以爲保民之本能使民以時動民以義無妨農害衆之舉誠父母愷悌之道俱當書之以鐫諸石俾垂永久

正統九年秋紀

瓊州府射圃亭記

明左僉都御史邢宥文昌人

皇明一統天下首建儒學而附之以射圃以教諸生之射蓋以射者學者之事禮行於學可以觀德而選士利用於武可以威敵而禦強古之聖王務焉射圃之附於學實酌諸古而以時宜制之盛典也瓊州府學射圃出學宮門西行不百步有舊址焉地不滿射者之力屋不蔽風雨階物不度俟服不給諸生病之成化辛卯歲之春廣東按察司副使劍江涂伯輔奉璽書來按於瓊政肅風行不一再越月百蠹以消百廢以舉民用安輯一日觀射因嘆射圃之陋曰是之弊俗吏之爲也思闢而新之不欲勞民乃自爲措置材選其良巽選其堅工選其能拓於其址之北并諸餘地而增之總得廣十五步袤百步有奇畫地置射亭五間左右附牆各置小屋三間砌階墀徑直道恢之以墊坦若展茵法制備具誠可耦進退比禮樂而張弧矢矣工始於公至之年夏六月庚申以是年冬十一月己亥告成總其事而董其功者郡守莆田吳侯琛監者義官海忠輩也爲之左右而整飾其器物

者都閩雷陽王公璫也公又自爲損益大射鄉射之禮注爲射義一通俾諸生習而射之瓊之士大夫觀者聽者莫不欣然頌公能宣德意以翼文化慮久而亡之也欲立石刻射儀以貽後人屬郡博陳禹走書來文徵余言記之嗟夫世之食公祿而力可爲者曾有幾人而知所當爲哉金璧輝煌有腴民脂而聳老佛之殿閣者風月瀟灑有殫民力而張宴賞之池亭者其視射圃之作孰當耶抑公之崇儒化不啻此一事若學校若祭器若揭經程藝皆切切於心而爲之未已偉哉涂公力可爲而爲君子所當爲不隨俗而流可謂一方兵民之寄而不負委託之重者也是宜記之附於射儀之後以著其美焉

修樂會縣學記

邢宥

古者建國必立學有事於學必釋奠於先聖先師由漢而下天下郡國皆置學釋奠之禮師聖迭尊孔子歷隋而唐迨夫宋元以至於今日學校之制益備褒崇之典益隆文廟與儒學俱徧於州縣學設講堂以會文養士廟建禮殿以祀孔子而從其徒後改講堂曰明倫堂禮殿曰大成殿其推明化本表著聖功至備至當無以復加矣瓊之樂會縣廟學初

附縣治於泗村後徙調懶元柝其地增置會同縣遷樂於萬全渡之北再遷渡南初制漫無可考今之廟學卽今縣治之左創於延祐三年實海北肅政廉訪司照磨范棹所建也歷歲既久敝而復作皆仍舊貫未之有改正統四年始遷明倫堂於大成殿之左久而復敝成化七年上命廣東按察副使豐城涂公非總察瓊州兵民之政而整飭之視郡內諸廟學地隘者弗克聚屋敝者弗克居謂非崇道育賢所宜志將有營而財無所出明年適天下大籍版圖之會乃諭諸州縣俾因民戶割稅驗畝推錢轉里胥私襲之利而公之以作學之費以營以繕掃舊布新而樂會廟學咸作諸生以隘告公又爲之闢其地而展之進廟之戟門於前退學之饌堂於後大成殿明倫堂則鼎新建置材良巖堅丹堊諸采施當其質規模宏大增壯於前工垂成而姑蘇邦俊何耕來宰是邑樂其可繼遂畫廊廡齋室庫門謂舍凡隸於學者並加修葺煥然一新誠可饗聖靈而毓民俊矣宰將不沒作者之勞乃具牒置遷建之顛末介其學生王克明請記於予予惟聖王之治天下必本彝倫以綱維風化彝倫之道具在六經學校者講經明倫之所孔子則六經之宗主彝倫所賴以立而不墜者彝倫立於子則能父其父彝倫立於臣則能君其君國無之不足以爲

國家無之不足以爲家周祚修之而延秦代棄之以促忠臣烈婦臨變而不可奪者皆彝倫之道有以結乎其心彝倫在天下有足恃如此則講經明倫固不可無學而崇德報功亦不可無廟也廢而不作作而不擇其地不選其材猶無作也無良有司也涂公之志蓋樂於作興亦其才足以有爲故能爲有司授成計有司又得業儒者共成其美良可嘉也昔周官立制無一不備獨於設教無官廩士無制先儒以爲其吏非應文也其士非爲養也吏非應文是不可以法拘士非爲養是不可以利誘此成周備法紀衆不列學宮於六典之深意也今之講誦於斯堂而瞻拜其廟者尙宜深思此意以自重其職業修乎內無待乎外則其處足以爲席之珍而出足以爲國之寶矣余重於斯文故爲之記以是終云

瓊州府學祭器記

邱 濬

粵稽我朝建國之初秩祀百神咸惟其舊獨於先師孔子之祀用木主以易塑像蓋不敢以百神例視之也至於祭器之用雖郊廟之大亦惟用時器獨於天下郡縣學春秋丁祭用古禮器焉得非以天地山川之祭爲人以祀神宗廟百神之祭因世以異用皆可隨時

以制宜若夫先師之祭則主於明道以立教報本以復古故不容於不異耶夫禮器與樂音同一其質樂有八音而祭之器籩質以竹鼎質以金登質以土豆俎質以木尊壘之屬或土或金形殊而質亦不同近世以竹木之類易壞而或不能以堅久一切範金代之以圖其永其形則是其質則非蓋主於用而不泥於故茲禮所謂先王未之有而以義起者乎瓊郡學祀舊有祭器久而廢壞弗備成化辛卯廣東按察副使豐城涂君伯輔奉璽書來飭兵備下車之始未遑他務首市銅鳩工博考古圖像按其製之其爲器爵百四十而奇一籩七十有二豆如籩之數簠簋各四十有四劓十有二登五尊三總其凡三百九十有三事費一出於官而民弗與知以明年春二月上丁將釋奠於先師先期舍菜以告其成釁而藏之庫春秋有事出而用之時尙其成者掌海南衛事都指揮王君璩瓊州府吳君琛瓊山縣梁君昕府學教授陳君禹輩也會予以邊制家居免喪行有日矣王吳二君謂予出自斯學且以文字爲職業請記其數使後之人有所稽而守焉弗敢失昔衛靈公問陳於孔子孔子對以軍旅未學而欲告以所聞俎豆之事惜其蔽錮而不能再問至今餘憾千載雖然頰宮之詩聖人躋之於頌其意蓋在茲歟今憲副君奉命以治軍旅

之事願能汲汲然以俎豆爲先盡心力考載籍倣古制度備其器以用於崇儒重道之祀其蓋有得聖人微意於千載之下也哉是則可書非但紀其成具其數以示後之人也而於其設施先後之序亦可概見於斯云

瓊山縣學記

邱濬

孔子生於魯魯之南境則楚北境則齊當孔子時楚竟淪於蠻荆齊必一變而後可至魯魯聖人之鄉也亦必一變而後可至於道焉然當孔子世魯之治化竟未聞其能於變而底於時雍之域况今去聖人之時餘二千年之久距聖人之居幾一萬里之遙者乎瓊在禹貢荒服外漢武元鼎中始入中國其去聖人之居甚遠服聖人之教最後其於聖人之道蓋聞風而興起非有所觀感而過化者也然今日衣冠禮樂之盛固無以異於中州其視齊魯或可媲美豈孔子乘桴浮海之嘆豫有以定於千載之前萬里之外哉瓊山縣居郡郭下郡有瓊山譬則人身之有首面邑有學校譬則首面之有眉目也茲邑實爲諸邑之首其學校亦視諸學爲冠邑有學肇於宋始遷今地則在洪武九年自是以來雖屢加

修繕而僅取苟完無經久計成化乙酉廣東按察副使會稽唐君質夫行部至瓊乃始發
官賞俾知府清漳蔡君叔清修復明倫堂暨崇禮養王二齋功未就緒歲辛卯憲副豐城
涂君伯輔奉璽書專鎮海南留心學校乃市旁近地以廣學基兼助其費已畢前功又創
會饌堂及號房三十間知縣事五羊梁昕預力其間訓導高涼周書專董其事既訖工以
記見屬予邑人也知瓊之教事爲詳說者謂瓊士未知學蓋自宋姜君弼從學蘇公子瞻
始殊不然公作伏波廟記謂自漢末至五代中原避亂之人多家於此今衣冠禮樂蓋班
班然矣觀公此言則其未渡海以前已有衣冠禮樂之盛至公始益變爾洪武中姚江趙
謙古則來典教事一時士類翕無從之文風用是不變至今瓊人家尙文公禮而人讀孔
子書一洗千古介鱗之陋出而北仕於中州中州士大夫不敢鄙夷之者未必無所自也
謂非學校教學之功可乎今世學校所以爲教者非六經孔孟之言在所擯斥三尺童子
人人知性之本善而有苟董楊韓之所不及知者豈今世童子固勝於前世鉅儒乎教素
行也教行則道明推諸四海而準瓊處大海極南之陬去齊魯幾萬里而道之彰彰著明
如此是知聖人浮海之嘆不行於稅駕之時而著於奠楹之後蓋百世可知也昔之學者

不遠千里裹糧負笈以從師於遠今聖人之道與王者之化並駕而偕行隨在而有經有常說不假於辨難學有常師不假於外求居有常所不假於游從食有常廩不假於經營今之爲學者固易於古人數倍矣於此而不知所以自勉焉甚至於自暴自棄豈非聖世之棄材名教之罪人也哉予忝生是邦於邑士爲鄉先達故因記學之成廣二憲副公作興之盛意而規之以言非獨警於今且以示來者於無窮云

重修文昌縣明倫堂記

邱濬

今天下郡縣學皆有明倫堂古謂之講堂亦謂之倫堂蓋以學校所講明者倫理而已明此理而昭之於人豈非用人文以化成天下也哉文昌儒學歲久而敝憲副涂公伯輔鎮瓊之明年以其窄而陋也俾知縣事古籐宋經重經理焉既落成使生員林徽來徵余文竊惟人文之成倫理之明也人有是身斯有是倫一人之身而五品之倫咸備人有五倫而不知所以自明聖人必立教以明之經書者教之具也學校者教之所也聖人之教不能徧及於人必衆人之中擇其俊且秀者羣於學校之中授以六經之道使其朝夕從事

誦言究理指陳事實稽古驗今匪徒自明又以開導其嫗族而漬漸其鄉里俾才良而俗厚異時學成而仕上以致君而澤民以淑諸其俊且秀者而俊秀之民他日又推以淑諸人彞倫攸敘人文之成庸有已耶人倫明則人文成矣人文成則天下化矣邑以文昌名其士民之美必能如易之所云觀乎人文以化成天下顧三代之文郁郁於成周而成周之文不外乎三代之所以明人倫猶文多士斐然成章以應邑之名要必秩然人倫之敘而後燦然文理之備斯無愧焉耳苟反而求之文采有餘而實行不足不亦有負於是邑之名斯堂之顏也哉此豈獨士子爲然凡氓於是與教於是官於是出入往來於是擁臯比而談經攝掖齊而進退環橋門而觀聽者曷亦思其所以然哉成化九年冬記

萬州遷學記

邱濬

昔史臣紀禹貢山川而終之以聲教所至其東西北皆以地言至於南獨言其方蓋以聖人體天爲治面之所向目之所視其明德之光被初不可以地里限計也廣海居中州之南瓊之支郡曰萬者又居瓊之南茲地在禹貢時固遠在荒服之外然當是時聲教所訖

東止海西止流沙北止朔方今閱數十代更數千年其三方固未嘗越之而有所加也惟南則日闢日遠雖以區區四州之地去中國萬里之遙而郡縣之建學校之設與齊魯不殊豈不以南者雖明之方文明之地萬物皆相見於此乎萬在前代爲萬安軍附郭邑曰萬寧皆有學國初改軍爲州正統中罷萬寧縣而學隨以廢成化壬辰衆以州學湫隘縣學之舊基則高亢而明爽也議欲遷之適廣東副按察使涂君奉璽書專鎮於瓊行部至萬爰主其議乃命守備指揮舒翼知州梁桓董其事經始於是年十月訖工於明年十二月新學告成衆謂不可無記乃遣鄉進士曾昌來求予文惟郡邑有學校猶其有苑囿然儒峻在民間譬則草木生於原野也殊形異種叢生散處藝圃者移彼置此區別而群聚之栽培灌溉各順其性而不戕其生慮其不能敏成而速化也又易置其處以冀其速成使凡在吾所培植者皆足以資世用而不棄捐於人諸士子生民峻之家選人庠序爲弟子員何以異此上之人所以培植滋潤之功如此其至而又擇高爽之處以廣其居其尚思所以挺立拔出以爲向陽之草木欣欣就陽明之光求以自異夫陰崖寒谷之所生者異時由郡圃而進于禁籞其爲臺萊爲桐椅爲新甫柏爲徂徠松爲衛武公之藁竹爲

召伯之甘棠爲周王之棧樸使夫天下後世之人咸曰聖化自北而南日遠日盛雖遐力之地不異中州百世之下不異古先顧不偉歟

崖州學記

邱 濬

昔者聖人述經於詩則懲荆舒於春秋則外吳楚所以懲之外之者蓋以先王之道不行於其地故爾仰孰知聖人百世之後而其道又越荆楚舒吳而南數千里之遠以至於百越之墟大海之外乎孔子曰道不行乘桴浮于海其言蓋至是驗矣凡天下郡國皆居海內惟瓊一郡居海外而崖在前代再涉鯨波非舟楫之利涉不可以通今而釋奠之宮絃誦之所與中州等豈非聖人之道行於海之驗與崖有學肇於宋淳祐中知軍毛奎始創於城西元泰定中徙城東至正中又復其舊自明代來雖屢更修葺然苟焉而已成化六年豐城涂君伯輔以廉憲副使者之節專鎮茲郡按部至崖慨學宮之卑陋憫學校之廢弛乃命知州事諸暨徐君琦拓其址而前之視舊少西凡學宮規制所當有者咸一新之其費一出於公民弗與知規模宏敞藻繪絢耀州人父老過者驚嘆以爲昔所未有徐守

謂崖學創於宋歷元至今未有文學之士爲之記者以書來徵予文記其事惟昔聖人興
浮海行道之嘆而繼以從我其由之語夫當聖人振鐸之時必欲其道之行於遠尙有賴
於賢哲之士相與左右之矧去聖人數千年微言絕異端起之後乎吾知聖人在天之靈
固不能不望於後世賢哲之士相與左右而作興之也崖自入職方千二百餘年於茲立
爲學校又四百年於茲聖道之行於茲士也不爲不久矣然而風俗未至純美人才未至
於大振夫豈無其故與意者左右而振作之者未得賢哲之士如仲由者與今崖學幸得
憲副君作興之於上而又得徐守協力以懲息之自今而後誦讀有其地休息有所而
崖之士民於此猶不知所以奮發勉勵以求漸進乎聖人之道使風俗純美而人才大振
焉追原其咎必當有任之者因書以誌焉且以示夫後之人

鴈集瓊庠記

邱濬

正統壬戌秋八月辛丑予時肄業學宮日亭午與同舍生符鍾秀陳汝諧偶息游焉有童子
走報曰有鳥集於學宮沔池之內比鵠鵠而小似鳧鷖而大足指蹼屬毛色蒼白旁皇

四顧馴擾而不驚蓋平昔所未嘗見者盍觀之予偕二友往焉顧謂之曰此易所謂漸於陸其羽可用爲儀者乎書所謂隨陽以攸居者乎禮之用爲大夫贄其土婚媾盛以奠者乎是鳥也生乎沙漠之墟隨陽南征集于江湖漢沔之間乃其所也嶺海之南隔山越河蓋彼飛不能遠到之處胡爲而至此耶茫茫鯨波百川是委四州之間二三千之域其間之水滙而爲湖流而爲河潴而爲沼沚視茲洿池廣袤何啻百倍且此學宮相去重湖僅一堵許彼皆不之集而顧來於茲謂其無意可乎二友叩予以求其故予謂曰禽鳥天產也其得氣最先而鴈又隨陽之鳥秋賓南而春北歸知時者也其乘氣機而先動尤非他鳥之比昔人聞天津杜鵑之聲而預有所占焉矧茲陽禽素稱知時者乎昔者地氣自南而北果有南人以文字亂天下今也地氣自北而南安知無南人以文字治天下耶昔旣有徵今亦有驗矣二友戲謂予曰安知非子耶予笑而遜謝焉鴈聞人言若對以臆童子舉手脩爾西征歸而筆之以爲鴈集瓊庠記

藏書石室記

邱 濬

予生七歲而孤家有藏書數百卷多爲人取去其存者蓋無幾稍長知所好取而閱之率多斷爛不全隨所有用力焉往往編殘字缺顧無從得他本以考補時或于市肆借觀焉然市書類多俚俗駁雜之說所得亦無幾乃徧於內外嫻親交舊之家訪求質問苟有所蓄不問其爲何書輒假以歸顧力不能抄錄隨即奉還之然必謹護愛惜冀可再求也及聞有多藏之家必豫以計納交之卑辭下氣惟恐不當其意有遠涉至數百里轉滙至十數人積久至三五年而後得者甚至爲人所厭薄厲聲色以相拒絕亦甘受之不敢怨懟期於必得而後已人或笑其癡且迂不恤也不幸稟此凡下之資而生乎遐僻之邦家世雖業儒然幼失所怙家貧力弱不能負笈擔簦以北學於中國中心惕然思欲以儒自奮以求無愧於前人反求諸心似知所愛慕者甚欲質正於明師良友引領四顧若無其人不得已而求之於書書又不可得而求之之難有如此者乃喟然發嘆自盟于心曰某也幸他日苟有一日之得必多購書籍以度藏於學宮俾吾鄉後生小子苟有志於學問者於此取資焉無若予求書之難庶幾後有興起者乎歲己未補郡庠弟子員甲子領鄉書戊辰上春官卒業大學甲戌第進士即入翰林自此日積月累所得日多歲庚寅丁先妣

憂歸故鄉服闋謁先聖於學宮怵然動其宿盟顧南方卑濕竹帛不可久藏竭生平積聚鳩工鑿石以爲室凡梁柱楹瓦之類皆石爲之不用寸木廣若干尺長若干尺經始某年某月落成於癸巳年七月爲錢共若干督其工者鄉友吳雲也中爲木櫃若干內度以書僅成予即北上竊恐後人不知予得書之難而易視之或者又取之以去也乃自書其事而爲之記曰書之功用大矣由一理之微而可以包六合之大由一日之近而可以盡千古之久由一處之狹而可以通四海之廣由一事之約而可以兼萬物之衆其惟書乎嗚呼聖人沒也久矣而道德萬世如見古人往也多矣而事業終古常新合千萬世之心術聚千萬世之治迹傳千萬世之語言演千萬世之理道皆於書乎是賴士也生乎千年之後而知乎千年之道具乎一物之形而悉乎萬物之理處乎一室之間而周乎萬里之勢非書何以致之哉人生天地間不爲儒則已有志於儒以從事乎聖賢之道未有舍書而能成者也古語有之通天地人曰儒一物不知儒者所恥一書之不讀則一書之事缺焉書之在天下自五經而下若傳若史若諸子若百家上而天下而地中而人與物固無一事之不具亦無一理之不該學者誠卽是而求焉則可貫三才而兼備乎萬事萬物之理

儒之道其在是矣雖然書不貴多而貴精學必由約而後可以致於博精而約之以盡其
多與博則氣質由是而變化心志由是而開明德業由是而崇廣析其精而志於不亂合
其大而極於無餘會其全而備於有用聖賢之道夫豈外乎是哉區區積書之心誠有在
乎是所以期待吾鄉之後賢君子者甚遠且大其必有副予望者乎使誠有之恨予耄矣
不及見也雖然冥漠之中無知則已萬一有知亦將暢然快輟然笑也謹書此以俟若其
規條名目則悉具于碑陰

瓊州府志卷之二十九上

藝文志二記上

重建載酒堂記

王佐

儋城東郊有載酒堂元延祐四年部使者所遷建東坡祠今名載酒者以先生昔所自命也其堂在城東南仍舊名不忘初也初建誰郡守張中也載酒誰郡人黎子雲也泰定三年州倅重修歲久頽廢明成化九年夏海南衛指揮同知張圯督備儋州始與州所官知州羅傑千戶張鑰謀捐俸聚材重新其堂廡如延祐制其所以供奉祀事者亦期次第舉行堂成來徵文以紀歲月念昔先生以議新法忤權奸貶逐無暇日不極荒裔不止所居至無廬室仰人以濟似乎不能一日終其身矣豈謂後此數百年乃有遺像儼然端坐堂宇間享有祠祀與世道相上下此豈人所能爲哉蓋必有不依形而立不恃力而行不待生而存不隨死而亡參天地關盛衰浩然而獨存者昔先生作韓昌黎廟碑固嘗言之而今驗之矣是故堂不廢者此理存也不廢之者存此理也此理存是人心之不亡也存此

理是人心之不能亡也皆天也非人也傳曰人定者勝天天定亦能勝人至是而知天之定也久矣予嘗即斯堂以觀世道之變而知有宋一代治亂興亡之由何也元祐至紹興君子小人之消長有二代節目自先生來此則知元祐變爲紹聖矣靖康之禍紹聖小人釀成之也再變而爲紹興尙有可爲之機未幾李胡趙三逐客過此則國勢不可爲矣吾因先生有嗣用以慨夫三人者又因三人者以追究於紹興諸人而終南渡焉則世道之變盡於此矣由是觀之斯堂一區闊不盈畝而可以該夫半部宋史也張公廣陵人羅守南昌人張千侯山陰人皆讀書識禮稱賢故能相協就事云

平黎記

王佐

宏治十四年夏儋州七方峒黎符南蛇倡亂環海州縣峒黎皆應之攻儋州臨高昌化縣陷感恩縣抗拒官軍恣行劫掠撼動海外三千里地巡撫大臣上其事天子震怒特命鎮守兩廣征蠻將軍太子太保伏羌伯毛爲大將帥師討賊欽差總鎮兩廣太監王公監其軍副將以下連帥五偏裨將軍以下以十百而兩廣官校暨漢達軍狼土兵以十萬十五年冬王師駐瓊謀於有衆咸曰賊之渠魁擁衆七方衆號十萬地險兵銳勢難卒滅而三

州外應強黨以倍每分軍勢稍延數日則師老萬山之下今賊首內自相仇關防內變必不敢遠出兵當先從事外應者翦其羽翼以孤其勢然後併力進取俟皆不可獨奮然曰王師天威也震霆不及掩耳宜先搗巢擒其渠魁以號令四方則後百峒之羣醜氣奪膽落惟師所向成擒耳即日戒嚴啓行晝夜兼程是月癸亥王師壓儋距賊巢三舍而近乃警師曰明日甲子出兵越十日不獲賊首符南蛇頭來獻者副將以下不用命國有常法偏裨校卒軍令具在衆咸凜凜奉命是日分布將軍以進取路以新場海田頭寨賊之北門中堅所在參將馬澄將中軍以兩廣漢達軍狼士兵一萬攻中堅蓬墟抱吉賊之右臂援黨所聚都指揮錢璋將右軍軍之部分如中軍以攻於右落基落窰賊之左臂援黨所由都指揮馬義將左軍軍之部分如中軍以攻於左西南賊路衝要則昌化古鎮州付之熟地利指揮周遠軍之部分視中軍之半至若安海西通交趾防賊走路則以總督備倭都指揮張鐸領雷瓊軍民兵習水戰者以舟師防待焉臨高澄邁瓊山定安四縣外應之賊則付之知府石璧同知鄧槩分地責其成功而藩臬胡方王管則總攝內外綱領嚴飭諸路進兵將校及督井四縣分地守牧遠近戒嚴糧餉四集文武既各任責而大將則主

旗鼓出號令監軍臨之節制凜凜越三日丙寅中軍克新塲海破田頭寨賊失所據險諸路軍一時竝進賊之援黨皆未及期南蛇獨擁精銳出敵昌化軍指揮周遠當與死戰短兵所接手斬賊將先鋒一人賊氣奪小却長兵爭前勁弓齊發南蛇中箭敗走赴水死別將隔水得其頭即日來獻是日中軍進據七方擒賊妻孥焚其廬沼其宮搜戮其親族黨與無噍類號令四出不移日威振海外三州外應賊黨以次削平州西之賊西至昌化感恩崖州皆以次平州東之賊東至臨高澄邁瓊山定安萬州皆以次平卒如侯之所料不再越月而班師奏凱海南地方大定父老垂白扶杖相賀於閩里商賈相賀於道路農夫相賀於南畝士夫相賀於庠序咸曰自謂吾人稍延數月不死殆將盡爲犬豕輩所魚肉矣孰知今日之更生而復見太平也粵稽載籍海南自入職方以來至今千六百年重辱王帥征討僅此兩見昔漢武元鼎五年始以王師創定海南者前伏波將軍邳離路侯也兩漢六朝以至於今再以王師繼定海南者今征蠻將軍伏羌毛侯也後伏波新息侯特以隔海立縣招撫功未嘗一卒渡海至今兩伏波猶均廟食海南况伏羌哉又况伏羌以師保公孤之尊而出入將帥之事尤非邳離之比吾知後之視今亦猶今之視昔將復優

焉可知也書此以待他日秉史筆者庶得採其實焉

湛鉞平黎記

王佐

湛鉞廉州衛借職指揮廣東都指揮僉事性英俊有文武才畧好用奇策忘其勢位每與下官有謀者共事宏治十四年夏六月瓊府儋州七方峒黎賊符南蛇謀殺峒首符那月占奪地方搆黨反亂刻箭傳約三州十縣黎賊各皆領箭有同時反者有觀望成敗以爲向背者因攻圍儋州陷感恩昌化臨高三縣人民死者十七八閩閩灰燹赤地數十里澄邁定安其害半之瓊州西界一千餘里道路不通海南幾危是年秋九月鉞領兵討賊到瓊當見其然不信宿戒行就道至澄邁西峯驛適臨高縣走報賊首南蛇令縣賊黨符那攬那樹約會本縣賊黨王琳王細保等分領賊兵合萬餘刻期來攻本縣那攬等兵數千已至城下攻西北門垂陷約王琳等攻東南門兵數千亦垂到指揮張詡領孤軍與知縣林彥修誓以死守危在朝夕邊山人民大半陷沒邊海者無路逃生扶老攜幼待投水死據報維時漢漢官軍不滿三千後軍未至衆皆有懼色而鉞勇氣百倍遽傳令止軍命士卒舉火作二日糧密詢賊營所在親率共事者領兵由間道晝夜兼程馳奪臨高賊巢而

還遶出儋賊之後地名拳藍搗賊老營盡殺守營者百餘級賊方攻城遙聞鬪聲咸歡呼相賀以爲黨與之來相應也攻城益急已而聞官軍舉礮聲大驚知老營已破官軍扼其歸路遽擊衆退敵來勢洶湧鉞曰賊方在死地且彼衆我寡未可迎敵觀彼大衆一退勢必不能復止宜缺圍卸出其半而中邀殺之取威滅賊在此一舉戒軍士如今已乃躬率精銳衝斷賊陣爲二賊前後不復相顧漢達官軍從而摧之又復斬首七百餘級城內軍復出乘其後賊衆大潰散走相失軍民所擒獲不盡者亡匿草野中鄉民荷鋤奮挺擊殺無算連六七日解功不絕生擒賊首符那樹而那攬者先時乘憑死尸奉頭竄去軍聲大振前項赴約賊徒中道聞風棄兵遁走領箭群賊已反者舉皆奪氣退縮觀望成敗者皆願出聽招撫而攻州賊首符南蛇亦遂解圍歸守窟穴鉞以二千精兵破強賊萬衆救臨高一縣垂陷之城而全萬家垂死之命威風四達三州十縣莫不引領望治無何以因晝夜兼程時途陷宿食復冒雨苦戰致疾以死海南軍民遠近相弔如喪親戚前賊聞知又復處處紛紛起後事難言矣嘗觀古今志書所紀名宦是皆有功德於是方生民觀風者採錄人言以示後世者也事或出於傳聞尙且不遺况今耳聞目擊之事今日知而不言則

千載而下遐荒僻壤誰復知之哉考諸成周外史合四方之志則是四方郡國皆有志書而外史所合以爲史者古今通義也在昔唐段太尉秀實笏擊賊泚之面而死而柳宗元於凡所經歷之地恆求太尉逸事以上太史甄濟執死不污祿山而元微之在貶所猶上韓愈書欲其存諸史氏夫死者之事雖則不同而見而感之者不沒人善之心則千萬載同此心也且宗元微之於死者非親非故而又無所交厚者也猶拳拳焉恐其善之或沒而欲存諸史以垂不朽况鉞之功德及於吾海南之民深厚且博而於吾臨高一縣生民又所謂生死而肉骨者人心方孚身遽死而不食其報敢忍其善之沒世不稱而泯泯然同衆人乎故特書此以寓瓊人報稱之心而表邊臣忠義之節庶幾他日觀風者得以採錄其一二云

重建儋州學記

明侍唐 冑瓊山人

儋瓊屬州也宋蘇文忠公南遷時瓊士僅得姜公弼黎子雲王公輔符林數人而黎王符皆儋產公於子雲戰酒問奇尤加敬焉昔揚子雲論棄朱崖爲捐之力否則介鱗易我衣裳公不然之蓋有感於此也厥後王霞舉符確輩繼出儋遂爲名州矣而况積至今日之

盛乎正德乙亥冬湘源蔣侯以郡節推攝州事感俗之舊與士之良可大造也以學宮雖前守陳侯袞內遷之便然大如殿堂尙未就何以訖所教事乃肆力繕完且次舉廡齋門號諸建以備其制越再明年春即告就命其庠吳壽椿李一夔二士來請記余惟治固莫先於立學以教士然學宮特以聚教而六經則所以爲教也漢武承秦後能興學以啓後世隆儒之美可謂盛矣然當是時博士雖置而尙書古文詩毛氏春秋左氏皆不列於學宮世讀之者少兩漢之士所以喜功名而不通時變者則學焉而不知經之過也隋唐陋於辭章不足爲道獨恨宋以文儒立國何至慶歷乃始知立學維時天下郡縣且多假公濟私苟且應文觀文忠在儻有士如此至遊城東學尙有饌闕徒散之嘆餘可知矣未幾新經行而周禮春秋又廢則其所以爲教者何物痛哉我太祖方天戈指婺州即開學延葉儀宋濂爲經師太宗繼又表章六經頒賜學校非獨恢耀武功自開闢以來所未有雖文教昌明尊經之隆自漢亦有能先之者哉百五十年來文化浹海內外侯於是州又能拳拳獨宣右文之意儻雖荒陋亦應倍加奮躍况儻在前兩塾無人之時士之忠信已如此今復爾則所造尙可量哉侯諱纓字世榮識敏而政通在郡甚得人心余尤重是舉故

因求記而推言學之所教以成其志使州之民俊遊斯者知重六經之教得身心倫理之大不爲章句利祿之謀則學而爲賢爲聖仕而堯舜其君民是則天下士矣豈徒自慶曰瓊之有士始乎儋瓊之士亦莫盛乎儋如蘇端明析樞密輩當時之所稱與而已哉

瓊州府社學記

明尚書 韜南海人

皇帝御宇銳志復古聖帝明王之盛桂林徐公乾以憲節鎮瓊旣修廢政振治理除戎器以飭邊防平訟寬徵瓊歲大稔民用匡和廼作而思曰治理之務教化爲先矧我聖天子作則立極臣民承式敢不對揚鴻休乃謁文廟集瓊之士告之曰聖人御天光復虞周之治於數千載之下諸士有弗興起者乎諸生曰唯又曰聖人御天憲聖學赫赫訓謨布在學宮諸士有弗興起者乎諸生曰唯旣而進瓊之耆老告之曰嗟嗟民之生豈其性之弗良化之弗臧弗於本之圖於末之防爲爾性之戕予爲爾本是圖爾其乃克自強乎則合辭曰唯唯又曰聖教之序有紀有綱如紀斯理如綱斯張今俾瓊人幼學壯行率聖之軌首善於爾鄉爾其乃克自強乎則又合辭曰唯唯徐公曰是可以興矣乃集瓊之有司與厥士民申告之曰嗟嗟瓊人爾子爾弟性習弗靈爾父爾兄是教是程弗教弗程愆

誰是膺予爾父兄惟社學之興俾爾後生率德之行嗟嗟瓊人俗化弗理德化弗觀過失弗紀禮俗弗恪患禍路視予爾民紀爾民弗順於軌則予之恥惟鄉約是舉俾爾瓊人俗淳政理瓊之士民又合辭曰唯唯徐公曰是可以導之化矣乃分告之曰義民潘清楊馥之彭盛爾其改應襲書院曰崇儒社學選士婁筠爲之師訓爾蒙士曰義民吳紹齡林廷用張拱爾其改老佛廟基曰東城社學選士李廷茂爲之師訓爾蒙士曰義民馬駱張隆王節吳校蔡朝聘爾其因甘泉之靈建南泉社學選士鄭維垣爲之師訓爾蒙士曰義民潘本秦岑元高謝德克爾其修瓊臺義學曰西關社學選士海盛爲之師訓爾蒙士曰義民唐轅潘行健沈珊沈玉爾其以五通祠基爲北門社學選士陳大韶爲之師訓爾蒙士曰千戶劉紹勳爾其改環海社學曰修文社學選士陳大本爲之師訓爾蒙士又曰爾瓊之耆其率朱考亭之格訓朔及望會爾良暨耆於學率德考行相厲以觀爲鄉式師又曰爾瓊之耆尙慎旃哉蒙訓弗終惟爾耆弗終耆德惟終蒙養乃終蒙德之成惟爾耆之良蒙德弗成惟爾耆弗良弗厲初怠終遺有司羞貳守柳侯邦傑拜稽首曰惟徐公訓瓊人訓厥子弟及厥父兄於世世瓊人嗣耆有休聞於世世實惟徐公式克對揚明天子嘉德

覆被海表敢不拜手稽首丕顯聖德於瓊於億萬斯年

瓊州府學科目題名記

明侍鍾 芳 瓊州人

瓊島越自海北突爲中阜派分支衍爲瓊海郡邑形勢所屆靈秀攸萃其業儒挺拔而出率皆中土衣冠之裔先世轉徙流風存焉然自唐以前學校之政未立造士之方多闕雖有魁奇忠信之質亦無以自見昔人謂陽德炳耀獨發於紛葩瓌麗而罕鍾乎人豈其然哉宋興始建學校問雖一二顯自科第然皆江左偏安之後獵俊彥以收士心非合藝於天下而角之者也洪武十七年甲子初入午會十一運陽德昌融之候而瓊士捷京闈登會選者繩繩有人合南北之士裒然與之頡頏無少貶焉自是而位省部躋臺閣瓊之名與曲江比隆蓋非偶然之故矣故事題名有記瓊闕焉嘉靖丁亥郡守林侯有祿涖府事悉心民隱政教以節思風士類以敦化原乃謀諸李貳守鵬張判府楷纂次國初迨今鄉會所薦若干人勒名郡學白于兵憲甌寧范公遣教授李章屬芳記夫人才與治化相因治化隆而後賢才出其出也偏乎遠地而後見其盛瓊去京師萬餘里至遠也涵濡聖化百六十餘年於茲至深也而材產於瓊者日益蕃焉遠而不遺於時其賢可知也卽瓊以

占天下之才其盛可知也因吾瓊之所就而徵帝化之敷延遠且洽焉其隆又可知也書曰萬邦黎獻共爲帝臣夫惟盡萬邦之賢而臣之此堯德所以光天下也而科目所取乃盡乎海表而無遺焉此我朝廷之德所以光於堯而無間也雖然士之由乎是者名也非實也實勝矣雖匪科第人猶榮之徒名而實墮人將指而訾之恨其名之不早泯也傳曰官先事士先志夫莫非事也而志無不貫焉志以立事事以顯志實勝而名稱矣上之人固以此待士而士之所自待以取信於上者其在茲哉貞珉旣揭規監具在吾侯風厲鼓舞之意微矣

崖州王公生祠記

鍾芳

崖州之黎其村名千家者數倡寇掠成化乙未憲副涂公柔一嘗震之至宏治數十年間恣橫極矣正德丁卯憲副王公按節於瓊詢知曲折密勅儋昌崖土兵之長及軍將正副胥以兵從曰視吾鞭所之迺三月甲子次崖之西七崖人未及知則已揮兵突掩賊巢公親提軍躡之賊倉卒奔竄莫敢爲角迺焚聚落夷藩限賊旣失儲峙日益困憊而旁峒懾威相懲纍係來者日屬公知賊大創始下令撫定之於是盡嵯之封內出入者各屏弓矢

牧畜恣於野商旅歌於途墾田盡於荒萊貿易通於深谷兵往返僅數日曾不遺寸鐵而郡寇帖然底定誠亦奇矣

黃通志

平黎碑記

鍾芳

漢史稱珠崖郡爲州四曰瓊崖儋萬州聯屬邑環列海滋而群黎窟乎其中世爲民患崖陵尤甚峭官死難者數人然陵隸萬而崖南極民憚遠不能愬雖愬不能達其來久矣嘉靖丁酉半洲蔡公奉天子命提督兩廣軍務洩鎮未幾百務具新威武不振初試而龍祥定再試而昭平戢三征而籐寇屏跡四伐而南交伏辜莫敢違命遠民知公可仗逾海群訴於鎮公慟悼焉乃奏用閑住參將程君鑿起之散地而復其故秩畀之兵柄以急拯陵難崖民老幼數千遮道哭迎請移兵先之程乃躬擐甲胄與士卒冒霧露伏藜莽首摧賊銳屢獻奇捷公喜動顏色遂奏陞左參將奉勅開府於崖崖於是參將府從民願也崖黎最大者曰羅活萬陵昌感諸黎倚爲聲援程又多設間諜圖山川險夷曲折以獻曰寇衆且強非翦寇無以輯民非西廣日兵無以挫敵公如其請奏調日兵八萬合漢達官軍士獐敢死士十數萬人征之檄程統中哨田州歸順南丹向武湖閩上林忠州果化日兵

隸焉陵分左右哨泗城鎮安東蘭那地安隆思明江州龍英武靖奉議都康歸德太平萬
承上思目兵隸焉中哨監督則左參政張君岳總理糧餉則右參政周君禪監左右哨則
兵憲陳君茂義僉憲商君大節往崖紀功則僉憲趙君維而參將董君廷玉都指揮武君
鸞則分任統督皆公精擇以充辛丑九月朔公及總兵安遠侯柳公按節雷陽以便指畫
令申諸哨並進胥獻戎捷惟郎椰二峒負險固與王師抗公乃檄中右哨分兵合擊以參
將劉君經督銳兵乘之尋皆破滅斯舉也秋禾蔽野因糧于敵天時順人事豫兵力勁而
群策協蓋天厭夷慝非偶爾者自進兵卒振旅僅兩月餘捷奏聖心嘉悅頒賞增祿有差
公陞兵部尙書督撫如故餘行巡撫按廣東監察御史覈實以聞惟是四州諸黎自上世
隸荆楚不霑王化蓋三苗之別裔其俗操弓鏢逐麕鹿文身披髮喜人怒獸雖父母昆弟
間反面所殘無忌宏治以前每調儋黎征欽廉逋寇遂致意輕我軍桀驁以叛而卒平之
者伏羌伯毛公也惟崖自洪武迨今七十年未經兵革稔禍亂以至此極而卒平之者安
遠侯暨公也仰惟我聖天子仁覆海宇明哲任賢於凡公之所建白輒奉欽允故能左右
我師所向如志脫或微有挫遏動失機宜豈能徒手建事乎是善申群策固公之功而率

成其用者天子之功也於時前太守趙君昊今太守張君峻皆以清節敷政兆庶攸賴知萬州黎君巽每斬獲必當其罪而始終懷柔具有可述崖則邵君濬排冗斥強介然自清凡在鈐轄罔不仰承休謨恪遵矩度而群黎寢寢有感化之機矣然夷性畏威不懷德前元雖能戡黎所至刻石而不能圖遠尋輒委棄况戎瓊之兵番休無常適以長亂我太祖高皇帝洞鑒禍原始設沿海衛所仗兵威以宣政理而將士來自中土與民雜居久之語言習俗詩書禮讓之風漸摩屆乎窮絕而科第與中州等乃知聖神不言之化卓冠萬古不易測者矣公初意欲於羅活別營參將府分兵屯田廣儲蓄興文教以變夷俗兵憲陳君毅然任之爲千百世乂安之圖參政張君已建社學擇師訓蒙易巾服習書儀化有漸矣而議者謂武貴兼制勦遠則遺邇海寇萬一乘風突至擾我疆場蕞爾孤城如岌岌河事遂寢而公經遠之畧未盡如志焉崖之士耆黎宗賢王鳳岐趙文憲蕭成余繼舉數十人僉以碑銘請某按事關公評傳信罔極詎敢贅諛一辭力疾據實通紀銘曰維霍孕靈五嶺是宗南逾漲海突爲五峯郡邑外羅黎獠中窟魚肉我民爲鬼爲蜮民有族屬亦有妻孥磔若犬彘掠則僕奴寇橫逼城迭喪武胄命且日危耕牧何有公銜帝命總此荒服

靈然悼傷哀此慘毒有赫斯怒矢於天廷選任宿將哀雄聚勅爰暨安遠雷陽胥會叱咤
後先靈驅風箏風靈所向敢撓者誰嗟彼頑冥蝓蛙恣睢自蹈窞穿如魚在釜神怒天譴
匪我之故捷書上聞天顏騰喜褒賞酬庸賚以蕃祉醜馘宣奏國典有常帝曰勿宣朕心
惻傷義以取殘仁以覆育乾運坤承入荒一掬公更圖遠化浹威行仰欽帝德恥言戍兵
兵屯已矣宏猷認認脫之樊歟息爾生齒齒息以蕃藩臬紀綱將臺桓桓鎮定孔良獨乃
逋負復迺疆畝稽首對揚天子萬壽不震而威不刑而革鑄在貞石以詔亡極

先賢祠記

明大學士李東陽
茶陵人

瓊州府舊有二賢祠祀知府王徐二公者也王公諱泰字伯貞以字行吉之泰和人洪武
間以前戶部主事起知瓊郡爲政寬簡州黎殺人報讐府衛以反聞議用兵公保其無他
捕讐殺人者數人遂定瓊田三稜軍賦不時受俟民乏則急斂而倍人之公始令每稜必
輸皆告便民流來歸者萬三千餘人任治十五年以內艱去民號泣攀送十餘里不絕徐
公諱鑑字子明常之宜興人宣德間自戶部郎中奉勅知瓊廉正寡慾瓊多異產中使踵
接公限有司弗予及行所部輒遣騎從之俾不得肆武官利黎產多啓釁以邀賄公鎮以

無事皆按堵不爲變民漸黎俗病不服藥惟殺牛祭鬼至鬻子女爲禳禱費公婉導之民皆感化立生祠祀公比其卒巷哭家祭柩還送者填海濱目送其舟至不見乃去蓋其治祇四年視王公不及三之一而治狀相若人以爲難瓊民思二公不置附祭於蘇文忠公祠事有不平者則往訴之若官府然成化初知府蔣琪建祠於府治西久乃就圯宏治初知府張英改建於御史行臺之右則今祠也

瓊山縣儒學記

鄭廷鵠

嘉靖三十三年八月郡守安成張公歸自覲思愾教化以宣鬯其德乃集郡屬謂之曰吾無德於瓊願廣文教以嘉進諸士孰當興群屬合辭曰瓊山郭內名邑邑有學舊在南郊文廟群祠悉如制自宏治戊午遷於府學右隅廟遂裁省師生歲時釋菜不便願如制公曰然有學無廟是缺典也昔人豈昧皮弁之祭以忘敬道願遷改勞民旣屈於力乃俟後人爾時可舉羸豈宜廢禮願與縣令吳君時昭更始以興起斯文教諭陳湯敬訓導黃子祿極力申請公至是慨然轉達院司諸道上憲悉從其請始筮日以次年十二月二十四日興工是日公偕二守安成趙公暨司理建寧徐公督工縣丞高君汶開荒畚土卽明

倫堂右考古祠爲之因買比鄰王歆屋址廣袤若干丈餘以拓其後南向建啓聖祠東西分建鄉賢名宦二祠考古祠改建於敬一亭號房之後兩廡廟門櫺星門森然如制今工未完公以考績行乃屬徐公興念猶切適新至別駕四明陸公下視邑事協心成之自陳君擢去吳君覲回黃君與新任司訓蒙君廷用併力董視每缺一椽一石必相與告於吳君督責義民陳文秀老人周德高陳降慎鳩而完之其勞足嘉吳君考終其功也數十年頽廢非張公吳君銳志敬學何能有今日耶諸士蒙諸公惠威思誦之無窮乃來請記因作詩誦之其辭曰渠渠新宮在瓊之陽有泓其池有饗其堂作者誰歟瓊守曰張成者誰與瓊守循良存心撫字事用不擾愷悌鼓歌袴襦攸寶化治宏敷聿興文教廢缺是修鼎新廟貌乃所願學鄒國格言邑人何修泰山在前仰之匪高鑽之匪堅希顏顏徒理則宜然憶昔在堂面命多士曰作新宮匪徒瞻視願爾諸生惟聖是式言必由衷行必由義若師有職若陶有型顧瞻新廟萬世儀型古人爲己今人爲名慎擇爾術無忝所生苟在其內務騁其外虛車幻套恆謂大怪如或用之斯民何賴敗類是懼慎爲爾戒再拜稽首請服嘉言聖門筆開敢不拳拳廟一告成休聲日宣矢詩載歌播以永年

臨高縣儒學記

鄭廷鵠

子思子有言修道之謂教人之於道或中或不中或至或不至是道有空缺罅隙之地故聖人因公共之材以權衡之即以其人之道修治其人之身使人人不枉其材不失其的以求至焉此教之所由興也國家以明倫立教在在建學又慮有空缺罅隙之地故加意海壤聲教訖於海上人人漸被王化無不向學以予瓊觀之極其盛矣臨高在瓊海中爲沃邑山岡之秀西自毗耶南轉遙拱落雲翠屏可挹而盆嶺麓之水旋而東亦佳勝也自宋季始就其左隅始建學焉洪武三年王令績創爲殿廡之制永樂三年朱令原律更拓大之是後屢加修葺未有若今之大壞也嘉靖庚戌閩鷺江陳侯址下車首以教化爲念毅然欲新之會侍御友山蕭公檄至槩行修理侯遂上估以行起工于壬子夏月侯當入覲事忽中止迨癸丑六月侯還自京師始親臨執朴又檄巡檢彭春專督焉于是百工各率其職規模改觀實甲寅十一月也先是敬一亭舊在東廡隘甚今改築於明倫堂後儒學門舊址並戟門卑湫不可仰視今增築三尺且易屏牆而廓大之又鑿泮池於儀門之外建神庫于文廟之東師生衙舍一時煥然學制大備其亦有空缺罅隙之地慮而爲周

詳耶夫道猶宮牆然子貢曰夫子之牆數仞不得其門而入不見宗廟之美百官之富正言夫子之道不假修而自無不周也夫子則曰若聖與仁則吾豈敢抑爲之不厭誨人不倦其修道之權衡豈容一日爽哉故於門人問仁問孝其端不同而其應也迥別則以其人之道修治其人之身或曰其心三月不違仁其餘則日月至焉或曰升堂矣未入於室也使不中者求其中未至者求其至於道雖無所損益于人則斧斤而削正之其爲慮也周矣故曰吾黨之小子狂簡斐然成章不知所以裁之其曰裁云者修道之異名也至今孔門之徒不枉其材不失其的萬世宗之夫豈偶然也哉陳侯修學非爲學計也正爲修道計也諸生人人誦法孔子既入其門而升其堂矣就以其身之仁與義以印證其言無異于顏由商偃諸高第弟子則其求爲夫子之仁聖又何難焉若徒以文藝爭優劣口耳誇強弱猶有昔時牙角之餘風焉是學可修矣至道則未矣恐非陳侯志也前此侯擇隙地建社學以訓蒙刻正始編以明禮後此於學前江外翔建石塔以示標修澹庵書院以示志可謂周矣暇日又引諸生升堂講課躬自校閱以儲養真材以爲國家大用無非爲斯道計也諸生皆此土之英尙其以道爲謀勉從吾言哉學諭尹君尙賢學訓張君茂才

正思興起斯文，勸予言爲記。予不佞，願以孔門高第弟子爲忠生焉。侯在邑，申減民壯，辨雪軍冤，修東門橋，造馬鼻渡，皆大裨政教。亦修道餘澤也。學成因并書之。

青燈記

鄭廷鶴

文昌有烈婦，殉節死郡之士大夫，聞其事，悲其志，賦詩以高其節。久而成卷，名曰青燈。獨誓者明，其暮夜之心不可得而污也。烈婦姓邢氏，都憲涓邱公三代族孫適黎天，注事姑。孝注兄天池，糧先輸於糧長符繼昌。昌故宗人符宗達重歛之，勾滑胥歐清潘六至家，適天池兄弟出耕，野外清窺邢年少有姿，舍天池妻韓氏繫之。韓請代，不允，相守爲命者久之。六給曰：「更衣來可代也。」韓歸取衣，未至疾驅至東坑，韓狗媽舍暮矣。邢解衣買油燃燈，拉狗媽伴焉。誓曰：「以此爲命，燈滅吾滅矣。」達旦不寐，清計無復之，乃謀於宗達，歸繫其家。置之別室，邢痛曰：「暮夜無燈，是無命也。」吾休矣。已六果犯之，邢奮身哭罵，自爪其胸，血流遍體。六懼，馳退，裂衣自縊。死時年二十有一也。一子尙在襁褓，傷哉。昔雲長在曹，長夜全君臣之節，賴此燭耳。脫當時無燭，或燭不足以達旦，苟達旦矣，而再宿去燭，雲長處此，惟有如烈婦以死自明而已。烈婦生長田野，夫耕婦饁，未必聞有雲長之事，乃與燈相依，燈

明俱明燈滅俱滅與古人忠義事適相符契是其衣冠遺裔故於母家有女訓耶蓋亦貞烈性成不待教而能者矣雲長秉燭以全名節又全其身以見漢先主君臣之際可謂無玷矣烈婦不得藉此以全生以見所天與其子豈人亦有幸有不幸歟抑天故抑之以成其名以爲法天下而傳後世歟死之日清六遁宗達棄屍樹下挈家遠竄越二日邢兄朝壘與天注得屍聞之官四日里老韓用儉覈報蓋棺已六日屍如生焉亦可見天地之正氣死且不朽矣嗚呼一烈婦死尤凜凜有生氣也如此而況世之爲孝子爲忠臣者乎

修瓊山學宮記

明都海 瑞瓊山人 御史

宮室一手一足之力也哉民日從事於官府造作之中傷其力不能不傷其財其害孰要於是俗有與人不睦勸人蓋屋之說受天子之民而牧之外者顧其智不俗人若哉目謂供遊觀之麗也心謂不爲出已之財也南華之經有曰大林邱山之善於人也亦神者不勝余意欲持上古茅茨土階之道不失赤子之心化今人心然天下事亦有必不可已雖大舜生今之世不能已之者取譬近事以例其餘府學之爲官五瓊山三一官一舍僅有其一人間世有不同之人情乎出納盈縮之權今非有司官不能官舍美不美不同未見

其一人不得居止之安六訓導獨無所有祖宗九經治天下體羣臣則士之報禮重初不如此不可一日安之事二三十年人安之太守敬亭唐公洺任之次年書院中有危閣改公館而日封鎖之何補也轉之府學後山之麓事非創新爲之通風日於文莊石室之中板其周圍上下尊經貯從古經史石室貯文莊公著述世史正綱學的遺稿會稿墨板猶有存焉貯其板啓聖祠地址湫隘更之前右爽塏之所合訓導宇而時一新之材力不至於此創成其一其五期漸圖之堪輿家有白虎昂頭之忌復門樞星之左見龍於東敵西方之口前南城麓坡陀草昧之象也闢而廣之城壁立而廓然文明矣士子前瞻雁塔後眺尊經風光物麗不可謂非身心性情一助也置省牲有所儲祭品有庫先有今墜先人未有行之者今則爲之後先錯舉皆萬歷七年八月日之事其修整栽植一瓦一木補葺罅漏蓋亦事之不可已而非其大者不計一心在民亦未嘗不一日一心在士其功如此士類感德之深向余毋吝一言紀事之盛夫今日可以茅茨土階言之乎非其時也勢有不行因之士有天下國家之志不能待舜聖人之時毋失舜聖人之心庶可小補之爾敬亭公太守當日之事愛民必其俗之改愛士必其習之正不覺聲色之峻俗士言不便

矣不以今之所謂厚悅其口傷民財力悅其目乎日舉興作之中不忘與民休息之意造士之功於是尤見其大貳守賓湖楊侯別駕鶴峯黎侯以調去任刑廳大東劉侯與有贊成之力於義得書雖然古人謂文人紙費梓文曰災木今災石矣茅茨土階是亦不可以已乎并爲之記

樂耕亭記

爲邱郊作

海瑞

始予未接西塾先生意一叅養之人云爾獲交數歲見其誦砥廉行隅之士歡歡然羨焉若有企望弗及之意嗚呼休哉茲世祿之難也交益久見其聞仁篤儉約之行歡歡然羨焉行且欽崇敕厥躬詩禮訓厥子敗度維欲敗禮維縱將深愧弗無焉嗚呼休哉茲世祿之尤難也嘉靖甲辰之歲于瞻玉堂遺址之西墨客村構樂耕亭於上將以統率僕佃之耕非徒取名於此也一旦以其事爲予誦予訝且喜曰賢哉先生樂耕之意乎而尤之者則曰不此之葺而顧彼營焉裕祖之蠱非孝也予意不然賈子稱一夫不耕或受之饑一女不織或受之寒今之爲民者五曰士農工商軍士以明道軍以衛國農以生九穀工以利器用商賈通焉而資於天下身不居一於此謂之游惰之民游惰之民君子之所不齒

也世咸以異端游手目之而不知儒生貴族特甚先生以文莊嫡裔居寶丞之榮俾自棄
名游惰之域以逞無彊之欲則凡可侈可淫之物罔一不備其爲園夫紅女之蠹可勝痛
哉視異端游手之害十百矣維亭有作爲耕也且以樂名推此意也必不忍腴若飲食爲
穀粟之靡必不忍皖若衣服爲布帛之蠹又必不忍厚若聲色之娛妄若貨賄之聚爲厥
生傷年彌邵德彌崇舉凡淫侈小物爲世祿子所有者咸芟奪蘊崇之漸盡矣嗚呼不賢
而能之乎仁篤儉約親親之行義節之羨行且期於反官之日矣亭扁樂耕豈曰小補哉
若夫流連光景假此亭爲游聚之地瞻玉堂有述亦殃也烏乎孝始而士今而農不爲五
民之蠹詩曰孝子不匱永錫爾類其先生之謂乎嗚呼賢矣哉先生曰茲吾志也敬持以
爲記

會同縣儒學記

王安誨

往歲隆慶丙寅會同修學予時職在史局業已爲記其事矣越今萬歷庚寅復以遷學記
請則邑之縉紳先生戶部主政王君顯先黔陽令黃君可久所爲歸功於憲大夫易公孫
公者也初學建於縣郭堪輿家多稱地利匪宜人文久不振願自國初迄今有司者率因

循未改事如有待幸兵憲易公奉璽書兼督學政始行部至縣謁先師廟低徊久之喟然
嘆曰吾聞之管子云士羣萃而州處燕閒則父與父言義子與子言孝其事君者言敬其
幼者言悌少而習焉長而安焉不見異物而思遷焉古之訓也先王之遺也茲學僻在郭
外羣處謂何簡陋相仍教學焉賴遷不可緩邑令徐君應麟祇命唯謹始易民居於憲司
行臺左偏畫爲草創擬以舊址定爲社舍群弟子課藝其中易公再至周旋其間徐而曰
革言三就政乃無敝此地雖良孰若憲署傍地其地燥則厥勢面陽於堪輿家最吉豈以
且暮傳舍而難百世計哉遂定議更築愜士民心而慕義者響赴耆民黃可學捐建明倫
堂爲首生員等七人邀助金錢若干緡令率司訓李君彥輔實規畫之經始於丙戌暮春
爲廟爲堂爲門爲齋爲垣俱已並建獨啓聖名宦鄉賢三祠未襄繼兵憲孫公巡歷周視
復命新令王君密終之令捐金湊建不逾兩月而三祠告竣是遷學之舉旣賴有易公創
其始又賴有孫公成厥終嚴嚴翼翼麟麟萃萃市井綿亘山川拱挹輪奐增美風氣攸鍾
會自是其有興乎夫備物盡制隆禮綏猷有司之績也若時遵軌象指觀化師弟之力也
語曰新沐者必彈冠新浴者必振衣爾諸士鼓篋來遊快覩新遷尙早夜孜孜深惟群萃

州處之訓而恪共孝弟義敬之節湔滌功利詞章之習而上溯德行道藝之源俾士與學俱新人與地俱盛異時論秀而升蔚爲名世不啻若管子所稱爲士者也豈不休有光烈哉憶往記修學堂推廣會同之義以爲諸生告意若曰會同於學者必會同於道然後爲嘉會爲大同維時諸士亦駸駸有味於予言者今守在禮官思奉揚聖天子德意煥起人文亦復敝帚自珍前說不變誠謂道無異術學無異趨惟時習日新鞭辟近裏一如學宮之自外而內舍其舊址而新是圖也庶幾無負兩憲大夫遷學造士之旨而其味於予言也益信矣大夫相繼治瓊宣慈布惠飭戎賑荒謹身率下諸善政不可殫述茲建學特其大者會同之士民思以志不忘故於易公之所創始及孫公之所成終者並書之俾後之覩記者知公之功德與此石同垂不朽也易公諱可久宜春人孫公諱秉陽懷遠人諸有司姓氏列之左

重修定安縣學明倫堂記

王宏誨

王政首學校尙矣乃其職修舉繫於天下郡邑之吏予觀今爲吏者有動有意故學之修廢因之瓊州去京師萬里督學終歲不至有司者鯁鯁然循常簿書之外其於學校率蔑

棄迂視之無論矣若陽邀崇獎之譽遜難自逸即鞠爲園蔬弗理日覬遷去免者比比也
又其悖者動不度時勞費罔恤則化理無裨而先以其民困矣是數者其失均也張侯之
治吾定獨不然侯諱文獻別號古濠閩之甌寧人始下車釋菜學宮見諸棟宇蠹蝕牆壁
傾圯且明倫卒爲蒿萊師生絃誦幾輟喟然嘆曰嗟乎學之廢一至是哉爰進諸生問故
僉曰茲學創自洪永迄成化嘉靖間常一再修之嗣後仍敝就簡寢致大壞侯曰是吾責
也維時帑無羨儲且屬有修城之役未就侯念信永孚而遽以勞民不可乃弛禁節費均
役清訟大小事咸旣厥心志越一年政通民和廢興墜舉爰白其事請於上官報可迺集
議計貲鳩工聚材明倫堂五間咸即其故址而重建之中三間爲正堂左爲書籍庫右爲
祭器庫諸如宮廡門牆缺者增築舊者更新自丁丑正月更始閱月而落成爲財若干咸
取於官之贖而民不知費爲役若干咸董於鄉之良而民不知勞故侯於士民教之欲以
成其才愛之不欲傷其力故籌之甚勤而就之有緒也先是不佞常念瓊州學使不至教
化廢弛疏請得比甘肅以海南兵憲兼董一道學政至是天子始下章禮部如所請命下
之日士無少長賢不肖咸踴躍歡傳有奮迅蒸變之意適定安修學事竣華采煥發今昔

改觀王子喜而颺言曰於休哉繼自今吾邑人才之盛顧不在茲乎夫發祥者兆幾集事者乘會瓊州閱二百餘年始更學政而定學載輿適維其期譬之新沐者彈冠新浴者振衣幾會所值豈偶然哉易之義以去故爲革就新爲鼎故聖人序易先革而鼎繼之故隸學政有革之象焉修學宮有鼎之象焉庶幾乎定安士習因之去故就新人文丕變也哉愚聞之山川與人相待而成五指爲瓊絕域目文莊公一品題之天下瞻仰不啻終南太華矧文筆在定安近境空青峭壁前列戟門獨擅離明之勝有能紹往緒潤鴻業黼藻經綸宣昭代人文之盛意在茲乎詩曰高山仰止景行行止遊息於斯者可深長思矣予旣頌張侯之功且諭吾黨之士自今興起未艾而予之疏請更學政造賢才者先自定安徵之焉會張侯書來京師屬予記其事爰不辭而系以詩詩曰於赫明皇蒸變華夏丕立學宮作人宏化維定有學歲久而圯吏顧愕然累政相繼張侯下車循視喟然曰是弗修孰贊化源信之未孚侯則需時釐政擢費起我瘡痍翼歲政成上下咸可庀役捐金侯志斯果詵詵民士義重而勤斧斤版鍤羣從如雲乃修學宮學宮翼翼師生收處有堂有室遐哉瓊崖學政久弛疏請更之自今伊始機會所遣孰時使然若鼎而革咸與維新筆峯吐

奇人文不振翼相明時登庸賢雋昔有文翁侯則媿之濟濟髦士尙攸宜之成美不忘敬
哉有位史有銘詞貞珉斯咏

水會所平黎善後碑記

王宏誨

珠崖海外一寰區也裨海旁羅郡縣而五指黎婺諸山荆枳其中醞釀黎岐世爲瓊患自
漢兩伏波將軍啓土以來歷代叛服靡常無能拓封疆之咫尺者迨我天朝三勤王師每
大舉重兵無慮十萬雲集境上斬蓬蒿而夷之始未嘗不發蒙振槁而後稍稍蘖芽尋斧
柯也豈非以善後術疎而經遠之略當日未暇亟講乎頃歲黠酋黎馬矢倡亂糾合諸亡
命黎廣王蓋老孫恩第等闖入內地肆行寇掠州邑震動數年莫可誰何歲己亥督府戴
公耀始下車憫其狀亟採群議疏請調剿得旨報可乃攷山川掄將帥選徒御峙糧糗節
戈矛刻期興師始命東山遊擊將軍鄧鍾率所部精兵偕雷陽副總兵黎國耀瓊崖參將
莊渭陽各率所部廣雷瓊土官兵共八千有奇分道協剿監軍則雷州府同知萬煜紀功
則瓊州府同知經仁木而分守海南道參政林如楚兼督之議者謂盛夏酷炎進師不利
宜少須以待秋初鄧將軍持不可夫智貴猝力貴突賊恃險煽亂乘其無備一鼓可克今

秋禾將熟逡巡不進賊得穫而守一人據險千人莫過師老矣何克之爲督府善其議趣令進兵維時峽門爲賊關隧最爲天險鄧將軍獨當之黎將軍兵嚮定泉莊將軍兵嚮水焦約閏四月初八日會戰賊料定泉水焦二處層巒絕巘勁弩踰伏我軍不敢深入峽門當孔道率其驍牛坡星等守之先是四月鄧將軍移兵馳鼓嶺往水焦爲合擊狀倏初七夜撤而趨襲峽門諸士有難色將軍登定功峯觀天象適見水星蓋於金星晶光燭天大喜云此破黎之兆也諸士皆奮躍買勇先登銜枚而前賊兵殊死戰兩岸矢下如雨軍士用皮牌擁衛各以三眼銃火箭亂射殺其驍牛坡星諸賊驚哭曰官兵自天而下耶追奔嶺背大破之賊首王樂天引小嶮賊徒七人號七虎圖爲策應立斬之軍聲大振次日莊將軍兵由水焦進又次日黎將軍兵由沙灣進後先夾擊直搗居碌峒焚其聚落鄧將軍誠兵固壘因糧於敵窮搜五指乾脚賊首黎馬矢等數十人計窮就縛賊衆潰散怖死者躓僵者澤跳者伏菁林而立枯者不可勝計棄弓矢納村落者咸待以不死甫四閱月黎悉定計俘斬一千八百有奇拓地三百餘里督府下令班師瓊父老子弟鼓舞懽若更生爭操牛酒遮道爲將軍賀旋核功次以聞上嘉乃丕績特晉督府兵部尙書守道參政林

如楚加秩憲使將軍鄧鍾擢副總兵鎮瓊崖諸文武長佐而下各紀錄給賞有差遂議築水會城置守禦千戶所謂萬千年不拔之基已海南道副使程有守至區畫經營屹然金湯之固已憲使林如楚副總兵鄧鍾撫黎通判吳俸相繼踵至規畫先後不遺餘力乃留戍守興屯田勾軍伍稽畝籍創公廨伐山開道東達萬西通儋漸次疏通又設巡司以備譏察立墟市以通貿易建鄉約以興教化豎社學以訓黎庶時屆壬正諸峒蠻扶老攜幼於新城觀燈玩彩熙熙然快覩昇平氣象而督府聞之喜可知也頃鄧將軍時巡水會諸黎父老攜壺漿勞苦道旁拜手加額謂微將軍吾儕何以有今日將軍避席稱謝硤門之役重邀王上寵靈遵督府碩畫一鼓而俘罪人諸凡善後事宜種種稟受成命何敢自多父老曰嘻督府暨將軍大造於瓊吾儕宜謀世祀率衆創生祠於新城之西以志不忘而屬碑文於宗伯氏不佞辱在宇下聞見最核念事端初發未嘗不與衆同憂及茲側聽驩聲又不能不與衆同樂雖文辭萎弱竊以爲桑梓之幸無以加此顧茲役之預有勞者不能盡載謂宜著在碑陰並垂不朽若督府戴公耀副總兵鄧君鍾則終始其事勞苦而功高衆論攸歸又不容不表而出之也遂系之以詩曰皇矣聖明威加六合慕義嚮風莫不

震疊蠢茲黎岐溟甸中窟盡我腹心世爲蠹賊弄兵四出煽亂一方叛服靡定虐焰方張
帝曰來耀保釐南服哀此瓊人歲罹毒誓清大慙受命徂征謀而淵默斷乃雷聲桓桓
將軍允文允武仰視乾象潛移師旅用奇奪險宵襲制勝銜枚破關裂竹響應曾是螳臂
而當車轍載扼其吭載窮其穴橫屍血流山海之嶽狐妖憑邱鹿豕走陰天厭盜虐師不
踰旬執訊獲醜其捷如神王路載清黔黎相慶遐荒旣平四國是定雪夜破蔡五月渡瀘
視此鴻功千載同符捷聞當宁褒賞酬庸天揪地揭宴歌彤弓帝睠南顧還我將軍經營
善後保我黎民猷滄漉滉崇墉言言百千萬禩炳烺長存定國勳勞昭哉祀典飲食必祝
垂休瓊琰將軍讓功曰維督府督府不居歸之天子天子萬年垂衣舞千勒此豐碑昭示
百蠻

會同學田記

明吏科
給事中
許子偉
瓊山人

嘗聞地之美者善養禾君之仁者善養士董子曰不素養士而求賢譬猶不琢玉而求文
采不可得已甚哉夫士貴養也會同自設學來文教雖興而養士無具作人之典猶有缺
也余鄉遊東山道假會邑侯盧公學博池公來謁譚及士風因謂予曰學校有田猶草

木之有雨露士實藉焉予輩業已捐金謀置學田矣居無何盧公以遷秩行蒞邑政者今
虞公遂慨然共成厥舉擇買腴田一莊歲收爲諸生課餼焚膏之需於是徵言於予以諭
諸生予先之曰夫士之異於凡民者儒其衣冠肄其儀文以夸耀州里乎哉蓋有莫大之
責矣書不云乎既富方穀羞行昌邦茲在上者躬行教化而養士以田是雨露之培潤也
爾士幸際斯時尙相與思育才之雅意存實心講正學居必蹈道履德出則綏佑下民步
武昔之所謂薪樵械樸者斯爲向陽之幹傲霜之條而官家重藉是若徒具衣冠儀文糜
茲田祿於所當盡者不翅弁髦視之如草木自外於大造不蘭芷而蕭艾也將焉用之
其若在上者之作興何多士懋戒哉

儋蘭村德義書館記

許子偉

余從萬歷丁丑迄庚寅蓋儋遊且六禩焉初爲王敬所延館於唐松山故宅扁書室曰知
新取可以爲師之義未有記也秋移館七里何鄉徒漸衆會文於觀音古剎追扁曰冥會
性靈尙未記明年徒益衆乃館於郭岐山圃圃在大蘭村郭先生榕庄以儒官顯而稍落
寞可念也扁曰蘭館書香則有記矣又明年余始入博士弟子員副榜落第庚辰遂之儋

修舊業而前徒皆已列州。巖爲諸生不可復業。乃爲劉梅臬所延館在高坡。時蓋異鳥來翔。意其鸞也。因扁其堂曰鸞坡。堂則又有記矣。儋西北有德義嶺。岐山尋徙蘭館向之。曰陽明精舍。曰後樂橋灣塘。叢竹余蓋旬日。一盤桓焉。壬午叨鸚薦。甲申載就德義館。諸生徒衆如戊寅而旣倍之。余書室正對德義。始揭尊德樂義與諸生共談說。而岐山家益窘。神益旺。每攜余坐竹橋上一觴。一豆下觀。小魚爲娛。晴則憇濃陰。歌白沙陽明詩。句雨則引水入塘。拊掌徜徉。飄飄然若脫世網而僊者也。孟子曰尊德樂義則可以囂囂矣。岐山非其人哉。丙戌歲余第進士官行人。丁亥奉命理海忠介後事。越己丑而竣。復僱遊講義學盟義學。得地於儋城東南郭外。取傍東坡祠。易集諸生而岐山舊誼不可辜也。乃勉捐十金。勸德義書館於蘭村。岐山力肩勞費。以興起斯文。爲己任。陳守廉厥善狀。招致旁鄉。夫佐成之幾成。而岐山易箴訣語專及此館。及余不它及焉。茲不可以觀德義哉。今余冊封歸省。業已爲文哭岐山。而書館方新竹塘。仍故山川。尙以識人。諸生隨入蘭村。越宿而散。岐山子思敏隱然。乃父風。已余不佞。敢颺言曰。余與諸士以道學相切劘。以功業文章相砥礪。依暇數歲。不忍解攜。德與義也。岐山與余嘯傲林泉之間。翱翔塵壒之外。鄉國

幽明夢魂耿切德與義也諸士與思敏輩一稟師若父雅意道志孔孟業志伊周文章志班馬遇則名世不遇則範世德與義也周子曰天地間至尊者道至貴者德至難得者人而至於難得者道德有於身而已

瓊山表賢亭記

表薛遠邢宥
邱溶林傑

明僉
胡榮
新喻人

四賢俱發軔巍科接踵要路猷爲足以匡弼時政風裁足以激揚濁清文章足以補助道化實瓊人之師海內之望也且其家庭孝友之稱鄉黨信義之行又瓊人耳目所逮聞飶見脫無上人之表著當亦有感民興善之效矧復建亭表其里以聳民觀瞻乎風聲所樹動人被物將勃然莫之能禦也榮忝職提學風化攸司嘗叨聯法從於諸賢之後是舉也憲臣尚德不尙威瓊士丕式於前必有丕承於後也遂不讓而書此於石

定安王忠銘公生祠記

明探
曾朝節
湖廣人

大宗伯忠銘王先生初爲翰林檢討上言臣竊觀天下儒生之僻遠而最苦莫若廣東瓊州之甚者也瓊州環海而治距京師萬里轄州三縣十青衿弟子歲集督學憲臣就試者不下數千學臣嘗不一至其地每試士輒駐節雷陽而諸生之航海而北渡者不下二三

百里遠則千有餘里擔簦跋履險阻不易矧以葦航而沒於颶風鯨波之間徒邀不可必
之天幸而邇來海寇四出往往伺半渡而標奪之所謂出萬死而一生者也間有憲臣慮
及此者僅移檄郡邑淘汰而錄之尙不及半以故黜降不行德行不舉教化廢弛士習玩
怠而隆慶己巳詔選恩貢甚盛典也獨儋崖諸州縣以遠不及試殊非聖天子加惠遐陬
至意臣竊痛之臣愚以爲海南故有兵備副使專治兵事而闔郡師儒歲試舉黜一切任
之便疏上天子報可瓊士至今賴焉然公絕口不言瓊士亦無有知者近文學陳之屏於
先生故篋偶獲披閱徧以聞之多士多士相顧謂曰先士之功卓矣偉矣不可諉矣而又
善自韜匿如是吾儕淺衷烏足知先生哉會先生詔起田間戒行有期多士謀報先生之
德將拓祠於先生所朔書院之北肖像而尸祝之走使緘詞於不佞節曰鄉者先生書院
貞石旣辱名言敢再溷記室節德先生甚多士其何能辭蓋聞之祭法矣能禦大菑則祀
之能捍大患則祀之夫颶風鯨波天之菑也海寇標奪患孰大焉先生捍禦之功不寧一
時而及於世世其於祀典也宜哉抑多士於先生將報其德乎亦薰其德而善良也夫先
生毓德於海者也冲襟雅度澄澹汪洋納川藏瀆未足喻其大也博綜載籍斧藻皇猷崩

瓊州府志卷之三十九下

藝文志四 記下

重建治平寺碑記

國朝昌化令陶元淳 常熟人

東坡先生自昌化雙溪館下步尋溪源至治平寺賦詩二章以王梅溪詩注徵之雙谿館在縣治前考宋縣在今之昌化村谿水發源五指經德霞枕水岡而下至縣之東境分爲南北二流故曰雙谿坡公自館下步尋溪源至治平寺又在東大約溪水分流之所其遺址也今其地皆黃沙白草詢之土人僉曰此故良田明初橫罹水患城邑遷改無復一畝存者而今賦額未除縣坐此蕭條吾聞言嗟歎行求所謂雙谿館治平寺者了不可得亦莫有知其名者蓋古蹟淪廢已三百年矣吾將欲復之而未遑也谿北雲谷虛冷林木深秀望之若圖書其中隙地一區泉甘土膴榛莽既闢豁然天開意境迥別不復知爲昌土也吾以今城磧鹵不可居民建議築堡於此爲保聚安集之計遣人伐材於山召工於府一切不費於民立廡宇五層爲室二十一間中一層覆以陶瓦前後各二層則竹木茅草

而已功未成而余將去官憚其志之不遂也尉來告我曰夫節序朝賀明有敬也今御座雖設而未有奉安之所不得爲敬吏趨而進曰州縣積貯備凶荒也今轉輸既多而未有蓋藏之利不可爲備行旅之出於其塗者休車雨中曰水潦方降已病涉也仕宦之阻於是溪者徘徊道左曰候館不立無即次之安也嗟夫此皆先王之政載在月令掌諸候人設官以董之及時以課之者也而今顧若是乎自置縣以來制度亦屢新矣而鄙俸如故有其舉之而復廢之抑廢之而不復舉耶無亦賦額虛懸百物凋耗故陵峯衰廢併古蹟而俱湮也今欲復之又恐重勞吾民吾奚忍哉尉曰請改宇爲佛寺而以其中奉安

御座旁爲囷倉其以餘休行旅一舉而數利附焉繼自今以往鳩我民而保聚之安集之特易耳余曰善楚人陳國龍素善士請捐貲財盡易以瓦增置屋宇延僧董修其中且乞寺額余惟名賢之遺跡不可久湮向固欲復之而未逮今因公家之事以致其懷古之思而又利益於地方則斯寺之額舍治平無可者於是伐石立碑爲之記以遺之及余未去鳩工以潰於成民雖勞力可已矣意更欲復雙谿館祀坡公於中而力不能逮則以俟後之

重建郡城景賢祠記

國朝郡守賈棠故城人

瓊郡北郭舊有景賢一祠祀宋蘇文忠公軾明邱文莊公濬春秋致祭歲久傾圮康熙癸未中丞彭公命建兩公專祠景賢遂廢丙戌歲余續修郡志見崖州向有景賢一祠祀唐太尉李公德裕宋宰相趙公鼎宋學士胡公銓續後改爲五賢祠夫任公伯雨李公光李公綱其賢同其被斥逐同以安置昌化萬安軍獨不得與用是怒然此崖州一祠乃就崖論賢耳余維同是人在當時或以不賢見棄或以賢著名彼亦不自知爲賢不賢迄今尙論古人莫不以賢稱之則其人生平爲何如耶諸公忠義文章昭垂天壤時遇雖有異同節概有如一轍瓊處遐荒絕島得此數賢後先輝映其過化存神之妙足以風勵有位儀型邦國抑何幸歟余旣不忍舊祠遽廢泯沒創置初心又不忍先賢志同道合祠祀獨有缺爰捐薄俸復建祠宇於舊祀蘇邱兩公外增列諸賢用彰直道再賡短章勒諸貞珉以期不朽孔子曰見賢思齊焉詩云高山仰止景行行止余深有望於是則是倣者矣因書數言以誌

瓊山義學義倉記

賈棠

瓊士昔多名雋而民亦阜且饒今則弗古若矣豈運會衰而物產耗與抑教之養之之失職與余自戊寅來守茲土竊慨然焉夫漢有僮尹而俗以變宋有宋守之而學以興董率之責庸將誰諉爰修經歷廢署集十三州縣髦士而延師訓之定其課程俾朝夕講習脩儀悉出余俸復置田博冲之洋歲收其租作廩膳爲久遠計庶幾哉單寒藉以觀摩而聖天子文治漸訖海邦矣願負笈得安肄業而力田或苦災祲可若何用倣古義倉之法特於署後城西北隅捐俸造倉勸民積貯擇里老爲正副管理其事饑則借給熟則輸還而胥吏不得與焉署瓊縣蔣丞謂義學以成俊士義倉以贍窮民均義也請合紀其由於石余維義之於人大矣士知義則砥行立名而綱維以植民知義則循理奉法而風俗以淳故曰義者仁之質也今藐茲一區學數楹倉其及能幾何而敢以市義爲獨是人之好義誰不如我倘後之君子踵而行之增修而光大之後春誦夏絃而士風日振家殷戶足而倉積常盈焉知義士義民不從此烝烝也爰爲之記

蘇文忠公祠記

國朝廣東

巡撫彭

鵬

莆田人

余髫年時讀公文章見其渾涵光芒雄視白代切切奉之然猶以爲文焉已耳既而考其

立朝大節則忠君愛國不隨時俯仰雖屢遭摧抑投之荒裔弗悔不禁慨然興曰偉哉文忠行如其文真足爲吾師表者乎歲癸未余奉

命巡撫廣東偕部閣大人來瓊審理黎情謁公祠陋其制謂雷瓊道黃副使曰先賢遊歷之地山川生色草木增華矧公謫居茲土與姜唐佐黎子雲輩講學明道爲人士倡其有造於瓊甚大俎豆而尸祝之宜矣何至弗絢弗鞏若是廓而新之其何敢後副使曰諾爰及賈太守協力捐俸拓地庀材鳩工姚郡丞贊理維勤正有堂中有廳外有碑門與邱海二公祠鼎建爲三而繚以周垣經始於本年二春十閱月告成請紀其役以諭後人余曰然遂記之

邱文莊公祠記

彭 鳴

公先明一代文臣之宗也相孝宗紹烈祖致太平博洽古今著述甚富皆有裨於世教而衍義補一書自謹幾微至成功化本末內外罔不畢賅可以接賢聖之傳可以贊帝王之治實與西山真氏同爲大學功臣乃僅準鄉先生社祭之義從坡公共祀景賢豈非闕典余竊有慨於斯久矣龍集辛巳按事至瓊謁其祠竦然曰崇先賢所以勵後學也况公之

文章事業尤足興起百世者乎不專何崇不崇何稱庸已諸因命雷瓊道黃副使等移之爽塏而更其規制三福並建壯麗若一至癸未季冬告成既宇既庭祀事有經以彰哲軌以翼休風以砥頽俗皆於是乎在爰勒貞珉紀其由云

海忠介公祠記

彭鵬

品行之高由於學問公之忠貞耿介公之學問爲之也世乃以爲血性之剛不知公矣今觀備忘集文章經濟皆足千古而治安一疏尤言至情言至理非有大學問而能然乎故夫以末秩而折權要非妄也以小臣而觸天威非狂也以盛位而甘清苦非矯也於理見得真於心存得正於氣養得充蓋自藏修之年卽著嚴師教戒而凜凜於虧影辱先則其學問固超然遠矣余不敏學問不逮遠甚然區區之心時欲以公爲法吾師乎吾師乎豈有歷其里登其堂見其廟模狹隘而不亟爲更新也者願是役也剏之者余成之者黃副使國材而董修不辭勞者賈太守棠姚郡丞哲是皆有志師公且欲瓊之士庶皆知取法乎公者嘻人盡師公天下何事不可爲哉天下何事不能爲哉庸書於石以俟

重修潘公河碑記

國朝
巡德
明

郡城南河由東門橋迤邐而北下達海口其來舊矣自前觀察潘文恪相度地宜鳩工興
修瓊人賴其利勒石河干名曰潘公地以人傳也十餘年來半就淤塞每水涸灌溉無資
舟楫弗通名存實亡識者惜之余監司雷瓊歷訪民隱知潘公河之爲利鉅而開濬宜亟
也抑舊制猶有未盡應畧爲變通者夫河有上流下流有旁流是河之源一發自龍湖本
支甚淺一發自廢潭謝潭并入博冲大河旋轉而出其勢爲大河所奪細流涓涓無由利
濟惟於北冲口遮設滾壩則二潭專一內而上流裕矣下流出窰窰外與潮接潮落輒
涸於下窰口鍵以石閘隨時開閉水少蓄其勢使不遽下多則洩之庶下流源源可繼矣
蓋二者河之樞紐潘公僅治河身於前茲則交治河之源流於後者也且此猶爲水少計
也夏秋霖雨時降一河不足以受兩源之水又於旁流舊河久經塞築者敗爲減壩俾落
有所束長有所分而全河之大勢底績矣先是副使王公斗南暨太守宗賈二君與夫鄉
之薦紳於潘公前屢有修治至潘公而功愈茂名愈彰今雖變而加詳總此惠農田通商
旅百千年利濟吾民之心而已是役也群情鼓舞樂事勸功共費白金八百兩有奇四越
月而工竣郡丞李君諳河務多資贊勳昌化伍令與有勞勤舖前巡檢潘景魏瓊山典史

劉起坤奔走從事例並得書是爲記

遷建瓊州府學記

極南大瀛海沐浴文明百寶之氣加以

聖天子道光不冒是彝是訓環匝萬里千村百峒雅歌之聲相聞人文士氣蒸蒸郁郁日益登躋淳厚昌熾而遷學工適告竣其地在瓊州郡城之中後瓊臺而前瓊山東北挹雙泉之源西引龍潭西湖南帶南湖之水會大江入於海中直城樓居高居陽爲一郡十四庠序之首中爲大成殿以奉

先師孔子旁爲兩廡自門序階闈莖籒宗桷講誦之堂庖湑之所候望宿息罔不畢具經始於乾隆三十四年十二月而以其明年冬落成斯地舊試院也學故在城東南隅先是宋慶歷四年始建郡學淳熙中嘗重修之子朱子所爲記也明宏治時遷縣學於其右而城築於建學之後城廣而學偪迺始議遷學舍圯於颶又議遷會郡人吳位和等願率私錢助工僉以使者試院地爽塲宜建學乃遷郡學於茲而以故郡學地置院遷縣學於其西北更買地拓之於是兩學聿新郡伯桂林曹侯以郡人之意來請一言爲記方綱三至瓊觀

國朝

學政翁方綱大興人

於海觀於聖人之門則必擇其言之尤切要者記之方綱竊見瓊之士漸摩久而觀感切蓋皆知學之繫於人而關於地必擇高明顯敞之區以營之且當官吏正議修建時闔郡紳士爭先出白金至七千餘兩踴躍倡導功百其倍父老子弟恭敬趨事由此昌其文盛其科目敦其士俗是所宜書矣而又有進者昔者乙瑛之王錢史晨之家穀詳於奏祀之文而反畧於綜理之規教條之善今曹侯之政旣章於斯民而以民情願助之實上之部使者其經營度支條件出入之節則令紳士自推其能者核之不以吏役稽焉是侯之敬慎公務不以輔其平日化民成俗之爲者尤宜大書而以方綱所區區欲記之意則尙有進焉者是學之所最切要而爲他學所不獲有者在朱子一記而其石與字今皆無有也其畧曰昔者聖王作民君師設官分職以長以治而其教民之目則曰父子有親君臣有義夫婦有別長幼有序朋友有信五者而已蓋民有是身則必有是五者而不能以一日離有是心則必有是五者之理而不可一日離也是以聖王之教因其固有還以導之使不忘乎其初然慮其由而不知無以久而不壞也則爲擇其民之秀者羣之以學校而職之以師儒開之以詩書而成之以禮樂凡所以使之明是理而存之不失傳是教而施之

無窮者蓋亦莫非因其固有而發明之而未始有所務於外也使瓊之士知夫所以爲學者不外於身心之所固有而用其一日之力焉則其德成行修而無所疑於天下之理將無難者而凡所謂功名事業云者其本已在是矣子朱子之言若此則凡入此學者其於仰止聖人希法前賢之要道舍是曷求乎万綱不敢不敬錄於石俾觀者深體而加省焉則亦猶之難爲水難爲言之義矣學又有方石碑一明成化癸巳豐城涂副使柔以八分書朱子齋居感興詩也謹語曹侯遷之於新堂而利韻刊示學官弟子焉其戟門壁池宮牆面勢丈尺器物書籍典守冊日咸有司存故不具著

英佑將軍江公祠壁記

翁方綱

神姓江氏諱起龍江南徽州人官海安水師副將其封爵曰英佑驍騎將軍之神今海安所海口並有祠往來渡海者必虔禮焉謹按志載將軍爲人仁勇忠直初任水師參將駐白鶴寨通明港當雷州初開白鶴營署俱圯又無城塹可守將軍周視白鶴當郡城入海之口爲雷州左臂無白鶴是無雷矣乃捐貲立營寨廣招居民屯聚爲墟市於是舟車輻輳商貨畢集與雷城相應遂爲一方雄鎮是時順治十三年也康熙元年晉副將三年移

水師駐海安口兵民帖服五年出洋捕盜風發舟覆殞焉民頌其功而思之將軍歿後疊著靈異祈禱立應雍正八年十二月布政使王士俊請於

上欽定爵號至今官民事祠逾謹方綱以乾隆二十九年冬按試至此酌酒於神祠而碑記事蹟弗詳退而考据省志郡志謹書諸祠下而爲之詩曰國語所載以死勤事禦災捍患者於祀制神則兼之忠直勇仁功垂於疆德施於民於廟靈海神錫純嘏倅歛駢羅靈旗雲馬作廟奕奕降祐孔多以贊

皇化重溟靜波爵由

帝命蹟爲民思官屬奉嘗子孫守之於雷於瓊標燎一氣保疆綏民更千萬世

新建瓊山雁峰社學記

國朝巡撫德保滿洲人

瓊州在大海之南土地沃衍人物馴雅而文風稱盛於嶺表乾隆庚寅歲余撫粵下車采風諸郡瓊士咸踴躍鼓舞度越重洋而以文投獻閱其文率典雅醇正有先民遺槩良由聖朝聲教覃敷漸被遐陬海濫涵濡沐浴百有餘年以故南溟奇甸之區巨漲炎烟之域英材蔚興家弦戶誦媲美於中土昭邛治之同文豈不休歟今年秋編修吳君典自瓊來謁

爲言新建鴈峯社學落成乞一言以記其事地舊爲郡庠遺址在郡治東南隅其前三峯橫亘爲鴈塔三元峰先是瓊州鴻雁不至自邱文莊讀書郡庠時始一來賓公爲作鴈集瓊庠記嗣郡之紳士以巽宮頻水近逼城闕觀瞻未稱會颶風迅發棟宇飄搖籲於官購校士館地更易之而鼎新文廟焉於是故基閒隙形勝家咸謂地屬郡左青龍不宜低陷僉議請建築社學其名以鴈峯者表三峯之勝概兼以示不忘昔賢遺蹟也抑余更有說焉古之教者家有塾黨有庠術有序國有學社學之設於國學爲始基古之學者七年則小成九年則大成所謂大成者豈惟是挾策呻吟求工於文藝之謂蓋將以崇本敦實明體達用而實有所表見於當世也文莊以儒生崛起海外迨其通籍後啓沃君心釐別朝政卓然爲一代名臣今諸生幸生文莊之鄉誦習文莊之故地即當步趨乎文莊之爲人詩有之高山仰止景行行止他日占鴻漸而筮羽儀實有以表見於當世焉此則大成之諸余所爲遙望瓊臺而殷殷致願者也社學凡建講堂五間文奎樓五間東西兩齋十二間大門三間周以垣牆規模整肅封編修吳福暨紳士等八人實捐貲而經理之共釀白金四千兩需用及半餘以置田諸紳士輪掌其歲入爲延師膏火并士子賓興之費余嘉

封翁是舉之有造於鄉與編修之繩武濟美且欲使瓊人之知所矜式而興起也爰諾其請而爲之記

京都瓊州會館記

國朝編修吳典瓊山人

瓊州去京師九千餘里人士之至止者稀以故他郡多有邸舍而瓊獨闕焉公車之上南宮選人之赴吏部往往寄寓全省行館屋少人衆或不能容有力者僦屋以居否則投諸逆旅湫隘雜沓要挾苛索不可終日乾隆己丑典官京師始與郡人謀建會館壬辰春買宅於正陽門外靈中坊大外郎營北口內其屋三重圍以旁屋計十七間又買屋左隙地從十二丈橫五丈五尺共用白金五百六十兩壬寅仲秋乃改造焉屋之西向者易而東向凡爲堂三間前廳後寢各五間旁屋十有一間又於其左內外各建屋三間其外爲大門門之右二間租息以備修葺費館人工食亦於是取給通爲屋三十二間有半其東北隅尙餘隙地一段以俟他時補屋計用白金一千七百有奇先是己丑歲定議建館郡人共捐白金九百六十兩買屋有餘則以逐年生息至壬寅而得八百金郡人又續捐九百金共一千七白金以充改造用事不勞而工舉於是基廣而勢完外堂內寢統以雜室庖

第
三
九

滄廡楹紆曲有容瓊人萬里而來者息肩投足至若家居鄉語喧嘩忘其爲客不復有湫隘難沓之虞與夫挾苛索之患矣夫以典官京師闔一郡之力經營十餘載始有一區之屋以供鄉人之偃息不可不誌其緣起方今

文明日盛瓊之人交臂而至者日益衆後之君子有能珍護其已然充益其未然無俾人謂吾瓊邸舍不他郡若也則是舉固爲其嚆矢矣壬寅改造之役候選知縣會同吳君嗣湖候選訓導歲貢生會同陳君江定安程君學道候選縣丞瓊山馮君漸芹著勞焉例得備書

重修會同學宮記

己未孟春予忝奉

國朝學
政萬承風
寧都人

簡命視學粵東明年夏按試瓊南循例歲科並考凡三州十邑人才之優劣文風之高下靡不瞭然於心目竊自維學殖淺陋無能啓發聾瞶排日校閱昕夕未遑事已輒他適又不得與諸生講畫以期共趨於大道用自愧慙每論文之暇接晤諸有司暨各學博時切切以振興獎勵爲屬蓋轉移風會之權操之自有父母師表之責者不可不亟加意也會同爲瓊屬小邑距郡城二百餘里分障五指之東爲其風俗淳樸士人知重經術嫻聲律故

多文理成就之士斐然與儋崖諸州頡頏馳驟予雖未履其地知邑之所以崇文教而培本根者端有其自試既竣明府黃公祚昌郵書請曰下邑文廟近爲颶風摧圮殆盡紳士等以爲本源之地不可久任傾頽爰捐金鳩工共圖修葺基則仍舊材取其新向之規模卑狹者擴大之而興文祠省牲所更衣所前制之所未備者具舉之今將以季夏竣事適逢星軺南洩多士仰被甄陶益相與鼓舞不倦遭逢誠非偶然祚昌以風塵下吏承乏攝篆茲土甫抵任即得與諸君子樂觀厥成不可謂非厚幸也請記其事爲多士勸予聞而喜曰學校之設所以崇師儒廣教化春秋養老之禮鼓篋遜業之資書升論秀之選於是乎在典至重也

聖天子稽古右文化民俗必先於學校學校之興廢人才之盛衰所由係也會同雖僻處陬澁然幸際重熙累洽之時涵濡

聖澤閱百六十年間嘗考其志乘見夫登賢書者有人宴瓊林者有人則繼自今春誦夏絃有其時敬業樂群有其地翱翔乎詩書之圃優游乎禮義之門人無異趨家無異學魚魚雅雅咸思爲通經致用之儒以上應昇平之運不可於斯學之建有以操其左券也哉予旣

喜諸生務本急公又嘉明府首知政要不致違其請也用走筆爲記若夫土木之經費董率之名氏捐輸之多寡營建之日月明府當別爲詳記以示後人茲不具書

重修文昌學宮記

國朝學政姚文田歸安人

嘉慶六年十月文田奉

命視學粵東至九年秋歲事行將以代去而文昌縣學宮適成諸生葉重輝林立等來丐文爲記文田學殖淺薄既奉職三載無以仰副

簡命顧常念

國家所以建設學校之意凡欲使國之秀民皆進厠庠序而沐浴於詩書禮樂之澤及其經明行修則他日爲良相爲循吏即使終老巖穴猶將薰其德於一鄉如陳仲弓王彥方之所爲者禮讓可興而風俗可厚故政令者古昔聖王馭大下之具而學校則其本務也不此之察而僅以是爲仕進之路則諄矣文田平生與諸生接未嘗不以此言反覆敦勸瓊州於粵境僻在海外文昌又其屬邑然舊志稱民俗素樸雅尙詩書往歲蒞試時嘗親見蓋其風氣最爲近古自宋時已建黌舍元以來地凡四徙後又一再徙矣頃以形家言復

改建

大成殿於縣署之左偏又建尊經閣明倫堂書院文昌閣堂廡門楹如制大海環其東瓊山時其西秀靈所萃蔚焉改觀異日必有偉人傑士出乎其間將於斯焉卜之而文田猶純純不置者則以上之期待甚厚卽下之所以自處者亦不得輕誠使擇術不誤則人才之興可計日而待昔子路去魯顏子謂之曰何以處我蓋古人於臨別有贈言之義茲將行矣聊因重輝等之請而申告以學之所由建更願粵人士咸一聞之也是役也其經始落成日月與凡工料百須重輝別記之於石故不傍書

重建瓊臺書院碑記

嘉慶二十三年冬余奉

國朝巡道費丙章仁和人

命分巡雷瓊道明年四月往視事揚帆渡海恬波不驚入其境見其士樸而能文其民謹愿而不好鬪風氣近古心甚嘉之竊念觀風整俗使者之責也暇日召其縉紳耆老於庭而告之曰瓊地廣袤千餘里經涉重溟物產饒衍與內郡都會埒自宋以來厥有聞人泊我本朝深仁厚澤化被無外士之懷抱瑰特聲稱卓越掇巍科而膺顯仕者不絕也夫欲齊民

俗者自端士習始欲導士習者必自書院始曷思有以舉之僉肅而稱曰瓊有書院曰瓊
臺歷年久遠棟宇朽蝕不可以居住者督學傅公以試事蒞茲土捐廉銀四百爲修葺費
尙未及舉前觀察左公銳意任事尋又遷去今公復有命瓊人士之幸也夫重學校釐文
體學使者之責也若設書院爲敬業樂群所實守土者之責乃學使者先守土者以勤其
事爲多土勗意甚厚也余承左公後責曷敢辭乃以前項四百爲之倡於是同官率分俸
助之士之慕義者捐輸若恐後時二十五年七月始作十二月落成且請余文以記蓋擴
舊址易戶向凡爲門若干重爲堂若干楹爲齋舍若干栢庖溷之所咸具建奎宿之閣於
左下祀宋周程張朱五夫子與其鄉先賢邱海二公功速而事不煩於是歎向之所心滅
嘉者爲不妄也夫士莫先於立志立志之方在乎善學人苟營情於利祿之途鹵莽裂視
五經若贅疣束三傳於高閣日取兔園冊子咕嗶伊吾而欲弋獲科目之榮淺矣縱科目
可以弋獲而欲從事於聖賢之道得門而躋堂是猶壁孔而欲覩日月之全光也是猶斷
港絕潢而欲趨至於海也吾願諸生肄業於茲者饜飶乎詩書之圃優遊乎仁義之園被
服儒先遵循師訓必使處而德行見重於里閭出則經濟見稱於當世斯爲不負使者之

厚望焉若夫修鹿洞之學規紹紫陽之教澤斯又掌教者之責而使者之所企也是役也費計五千金董其事者郡人官獨司其成云

重修文峯塔碑記

國朝郡守呂子班陽潮人

瓊州府城西南八里許丁村舊有文峰塔位宅丁方離明象也歲久傾圮康熙甲申賈太守棠於遺址植表以助文明其明年乙酉郡中撥科者六人由是重建新塔戊子瓊山令王贄於塔前復立文昌祠厥後一修於乾隆丙寅瓊山令楊宗秉再修於癸巳邑紳吳位和等咸有徵應載在郡邑志乘故郡士僉謂此塔輿廢關繫合郡文風盛衰其言有驗今距再修之歲又五十三年矣風雨摧剝日就殘闕郡士屢欲新之而未果也本年正值乙酉鄉試余商之府學教授張衍基訓導王紹曾集邑紳符魁泰亟謀修復官捐資爲倡而邦人士樂助工用相與有成肇工於四月二十日越某日告竣人和旣彰地利斯得崇祠傑構煥然一新矣旣訖事郡士請予文以紀緣起余維瓊郡當炎裔在洪波浩瀚之中爲南溟奇甸朱明鬯朗精氣上華其扶輿旁薄之氣蔚爲人文理學氣節之士先後焜耀史冊而說者以全郡形勢四州環島中高外坦濱海之地益趨平衍不立崇基以鈐束之則

地脈泚散文氣因之不振茲塔修建歷有嘉徵操券不爽雖形家言儒者弗尙然古人建國首重辨方而相陰陽卜瀍澗同見采於孔氏列於詩書則其說亦未盡誣也且夫吾人爲學若建塔然學有本原堅貞篤實一塔之厚其整址也循序漸進不陵不躐一塔之等其階級也由是下學而上達希賢希聖以馴致乎登峯造極之詣其與飛蕤流聖繼長增高薄清景而凌絕頂者更何以異然則塔之有繫於人文而郡士之仰止斯塔也亦宜雖然余之有望於郡士者則尤願其稟山川清淑之氣發日月沐浴之英忠信仁義以固其基文章政事以崇其業功高而無傾節峻而不拔將見人傑地靈英賢挺特處則爲坊表之君子出則爲柱石之名臣以彰

聖天子嚮明繼照聲教南暨之盛軌又豈區區科第之榮侈言地利而已哉昔東漢郃陽令曹全開南門望華嶽使學者各獲人爵之報刊石紀辭垂諸奕世則是舉也允當勒之貞珉俾後之人知有基勿壞勤修以繼前美不亦善乎所有捐資姓氏出入支銷各數詳載碑陰茲不具著

昭忠祠記

署巡
道 張培春

瓊州爲南極奧區外海內黎防守綦要蓋山海危險之區亦志士慷慨立功名之地也
朝廷設水陸大營立闔帥領重兵鎮之萃材勇之士養之行伍之中優其廩祿設之官洩之
長教孝教忠使之諳練服習以成剛果健銳之材異日建功立業由此其選其或遭際叵
測罹於禍患則贈終有制恤亡有典享祀有祠嘉慶八年

勅建昭忠祠續奉

恩旨准將出洋捕盜傷斃淹斃各官兵附祀著爲令瓊郡昭忠祠向在東郊浮粟菴之左近歲
遇風災祠宇傾圮木土墳委瓦礫中道光十二年本鎮黃公建功巡洋舟覆隨行官兵殉
者百餘人皆不得入祀露濡霜降之辰令人盡然傷感權中府何公朝亮倡議改建新祠
僉以爲然因相與規畫各詞請於鎮府設冊勸捐道府廳縣暨各標營將領兵弁皆踴躍
捐輸贊成斯舉得地於鎖鑰門外翔建祠堂三楹崇隆巍煥規制巋然中祀黃公建功而
水陸各營前後出師陣亡洋巡淹沒并捕黎傷斃官弁兵丁悉以次設位附焉祠在水陸
兩營適中之所與江張二公祠衡宇相望死事諸人隸瓊籍者多居近祠數里之間其父
兄子弟瞻望豐祠屹立念祠之所由來與官之所以隆重此祠者咸咨嗟太息感激泣下

甲午夏新祠落成余由廉州守來權兵備具牲醴設長筵奏軍中鼓樂合寅僚肇修禋禮
一時冠帶之弁稱戈之伍相與駿奔走執豆籩莫敢不共莫敢不祇若是役也混人神之
恟贊

聖天子旌揚曠典使人觀感奮發鼓其忠義之氣而堅其敵愾之心有裨於世道人心誠非淺
鮮至於率作興事必躬必親則何公暨署右營守備黎君必榮實爲之余爲綜其始末書
諸石後之登斯堂者必怵然有動於中而以諸君子爲當務之急矣是爲記